





5. b. 48.

John S. Calderwood.

127

1.6.112

854



$$\left( \frac{1}{2} - \frac{1}{2} \right) \cdot 2$$



# ORATIONES

SEBASTIANI FRANZONI

*O L I M*

IN SEMINARIO PATAVINO

Præfecti Studiorum ,

*N U N C*

COLLEGII AB IPSO INSTITUTI

MODERATORIS.



PATAVII , MDCCXXXVII.

Typis Jo. Baptistæ Conzatti.

*SUPERIORUM PERMISSU.*





NOTES

ON THE

W. A. A. O.

ON THE

W. A. A. O.

ON THE

W. A. A. O.



ON THE

W. A. A. O.

W. A. A. O.

IV  
LAURENTIO  
TEUPOLO  
EQUITI, AC D. MARCI  
PROCURATORI  
EX ORDINE TRIUM VIRUM  
GYMNASII PATAVINI

SEBASTIANUS FRANZONUS

F.



Uemadmodum  
nihil quondam  
antiquius mi-  
hi fuit, quam ut Joannis  
Francisci Cardinalis Barba-  
dici jussu de optimis huma-  
ni-

\* 3

ni-

nitatis Studiis in litteratissi-  
ma Civitate tandiu publice  
dicerem, quandiu ille Pata-  
vinæ Ecclesiæ Episcopus præ-  
fuisset; ita nunc nihil magis  
e sententia obtingere mihi  
posse puto, quam ut industriæ  
meæ conatus, qualescunque  
demum sint, editos antea,  
sed passim dispersos in unum  
colligam quasi corpus, Tibi-  
que præsertim, SENATOR  
AMPLISSIME, instituam.  
Ex quo enim mihi signifi-  
catum est, huic meæ justis-  
simæ voluntati, Tuum im-  
mortale nomen ad ornamen-  
tum splendoremque præoptan-  
ti, benigne Te annuere, &  
qua es animi magnitudine,  
-171 pa-

patrocínio etiam favere Tuo;  
tanta hisce lucubrationibus  
honoris accessio est fieri mihi  
visa, ut a veritate minime ab-  
errem, si dicam, præteritorum  
me laborum fructum jam u-  
berrimum percepisse. Avebat  
jampridem animus erga Prin-  
cipem Eminentissimum, opti-  
me de nobis meritum, obstri-  
cti pectoris argumenta certa  
proferre, ejusque memoriam  
hoc quoque litterarum genere  
commendatam, in omnem,  
quantum per me liceret, poste-  
ritatem extendere; Tuque in-  
ter ceteros, SENATOR OR-  
NATISSIME, multis ma-  
gnisque de causis, in quem  
potissimum intuerer, & cui

opus hoc illius olim cūsum  
auspiciis nuncupare vellem ,  
mihi ante oculos obversaba-  
ris. Sed qui ego modicæ fa-  
cundiæ , & eruditionis homo  
tantum ferrem onus , quan-  
tum mihi imponere ipse sen-  
tiebam , si summas , quibus  
late fulges , omnes virtutes  
Tuas, si publicam domi foris-  
que rem a Te felicissime sem-  
per administratam aggrederer  
oratione persequi ? Tua illa  
sefe mihi exquisita offerebat  
sapientia , quæ patrio primum  
hausta cœlo , & avitis aucta  
exemplis , per exteros deinde  
circumlata populos , difficil-  
limis negotiis expediendis ,  
& majestate ubique Veneta  
re-

VI

retinenda adeo emicuit , ut  
ab iis quoque , qui nihil ferme  
commendare solent , aut sus-  
picere , debitam Tibi tamen  
Viri omni virtutum genere  
cumulatissimi laudem & ad-  
mirationem eliceret . Quid  
porro illæ splendidæ , magni-  
ficæ , multiplicesque legatio-  
nes , quas ad maximos Euro-  
pæ Principes nullo temporis  
interposito spatio deinceps obi-  
visti ? quantam Tibi solertiæ ,  
providentiæ , dexteritatis opi-  
nionem peperere ? ut expressa  
in Te uno ad sempiternam Ve-  
netæ amplitudinis commen-  
dationem consilii , fidei , gravi-  
tatis imago penitus cernere-  
tur . Cum in ingentia , & no-  
bis

bis propiora hæc decora aciem  
mentis intenderem , etſi elo-  
quentia valerem plurimum ,  
& modestia ſineret Tua , me  
ab incoepto tamen jure ac me-  
rito deterrebant . Itaque diu  
ancipitem , hærentemque ,  
num ad Te , talem , ac tan-  
tum hoc tenui libello accede-  
rem , ad recipiendos tandem  
animos , pudoremque able-  
gandum Tua incomparabilis  
humanitas impulit . Tua ni-  
mirum facilitas , quæ cum hoc  
dignitatis faſtigio mirandum  
in modum conjungitur , me  
dubium , ac trepidantem con-  
firmavit , docuitque , quam lit-  
terariæ rei procurandæ perſo-  
nam jamdiu rara cum fama ſu-  
ſti-

stines, in disciplinas omnes, earumque cultores ita Te impendere, ut homines etiam mediocres ad bonarum artium possessionem pro virili nitentes, in Tuam clientelam non renuas comiter asciscere, Tuoque valido semper præsidio fovere. Vides, SENATOR AMPLISSIME, quæ me causæ præsertim eo adduxerint, ut inter Venetos Proceres Te exitium lumen compellare ausus fuerim, & a gravissimis rebus ad hæc devocare tantisper; quibus cum illæ quoque potissimæ adjungantur, me hisce orationibus Barbadicæ Familiæ laudes identidem interserere, quacum Tibi non tam



sanguinis affinitas, quam virtutum similitudo intercedit, neque huic facere quicquam posse gratius, quam si præsenti opusculo Tuum grande nomen præfigam; præclare mecum actum iri existimabo, si hæc, qualiacunque sint, perpetua meæ observantiæ cultusque erga Patronum Auspicemque faustissimum esse monumenta patiare. Faxint superi, ut vivas felicissime, qui non minus patriæ, quam litterarum vivis felicitati. Vale.

*Patarvio. Pridie Idus Julii.  
MDCCXXXVII.*

A D  
LECTOREM



*Am tum mecum  
ipse decreveram,  
cum Seminarii Pa-  
tavini moderandorum studiorum  
curam aliis relinquerem, Superis  
nos in tutiora vocantibus, a pu-  
blica prorsus luce tum dicendo,  
tum scribendo abstinere imposte-  
rum; quod scopuloso illo, & fe-  
re infesto veluti pelago non om-  
nino improspera, ut videbatur,  
usus*

usus antea fortuna , non satis  
prudentis esse viri arbitrarer , no-  
vo me rursus periculo committe-  
re , & hominum ingenia ad car-  
pendum maxime prona laceffere ;  
tantoque hoc firmitus manebat a-  
nimo , quod quæ habita a me quot-  
annis sunt orationes , & evulga-  
ta , illa ipsa si una conjuncta ite-  
rum ederentur , in legentium ocu-  
los magis incurrerent , & si quid  
in iis displiceret , ut morosis præ-  
sertim hominibus displicerent non  
pauca , censorium magis eorum  
supercilium in se commoverent .  
Verum progrediente tempore non  
ita suo cuiuslibet esse utendum sem-  
per judicio perspexi , ut non alieno  
aliquando parendum sit . Neque  
enim , qui me ad famam rursus  
ten-

ten-

X

tentandam cohortabantur , mihi  
ajebant integrum esse in proposito  
permanere , qui locum quidem  
commutaverim , sed idem tamen  
docendi institutum retinuerim ; im-  
mo tanto mihi ad oratorium opus  
esse vehementius connitendum ,  
quanto qui fidei nostra concrediti  
sunt adolescentes , orti loco nobi-  
li , & in optimam patriam suam spem  
educati , firmiore presidio indi-  
geant , quo per asperum & lon-  
gum ad eloquentiam iter opportu-  
ne fulciantur . Praesto quidem illis  
dictitabant esse Tullios , Livios ,  
Nepotes , unde lingua latina can-  
dorem eruerent , & solidum , ger-  
manumque dicendi genus edoce-  
rentur : sed praeter hosce aurea a-  
etatis Scriptores peculiari aliquo ,  
&

Et quasi domestico duce opus esse,  
qui voce Et scripto ipsis praireret,  
qui non solum elegantissimos in-  
terpretaretur Auctores, Et diffi-  
cillimos locos explanaret, sed qui  
aliquid etiam ipse elucubrando,  
Et conando fere similia, qualia ini-  
bi cerneret, studiosissimos ita ado-  
lescentes ad illorum imitationem  
magis inflammaret. Ego equidem  
de me tantum polliceri non au-  
sim, quantum alii jure fortassis, ac  
merito de se pollicentur, qui cum  
Eloquentissimi vulgo habeantur,  
Et promi condi, ut ita dicam,  
latinitatis sint, possunt, qui ipso-  
rum vestigiis proxime insistant,  
ad genuinam, minimeque fucatam  
facundiam facillime perducere.  
Attamen si perpetua librorum tra-  
cta-

*etatione, neque intermisso unquam stylo pro ingenii mei mediocritate quicquam potui proficere; non inutilem, neque supervacuam honestissime me juventuti spero navaturum operam, qui per duos & viginti annos, in florentissimo olim Musarum domicilio, partim humanas litteras profitendo, partim omnium disciplinarum regendo studia, non modo vividam aetatem detrixi, sed prope etiam consenui. Etsi vero non is est demum secutus fructus, quem exantlati a nobis labores sperare non injuria videbantur; me tamen eorum omnium, qui me illo in munere praecesserunt, exempla valde solantur, qui cum eadem ferme, ac nos, fortuna usi essent, in litte-*

te-

terario nihilo minus curriculo na-  
viter perstiterunt, contenti ea,  
qua ingenuorum hominum vera  
merces est, recte factorum con-  
scientia, ea contenti existima-  
tione, quam non temere conce-  
ptam augere viri probi solent,  
si quem vident constanti firmoque  
gradu in priora vita consistere,  
Et impavide semidocta turba ru-  
musculos contemnere. Ad hac sa-  
ne gravia accedebat illud ponde-  
ris non exigui, oportuisse omnino,  
ut si non ingenii nostri, quod mo-  
dicum a natura accepimus, ac di-  
ligentia saltem, ac sedulitatis a-  
liqua monumenta proderentur,  
nequis forte putaret nimium cre-  
dulus, per ea tempora, quibus  
Seminarii Studiis praeuimus, po-  
litio-

litiores jacuisse doctrinas, & pristinum illum ad arripiendas liberales artes animorum ardorem per ignaviam, aut negligentiam refrixisse. Hos porro stimulos cum mihi, varias rerum vices evolventi, prudentes homines subderent, me mei etiam in Prasulem spectatissimum, Joannem Franciscum Cardinalem Barbadicum officii commonebant, cujus insignis in omnibus magnificentia, & in optimas disciplinas perspectus amor, & cura nullo modo a nobis poterat silentio prateriri: qui utinam, quæ designaverat mente, re etiam ipsa pro sua quadam singulari animi excelsitate perficere potuisset; multo plura profecto ejus liberalitatis, & munificen-



centia erga humanitatis studia pignora nunc haberemus . Sed de illo Principe in oratione , quam , cum ejus exequia celebrarentur in *Æde Cathedrali* , infinita hominum confluyente multitudine , publice recitavimus . Cui quidem orationi visum est non absonum alteram addere , qua a me quondam est habita , cum *Francisco Doleonio* , Canonico , & *Vicario Generali Eminentissimi Georgii Cornelii* , immortalis nominis *Episcopi* , *Seminarium grati animi* causa parentaret . Quamquam hac ipsa , qua consulto in lucem iterum producimus , pro certo scio , non a- que ab omnibus acceptum iri , at- que *Scriptores* cupiunt . Ego ta- men non is sum , qui quam potesta- tem

tem in libros omnes jure suo semper homines habuere, ut summus litteratura arbiter, aut concedere, aut demere velim; ut quisque enim affectus est, ita fere judicat; iis quidem, qui non probant, nisi sua, aut quae ad ipsos pertinere aliquo modo possunt, neque hac, neque alia quæpiam, politissima licet, & ad omnem elegantiam, & suavitatem exculta placebunt unquam. Magnum mihi opera pretium videbor tulisse, si hosce conatus meos Judex humanissimus aequi bonique faciat. Quinimmo pergam alacrior unum cum fratre, novum jam stadium ingressus, pulverem non indecorum colligere, precatus enixe Superos, ut quoniam a calce ad  
cat-

carceres , decurso prope spatia ,  
lubenti securoque animo regressi  
sumus , liceat in suscepta pro-  
vincia cum commissa nobis iuven-  
tutis emolumento diutissime ver-  
sari . Cura , ut valeas , & nos  
ames , & nostra .



NOI

## NOI RIFORMATORI DELLO STUDIO DI PADOVA.

**A** Vendo veduto per la fede di Revisione, ed Approvazione del P. F. Antonio Gerolamo Cagnazzi Inquisitore di Padova nel Libro intitolato: *Orationes Sebastiani Franzoni olim in Seminario Patavino Praefecti Studiorum, nunc Collegii ab ipso instituti Moderatoris*; non vi esser cosa alcuna contro la Santa Fede Cattolica; e parimente per Attestato del Segretario Nostro, niente contro Principi, e buoni costumi, concedemo Licenza a Gio: Battista Conzatti Stampatore in Padova, che possi esser stampato, osservando gli ordini in materia di Stampe, e presentando le solite copie alle pubbliche Librerie di Venezia, e di Padova.

Dat. 18. Marzo 1737.

( MICHEL MOROSINI Cav. Rif.

( PIETRO GRIMANI Cav. Pr. Rif.

*Agostino Gadaldini Segret.*

Alii novum sibi ipsi studium, ludumque pepererunt, atque in iis artibus, quæ repertæ sunt, ut puerorum mentes ad humanitatem fingerentur, atque virtutem, omne tempus, atque ætates suas consumserunt.

*Cic. de Orat. lib. 3. cap. 15.*

## ARGUMENTUM

## PRIMÆ ORATIONIS.



*Um mihi e solempni Se-  
minarii Pata-vini in-  
stituto proludendi stu-  
diis demandata præ-  
vincia est ; letissimus nuntius attulerat,  
Joannem Franciscum Cardinalem Barba-  
dicum , quem uniuersa Civitas , in fer-  
uentissima vota & preces effusa , popo-  
scerat à Superis , Ecclesie Pata-vinae Pon-  
tificem designatum esse . Etsi autem pù-  
blice lucis periculum , cui primum me  
committebam , non exiguum rudi præfer-  
tim homini , & indiserto metum incu-  
tiebat ; illa meum tamen mirum in mo-  
dum recreabat animum cogitatio , fore,  
A ut*

ut eo. Auspice, & Judice in arenam primum descenderem, quem litterulae nostrae tanta propinquitate contingerent, quanta inter Parentem amantissimum, & dulcissimos liberos intercedit. Sed quoniam non servit fortuna, me illa frui felicitate, quae mihi omnium maxima fuisset, si coram tanto Principe publice dicendi munus auspicarer; mea certe in eum summa observantia, gratique animi officium postulavit, ut amplissimo jam omnium studiorum nostrorum Patrono, & quem, cum dicerem, praesentem, ac dantem mihi trepido spiritus intueri videbar, hanc, qualisqualis demum sit, lucubrationem instituerem, ejusque valido munitam nomine, in lucem emitterem. Jam hujusce orationis hic scopus, & finis est. Cum humanas litteras eodem in loco jamdiu profunder, ac forte M. Tullii de Oratore libros meis Auditoribus interpretarer, mihi visum est non incongruum, si ab Antonio, & Crasso excitatam ibi controuersiam, num vere dicendi datur  
ars,

ars, pluribus explicarem. Cum enim ex rebus penitus perspectis, & palam cognitis ars omnis constet, neque ab opinionis arbitrio pendeat; non videtur ulla esse ars Oratoris, ac propterea Doctores Græci, qui ubique Romæ ludum de Rhetorica tunc aperuerant, oleum & operam perdidisse, qui assererent, neminem Eloquentiæ laudem assequi posse, qui non omnia dicendi præcepta probe teneret. Attamen, ut verum fateamur cum Antonio, non ita ars oratoria (quæ aliqua certe esse debet) nobis accipienda est, ut omnis loquendi vis in ea ponatur, quemadmodum nonnulli volebant, neque prorsus ea tota repudianda. Videlicet sapiunt, qui neque omnino præceptis inherendum esse, neque ab his penitus discedendum putant, sed ita hac in re erudiendos Adolescentes, ut intelligant, ad Eloquentiam consequendam requiri multo majora: parique in culpa esse tum illos, qui, siue oratoriam, siue poeticam facultatem profiteantur, nimium



( 4 )

*præceptis utantur , tum illos , qui utrius-  
que facultatis cultores a se omnia ar-  
tis præsidia ablegent , ut inania , vel  
etiam noxia .*



ORA.



# ORATIO

## PRIMA.

*Ad oratoriam , & poeticam laudem  
contendenti , tum nimius , tum  
nullus præceptorum usus  
impedimento est .*



Uam anceps , & lubri-  
cum tractet opus , qui  
ex edito loco publicam  
lucem dicendo susti-  
net , etsi jam nihil est ,  
quod ab oratoribus jactetur frequen-  
tius , & ad lucubratiunculæ vel tenuis-  
simæ existimationem aliquam compa-

randam passim circumferatur ; nemo tamen id melius intelligit , quam qui suo ipse periculo rem tantam primum aggreditur . Quandiu subsellia , de dicentis facultate judicaturi , occupamus , eumque initio statim exalbescere , ac debilitari metu conspiciamus , ut hæc trepidatio nostros tangat animos , eosque non leviter turbet ; in eam cito tamen opinionem descendimus , ut expositi timoris magnitudinem pro veteri quodam hujusce artis instituto confingi magis , quam ex sincero animi sensu significari putemus . Verum si quando fit , ut ex umbra domestica , in qua tutus delitescebas , in ipsam oratoriam aciem , in medium discrimen , dimicationemque voceris , ibique conjectos in te unum omnium oculos intuearis , quid hominis sis , quam facundus , quam eruditus , curiosissime expectantes ; tunc enim vero loci difficultatem fama longe majorem sentis , neque potes , nisi a natura to-  
tus

tus ad audendum factus es , tantarum rerum facie non magnopere commoveri. Neque vero ego nescius eram , quanto quisque ante stat ceteris eloquentia , tanto , quæ possunt contingere , ne tum , cum minime oportet , contingant , timere magis ; quippe qui non de industria solum , de prudentia , de dictione , quæ maximi momenti sunt , sed de iis etiam , quæ minoris licet , nisi tamen recte præstet , reliqua bona obruunt , de memoria , de gestu , de pronuntiatione decernat. Tot , tamque validis ad percellendum pectus concurrentibus causis , illud me nihilominus in ipsa ingenii mei infirmitate solaretur , si mihi primum oratione cum multitudine congregiendum esset , quæ rimari dicentem non solet , sed externo tantum litterarum colore videtur esse contenta . At cum gravissimam oratoris personam in eo jubeam Auditorum consensu fulcipere , qui sapientia , & poli-

tiore doctrina constat, ubi e singulis  
 ordinibus eminent disciplinarum, &  
 eloquentiæ clarissima lumina; quam  
 pavidè, quam sollicitè, quam anxie  
 me in medium decet procedere, non  
 iis instructum virtutibus, quæ orato-  
 rem & faciunt, & ornant; stylo ve-  
 ro adeo jejuno & exili, ut vix umbra-  
 ticæ palæstræ sit satis, nedum in aspe-  
 ctum excultæ bonis artibus civitatis,  
 & ad ineptias excutiendas acutissimæ  
 proferatur? Ergo in tanto curarum æ-  
 stu, nihil reliqui est, nisi ut vestra me  
 benevolentia complectentes, quid mi-  
 hi ad hoc publice obeundum munus  
 fuerit animi, ad vos referatis, repu-  
 tantes, exercitatissimum quemque mi-  
 litem, cum primum in hostem edu-  
 citur, trepide gladium stringere, ne-  
 que posse, etiamsi maxime connitatur,  
 latentem virtutem expromere. Quod  
 ego, ut e dulcissimo conspectu vestro,  
 & secunda admurmuratione conjicio,  
 si obtinero, velitationis magis, quam  
 iustæ

justæ pugnæ gratia illud ostendam ; unde potissimum fiat , ut præclara alioquin ingenia , quæ in hoc litterario pulvere versantur , si quid soluta , & ligata numeris oratione scribendum sit , nihil , aut certe pauca pariant , quæ ad oratoriam , & poeticam dignitatem assurgant . Duas enim hujusce rei causas reperio , quod alii omnem utriusque facultatis laudem in præceptis exequendis collocant , neque quicquam præterea audent ; alii contrariam omnino rationem secuti , se demum posse putant in his studiis excellere , si omnia prorsus præcepta ablegarint . Utrumque malum , quod fere adolescentum est , non raro etiam ætatis jam solidæ , tum eorum , qui ut accuratissimi videantur , ne latum quidem unguem a regulis discedunt , tum eorum , qui satis , ut sibi videntur , a natura ad dicendum comparati , artis subsidia rejiciunt , magna animi cura cavendum est , & , ut spero , nostris ado-

adoleſcentibus cavebo , ſi hoc in præſenti docuero , ad oratoriam , & poeticam laudem contendenti , tum nimium, tum nullum præceptorum uſum impedimento eſſe .

Non deerunt fortasſe qui dicant , injuria a me adoleſcentes homines in eo culpari , in quo digni ſint , qui non mediocriter commendentur, cumque ad abſolutam utriuſque rei poſſeſſionem ſumma omnia requirantur , eorum vividam indolem , & quæ indolis plerumque comes eſt , diligentiam , non ſatis ad tempus accommodata oratione infringi . Quid enim tandem attinuit , tot præſtantiffimos dicendi magiſtros , qui cum incredibili litterariæ reipublicæ incremento ſingulis ætatibus claruere , huc ſuas curas , cogitationeſque vertiſſe , ut juventuti ad eloquentiam impavido paſſu properanti , certas vias præmonſtrarent , & quæ præcepta a majoribus rudia , aut obſcuriora accepiſſent , explicando , illuſtran-

strando mirifice propagarent , si tam exactam , latamque præceptionem modicus erat usus secuturus ? Ac Tullius quidem ea gloria , qua splendidiorem non Crassi , non Antonii , non Hortensii e foro unquam collegere , debuit esse contentus , neque erat , cur in immensa negotiorum turba horas arriperet , quas , diligenter exarando quæ in contentione dicendi vel ipse expertus esset , vel in aliis animadvertisset , in commune deinde litterarum bonum conferret . Aristoteli porro suam illam philosophicam obambulationem non intermittere satius fuit , quam , Lycæo aliquando relicto , ad hæc humanitatis studia tractanda eo mentis ardore ferri , ut in hoc quoque genere supra ipsos artifices videatur sapuisse . Non erat profecto tanti , celeberrimos hosce viros , & vero innumerabiles alios & Græcos , & Latinos in re laborare , quæ parum fructuosa esset , immo etiam noxia , si in ea usurpanda  
 itu.



studiosius occupareris . Hæc mihi tacite videntur objicere , qui de juvenum progressu nimium solliciti , nullos hic terminos fervidæ ætati præstituunt , sed magnum succrescentis facundiæ argumentum inde desumunt , si cum Quintiliano , cum Hermogene , cum Longino quotidie vivant , eorumque monitis ad eloquendum sæpissime utantur . Ego sane , si ad sedulos hos scriptores accedunt , ut Rhetoricæ naturam , & virtutem cognoscant , præcipua ediscant præcepta , memoriæ figant , & ad omnes opportunitates parata habeant , vehementer laudo ; quandoquidem nemo egregius opifex esse potest , qui ejus rei , quam profitetur , non ante scientiam perceperit . Qui vero sibi persuadet , se nunquam orationem dolare posse , nisi ad Fabiûm statim convolet , eiquè totum se dedat ; neque rite Musis scribendo operari , nisi in Aristotelis poetica consenscat ; vereor , ne sibi imprudens cos ipsos parat

ret adversarios, quos veluti signiferos;  
 ac nunquam fallentes duces sequitur.  
 Age enim quid est, quod tui illi do-  
 ctiores, sive liberam, sive vincam pe-  
 dibus scriptionem mediteris, præfer-  
 tim inculcent? Ut oratio polita sit, ut  
 elegans, ut robusta, ut suis sensibus,  
 & coloribus tineta, omni conatu eni-  
 tere; at cave; ne quemadmodum in  
 manufactis, opera appareat, & labor,  
 ne artificium, quod ibi ceteroquin  
 maximum esse debet, una cum suo  
 auctore se prodat; conelamatum est,  
 si foras erumpit. Bene hercle illi, &  
 ex officio; sed tu ab his jacta funda-  
 menta subruis, qui in id potissimum  
 incumbis, ut nihil videatur a te fieri  
 non artificiose, & accurate. Neque  
 enim video, quomodo perspicacissi-  
 mos hominum oculos possit effugere  
 tam insignis in dividendis orationis  
 partibus, distinguendis, ornandis se-  
 dulitas, ut, si forte narrationem, aut  
 enumerationem omittis, hoc tanquam  
 pro-

prodigium, nulla hostia apud Rhetoras expiandum, perhorrescas. Equidem in statuaria, & pictura, quæ ex certa quadam, & exquisita membrorum distributione coalescunt, intelligo, quanto in his plus ponitur operæ, tanto magis opus probari. In oratoria autem, & poetica, quæ non ex definita verborum, & sententiarum conformatione, sed ex libera, ac prope divina eloquentiæ vi suum decus asciscunt; non intelligo, quo pacto id, quod ex impensa cura tandem in lucem exit, probari possit. Ergo ne spectantium oculos tabulæ detinebunt, si in singulis membris figurandis omnem artem pictor expresserit; in se hominum admirationem signa elicient, si ex ære suavissimos vultus acerrimus sculptor eduxerit; orationes autem juxta præceptorum regulas elaboratæ non modo non placebunt, sed etiam repudiabuntur? Negat enim in libris<sup>(1)</sup> de Oratore Craf-

(1) *Cic. de Orat. lib. 1. c. 32.*

Crassus, vir ille eloquentissimus, quem perpetuæ in judiciis concertationes, non de ludo proclamator erudiverat, eloquentiæ famam quemquam adeptum, qui dicendi præcepta secutus sit. Quid si hæc in omnem orationem quis intrudat? quid si nullum argumentum amplificandum proponatur, ubi non extemplo Vossium cum ingenti illo præceptionum volumine producat? Probabitur ne, qui omnia undique circumspicit, definitiones, causas, effectus trepide expendit, comparat cum exemplis, ac ne tantillum quidem a progymnasta, ut puer a pædago, recedit? Monet ne Rhetor, nihil in amplificatione nimis enucleandum esse? Plus, quam imperetur, obtemperat; quæ extendere etiam latius potest, in arcta compellit. In exordio, & epilogo affectus præsertim dominari, in reliquis vero partibus aut nunquam, aut raro admitti? Ne quid peccet, ceteras partes, etsi motus

tus

tus possint , atque adeo debeant recipere , exspoliat . Quid quæris amplius ? Jubet Isocrates , ut lenis instar fluminis incedat oratio , deligendos pedes concinnos , & asperum vocum sonum , pestem blandiloquentiæ inimicam , averruncandum ? Dochimos , anapæstos , pæonas , amphibrachos avide conquirat , ut suus dictioni numerus concilietur . Verumtamen quodnam demum opus e laboriosissima prodit officina , in qua toties pluteus cæsus est , & demorsu unguis , ut ad amussim omnia revocarentur ? Squallidæ , hirtæ , meticulosæ orationes exeunt , sine veperibus , sine sanguine , sine succo , puellis apud Terentium <sup>(a)</sup> simillimæ , *quas matres , ut graciles fient , reddunt curatura junceas* . Nihil usquam iratum est , nihil invidum , nihil mirabile , nihil atrox ; omnia dura sunt , coacta , macra omnia . Quæ enim alia , nisi illepida eorum scriptura esse potest , quo-

(a) *Eunuch. Act. 2. Sc. 3.*

quorum labor omnis est in adhibendis instrumentis consumptus ; ingenium interea , potior pars animi , & ad inveniendum , ornandumque maxime fecunda , non se extulit , nec lacertos exeruit suos , sed intra artis cancellos misere torpuit ? Majus quiddam mediufidius eloquentia est , Rhetoricis regulis longe majus ; aliunde illa suam dignitatem , ac magnificentiam asciscit ; non hic , ubi opes suas , & lautam , copiosamque ornamentorum supellectilem explicat , non Demetrius , non Cornificius , non illæ ipsæ augustæ Sedes , quas ad credula ingenia allicienda versuti scriptores librorum frontibus inscribunt , non hic locum habent ; habet ferax , & læta indoles , acuta , experrecta , expedita mens ad res illustrandas locum habet ; his eloquentia præfidiis munita , libera , sui que juris , nemini addicta Rhetorum , qua libet , excurrit ; modo aperta facie in concionem sese infert , modo

B

per

per latebras in judicium obrepit animos ; modo summa , modo temperata dicendi forma sese ostentat , modo res amplificat , modo minuit , suo , non magistrorum arbitrio ; nunc irarum plena minas intentat , nunc pacata blanditias miscet , nunc amore , invidia , indignatione , misericordia permovetur . Quid mihi illam quasi discipulam in scholæ claustra compingitis ? Quid ad similitudines , contraria , conjugata , schemata colligenda , venanda vocabula , syllabas aucupandas demittitis ? Quid hoc est aliud , quam matronam nobilissimam ad vilia ancillarum ministeria detrudere , nimiumque duris legibus devincire ? Excelsum quiddam nostris auribus sonat , cum eloquentia nominatur ; pudorem tam amplum nomen nobis debet injicere , neque permittere , ut ejus antiquum decus cum arte , quæ famula est , & ministra , temere commisceatur . Antequam infinitum illud præ-

præceptorum agmen in oratoria castra, Sophistæ, inveheretis, ante vestras de Epidiſtico genere, Deliberativo, Judiciali diſceptationes nata erat eloquentia; forum, curiam, judicia occupaverat; veſtrum hoc artifiſcium, quod tantopere urgetis, ab illa accepistis, ne dicam furripuistis. Non temere hæc pronuntiamus; siquidem ingenio, & lingua eximii olim viri fuere, qui cum mira verborum suavitate placerent hominibus, eorumque animos vehementi orationis copia regerent, ac moderarentur, peculiarem quendam, & a vulgo remotum sermonem adamarunt. Hic singulari hominum industria, & frequenti usu dilatatus, in consuetudinem sensim, ac prope legem abiit, atque præſtare reliquis dicebantur, qui facundos illos viros melius imitarentur. Nihilo tamen secius mansit libera, ut æquum fuerat, eloquentia; propterea quod naturarum varietas, multiplex, ac diſſimilis elocutio,



rerum , & cauffarum diverſitas veta-  
 bat , quominus præcepta certa con-  
 ſtituerentur . Ecce tibi repente exorti  
 Rhetores , qui ſive verecundia , ſive  
 metu foro prohibiti , rem pulcherri-  
 mam , & ab oratoribus in medio reli-  
 ctam , in domeſtico otio tractandam  
 ſuſcepere , & quæ in dicendi ratione  
 obſervata ſunt , ſuis designantes ver-  
 bis , illuſtrantes generibus , ac parti-  
 bus diſtribuentes , facultatem nobis pe-  
 perere , quæ Rhetorica dicitur . Ho-  
 rum diſciplinam , ſi nihil prodeſſe di-  
 cam , proſecto mentiar ; eſt enim , ut  
 ſcribit <sup>(a)</sup> Tullius , etiamſi minus ad be-  
 ne dicendum neceſſaria , ad cognoscen-  
 dum tamen ingenuo homine non in-  
 digna ; ſed <sup>(b)</sup> Q. Catulus apud eundem  
 Tullium , concoquere non poteſt ,  
 eos , qui nunquam forum aſpexerint ,  
 & judicia , documenta velle de re ipſis  
 ignota perſcribere , dignos prope di-  
 xerim , qui a diſertis eo reſponſo di-  
 mit-

(a) *De orat. lib. 1. c. 32.* (b) *Lib. 2. c. 18.*

mittantur , quo Phormio quidam Peripateticus ab Annibale dimissus est , qui cum de Imperatoris officio de expeditionibus , de urbium oppugnandarum apparatu , de vineis , de catapultis diu , copioseque coram fortissimo duce disputasset , rogatus Pœnus , quid de Philosopho tam docto sentiret , liberrime respondit : Multos se deliros senes vidisse , sed qui magis quam Phormio deliraret , vidisse neminem . Alius enim forensis pugnae , alius umbratilis commentationis habitus est ; alia tradendae artis , alia orationis fingendae ratio ; tempestivos facietiarum sales , concitatissimas dicendi flammæ , tonitrua , fulmina , non intermortuæ magistrorum voces , sed miserabilis reorum facies , adversariorum pervicacia , Judicum conspectus , clamor , lux , cœlum subministrat . Proinde horum præceptis qui suam libertatem addicit , sterilem , exsuccam , scholasticam orationem inducit , eorumque

fit similis , quorum vestigiis insistit ; hoc est non orator . Quos enim e tanta docentium turba mihi quis proferet , qui ad mediocrem aliquam facundiæ laudem pervenerint ? Audiet illos de dictione Asiatica , Attica , Rhodia ingeniosissime differentes , quæstiunculas etiam satis argutas de Rhetorica docente , & utente agitates ; at si stylumprehendere eos videat , & aliquid oratoris in morem præfari , quid non hispidi , quid non salebrofi , quid non audiet dissipati ? Mihi sit instar omnium Quintilianus , qui propter singularem eloquentiæ tyronibus navatam operam , summi præceptoris nomen obtinuit : quis in docendi munere eruditior , ad judicandum prudentior , ad veterum elegantiam , & acumen delibandum ornatior ? Cape nunc , quas in privato ludo meditabatur , ejus declamationes cape ( si quidem ejus sunt , quod video a multis negari ) quam subito alium a Quintiliano præ-

ci.

cipiente hominem dicentem offendis, quam aridum, quam angustum? Quod cum attente confidero, mirari subit, quid Laurentio Vallæ in mentem venerit, tam libere pronuntiare, <sup>(a)</sup> *neminem posse neque Quintilianum intelligere, nisi Ciceronem optime teneat, neque Ciceronem probe sequi, nisi Quintiliano pareat, neque quempiam eloquentem post Quintilianum fuisse, nec esse posse, nisi qui se totum arti ejus formandum, imitationique tradiderit.* Sed ille studio partium abreptus, ut in Aristotele, ac Tullio insectando, sic in Fabio effrendo est modum, ac fidem prætervectus. Hæc enim est Criticorum consuetudo, ut, quoniam sibi ad oratoriam laudem aditum interclusum vident, ad id, quod est facile homini, eruditionis parandæ non penitus ignaro, ad præcepta artis tradenda convertant animum, in quæ si a scriptoribus peccari sentiunt, aut putant, sta-

B 4

tim

(a) *Lib. 1. Anid. in Peggiam.*

tim in jus arripiant , supinæ negligentiae insimulent , hos illis anteferant , omnem denique rem litterariam susdeque agant . Sed sinamus eos , quando in suo regno sunt , in tutos jam , & communi hominum fama probatos viros censoriam virgulam expedire ; interim statuamus , quos Græcia , & Latium suspicit oratores , Demosthenem , Æschinem , Tullium , Hortensium sua magis virtute , quam præceptorum ope eloquentiæ fastigium tenuisse ; poetas autem , quos in sacra Musarum templa cælestis quidam spiritus intulit , Homerum , Virgilium , Horatium , Ovidium natura maxime valuisse ipsa , & prope nihil magisterio debuisse . Suus est in unoquoque natus , ac solidus color , quo vere explendescunt , quo unus ab altero discernitur ; at fortasse nemo mihi certam ab arte petitam causam assignabit , cur Virgilius poetas omnes exsuperet , Tullius oratores & Græcos , & Latinos to-

to *vertice supra sit* ; Silius , Stadius , Claudianus , Valerius Flaccus , si cum Marone comparentur , languere videantur . Quis enim risum cohibeat , quoties in eorum interpretes incurrit , plus quam lynceo oculo pervadentes intimas singulorum verborum fibras , monere perpetuo legentem , urgere , instare , ne quid sibi elabi patiatur ; quod non arti continuo deferat ? quasi vero doctissimi viri , quod in suo genere perfectissimum est , non mentem , & linguam acuendo , sed opificum instrumentis utendo , sint consecuti . Tu igitur ab Adolescentibus omnia præcepta prorsus ablegas , inquiet aliquis , eorumque animos nec opinato confirmas , qui sua jam sponte ad hæc studia profitenda sine ullo doctrinæ usu cucurrerunt . <sup>(1)</sup> *Pergis pugnantiâ secum Frontibus adversis componere* . Nolo ego vitium vitio , & haud scio an pejore sanare ; præceptionibus enim rhetoricis

(1) *Horat. serm. Satyr. 1.*

ricis tanquam tabulæ adhærescere , si malum est , habet tamen aliquid , quod honesti timoris in re difficillima speciem ferat ; quis vero æquo animo pati potest , eos , qui rudimenta disciplinæ ne primoribus quidem labris degustarunt , in hoc oratorio , & poetico pulvere tam intrepide jactari ? Atqui quam multi sunt , qui se satis superque ad humanarum litterarum traditionem a natura instructos existimantes , & sæpe , ac sæpius usurpata artem orationi officere intelligentes , nullum sibi cum præceptoribus , eorumque legibus commercium volunt ? non secus ac cerebrosi homines , qui cum audierint , immodicis pharmacorum potionibus optimam vitari valetudinem , quælibet remedia , & quidquid Hippocratem , & Galenum sapit , etiam cum maxime medico indigent , averfantur . Nascitur , non inficior , nobiscum loquendi virtus , & mutua cogitationum , ac sensuum com-

communiōne adolescit ; in aliis orationis ubertas , sententiosa in aliis brevitas , in aliis lepores magis emicant ; libenter concedo ; addo etiam aliquid amplius , plebecula ipsa , cetera rudis , suos tropos habet , suas interdum figuras belle fundit , novitque , si quid ab aliquo petendum sit , ei satis calido procemio blandiri . Hæc tamen vis non exigua ad oratoriam , & poeticam contendenti , non est mehercule satis ; nisi ab arte , docta nutricula , institutionis quasi lacte educetur , manca semper erit , nec unquam certo , ac stabili gradu consistet , Video , me apud sapientissimos viros de re minime obscura verba facere ; sed date mihi quæso veniam hanc , ut paucissima apud eos attingam , apud quos increbuit opinio , in præceptis addiscendis oleum , & operam perdi . Ea enim est dicendi provincia , ut si ingenio , & animo magno sustineatur , admirabilem orationi auctoritatem ,  
di-



dicenti fidem , reis præsentissimum præsidium afferat . Jam quis hæc bona tam ampla , tam necessaria sperare potest , qui non artem comitem habeat , docentem , quo flectendum sit iter , unde reducendum ; quid amplificandum sit , quatenus , quibus amplificandum ? Multa & ignarus doctrinæ dicet , at sine ordine , & sine lege ; casu , & temere pleraque effutiet ; qui non didicerit in exornationibus quæ potissimum laudanda , in deliberationibus , quæ ad saluberrima consilia præbenda sint opportuna , in judiciis , quæ adversarios concutere possint , & palmam oratori promereri . Quid si in eas incidat controversias , cum per conjecturas facti veritatem perquirimus , vel cum nomen rei definiendo , investigamus , vel cum ejus qualitatem discutiendo , de honesto , & utili disceptamus ? Hærebit incertus , ac dubius , aut enthymemata crebrius , quam oportet , intorquebit ,  
aut

aut nimia ad declassandos Auditores exempla adducet , omnia aget præter dicentis munus , qui fontes non petat , unde ad excogitandum , disponendum , & quæ paraveris , verbis , ac sententiis convertienda , opportuna materies hauriatur . At enim poetæ , qui e contrito proverbio nascuntur , præceptis non indigent . Mehercule tam beatis hominibus magnopere gratulor , quod præter poeticum furorem , quo ad omnem Hippocrenem combibendum se rapi sentiunt , edocti quoque a natura sint , quid foccum deceat , & cothurnum , quid Epico , & Lyrico conveniat carmini , si tubam , & plectrum sumant . Non illis incongrua , absona , remota , veritati contraria unquam excident , cum tamen  
 (a) *quandoque bonus dormitet Homerus* . Ita ne vero , non dicam Tragædiam , & Epopæjam conscribere , sed aliquid dignum Apolline moliri potest , qui  
 poc-

(a) *Horat. de Arte Poet.*

poematis vitia non ante cognoverit ,  
 ut effugiat , virtutes , ut amplectatur ?  
 Ita ne in Euripide ; in Æschilo , in  
 Sophocle , qui omnem facultatis vim  
 ad fabulas luculenter texendas contule-  
 re , non pauca censuram patiuntur ;  
 tu tibi tantum arrogas , qui nullo du-  
 ce credas , te posse Musarum præfidi  
 lauream decerpere , & in vatium nu-  
 merum referri ? Nam Pindarus<sup>(a)</sup> glo-  
 rietur per me licet , suis se tantum  
 pennis rapi in sublime , & cælum  
 cantus dulcedine permulcere ; Bacchy-  
 lidem contra , & Simonidem , æmu-  
 los suos , diuturna arte institutos ,  
 serpere semper humi , nec audere quip-  
 piam poetica majestate dignum , sed  
 rude , & inconditum crocitare ; glo-  
 rietur per me licet ; etsi enim raro ad-  
 modum eorum scholas , qui voce præ-  
 cepta traderent , adolescentulus fre-  
 quentavit , legendo tamen poetas ve-  
 teres , & quoad fieri potuit , imitan-  
 do ,

(a) *Olymp. 11.*

do , quasdam sibi leges imposuit ,  
 quas , cum lyram tangeret , sequeretur . Scilicet poeticus furor ( quoniam  
 ita appellari placet ) si diligenti , &  
 attentâ cura non temperetur , & invi-  
 tus licet , ac repugnans valido ratio-  
 nis fræno non compescatur , furor erit ,  
 at non divinus . Sed verborum fortas-  
 se plusquam satis : nemo enim eorum ,  
 qui me tam humaniter audiunt , pro  
 sua sapientia non videt , quam procul  
 ab oratoria , & poetica laude sit & qui præ-  
 ceptis tribuit omnia , & qui præ-  
 ceptis omnia denegat . Sed huc ego  
 universa oratione spectavi , ut timidis  
 quidem adolescentibus , quantum per  
 me liceret , adderem spiritus , eosque  
 ad efferendum extra angustos artis li-  
 mites fidenter ingenium excitarem ;  
 audentibus contra metum incuterem ,  
 & proposita disciplinæ Rhetoricæ na-  
 tura , intra terminos aliquos contine-  
 rem . Nihil enim ex una parte magis  
 miserum videri potest , quam se legi-  
 bus

bus ita obstringere , ut ingenio locus non sit , nihil ex altera magis lubricum , quam in litteris ita libere volitare , ut nihil sit reliquum diligentiae . Nimirum modus in rebus omnibus servandus est , cavendumque etiam hic , quod monet Philosophus , *μὴδὲ ἄγαν* . \* Quamquam hæc , quæ dicimus , non possunt adolescentes nostri negligere , si serio reputent , hac aurea mediocritate litteras floruisse semper , suumque decus mirifice propagasse ; non illis unquam patronos summos , non faustissimos auspices defuisse , neque unquam defore . Quod si placuit superis , ut tanto cum omnium nostrum , totiusque civitatis mœrore nobis Pastor optimus , Georgius Cornelius , dignitate æque , ac virtutibus Eminentissimus , eriperetur ; acerbissimam Cardinalis tanti jacturam , alterius Cardinalis , Joannis Francisci Barbadiçi in Ecclesiam Patavinam delectu , visi sunt leni-

\* *Ne quid nimis .*

lenivisse. Hic vero, Auditores, jure quodam suo videntur mihi Musæ nostræ lætiore renidere vultu, potioremq; sibi communis gaudii vindicare partem, cum cernant ad hæc sedes, tamquam in domum suam, venire Præfulem, qui non modo sanguinis propinquitate, sed & eximia vitæ laude Patruī sui, Venerabilis Viri imaginem referat, a quo se progenitas, se altas, se ad hanc magnitudinem eductas intelligant; se quidquid possunt, quidquid valent, ab illo unice habere; ac certo confidant, dummodo ipsæ sibi non desint, nihil ab hoc defuturum.



C

AR-

# ARGUMENTUM

## SECUNDÆ ORATIONIS.



*S*iquis quæreret , cur orationem ad studia nostra instauranda altero ab hinc anno a me primum habitam typis statim commiserim , nullam aliam fuisse causam responderem , quemadmodum supra innuimus , nisi ut Eminentissimo Principi nostro , qui ad Ecclesiam Patavinam regendam nuper delectus erat , observantiae , & cultus nostri argumentum publice præberem , neque etiam hac ratione , quæ sese mihi obtulerat , Patrono Optimo commendarem . Neque vero huc ego unquam progressus essem , nisi ii , a quo-

quorum nutu pendebar, & multi præterea prudentes homines me, ut id animose facerem, impulissent; non quod tam justum erga Mæccnatem spectatissimum officii munus renuerem, sed quod prælorum cupidissimus, tenuissimam præsertim lucubrationculam in lucem emitendo, videri nolebam, & ambitionis morbo, in hominum animos facile irrepente, statim laborare. Vicere tamen hæc omnia causæ, quæ ab illis sapientissime allatæ sunt, tantumque apud me honestatis ratio valuit, ut me mei pudoris, qui me tardum fortasse fecerat, pæniteret. Sed de præteritis satis; nunc reliquum est, ut in eo loco positus, ubi, qui me præcesserunt, hanc mihi viam exemplo suo aperuere, opus incæptum urgeam pro virili, & præclarissimum majorum institutum servem. Ego certe, ne transversum quidem unguem ab iis discedam, qui honesta monent, & honesta faciunt, & quemadmodum qui longius progreditur, omnem itineris ra-



tionem denique deprehendit, ita ego, si quid boni videro, in hac re litteraria nostra suscepta, in communem utilitatem conferam. Libuit autem inter cetera, quæ mihi pertractanda occurrebant, illud argumentum seligere, in quo non pauci sese oratores plebeculæ venditant, & per quædam adumbrata eloquentiæ signa bonis hominibus fucum faciunt. Cum enim tria, docente Tullio, in elocutione precipue spectentur, ut latine, ut plane, ut ornate dicas, illa duo, quæ facilia sunt, nonnulli consequi conati sunt, neque inanis iis conatus cessit: at tertium, quo omnis eloquentiæ virtus continetur, pauci admodum obtinere. Quoniam vero multi sunt, qui latine loquuntur, sed pauci, qui genuinam latinitatem possident, qualis in Tullio, & Cæsare fuit: hinc factum est, ut haberentur a populo oratores, qui nitidum, & Tullianum dicendi genus afferre possent. Sed hos quoque, industrios alioquin homines, non esse oratorum donandos nomi-

mi-

mine , hac oratione contendo ; siquidem hoc pacto in sua quisque lingua esset eloquentissimus , eo quod compositae , & eleganter loqueretur . At cur , inquiet aliquis , in tertia parte , quae ornatum orationis complectitur , & quae cordatorum hominum voce omnem dicendi virtutem complectitur , tam pauca verba ? Ob id ipsum nimirum , quod ornatus princeps eloquentiae virtus est , me non latius ad elocutionis vim explicandam excurrere aequum duxi , & alteram orationem instituire . Illud enim potissimum spectavi , ut opinionem quorundam , omnia in latinae linguae scientia collocantium , refutarem ; quod si fecissem , non erat admodum difficile Auditoribus , ubi eloquentia maxime contineretur , conjicere . Num id praestem , malo legentes judicare .

# O R A T I O S E C U N D A.

*Omnis eloquentiæ laus, & ingenii ad-  
miratio non in latine, & plane,  
sed in orate dicendo  
posita est.*



U<sup>i</sup> altero abhinc anno  
 in hanc primum ampli-  
 tudinis plenissimam lu-  
 cem proditurus, vehe-  
 menter animo commo-  
 vebar; tantum abest, ut superiore il-  
 lo periculo utcumque perfuncto, mi-  
 nus mihi formidolosus locus hic vi-  
 deatur, ut majore etiam, quam an-  
 tea, sentiam me metu concuti, gra-  
 viorisque discriminis objecta specie,  
 gravius quoque exanimari. Etsi enim  
 ne-

nemo est ad eloquentiam tam feliciter a natura comparatus, tam ab arte solerter excultus, qui, quoties coram acerrimi judicii viris dicere instituit, toties non trepidet, & expallescat; multæ mihi tamen ante oculos causæ tunc obversabantur, quibus formidinem, quæ animum occuparet, minuerem, & aliqua non infelicitis prorsus exitus fiducia, turbatum pectus componerem. Ipsa enim hominis novitas, qui in publicum procedebat, ipsa loci dignitas, quæ facundissimo cuique verecundiam semper offudit, ac cetera illa momenta maxima, quæ arduum dicendi munus comitari solent, ipsa per se ad benevolentiam Auditores impellebant, ut si forte hærerem alicubi, ac deficerem, veniam ultro mihi concederent, & si quæ afferrem, probare non possent, æquis saltem auribus tolerarent. Nunc vero ad hæc solemnia perfugia video mihi omnem prope aditum interclusum. Qui enim

iterum sese dat in conspectum , qui ora gravissimorum hominum rursus subit , tanto rigidiori sese exponit censuræ , quanto ad comitatem , facilitatemque fuere Auditores proniores . Neque hæc ego dico , quasi a cætu litteris omnibus politissimo , unde tanta existit humanitas , triste aliquod , & ominosum iudicium metuam . Sed tamen , siqua de dicente opinio non omnino sinistra excitata est , unde illa , & quo pacto orta sit , diligentius expenditur ; num dictio æquabilis ubique sit , num præteritæ respondeat , quam denuin in posterum de se spem faciat , severiore trutinâ examinatur . His omnibus incommodis illud postremum accedit , quod cum primum hanc lucem aspexi , alienam provinciam obire , & annuam proludendi rationem , quam prætermitti majores nostri nunquam voluere , cum vacua esset , occupare jubebar , ita ut non rigide admodum mecum actum iri  
 pu-

putarem , si quæ alii ad sui nominis propagationem non levia post se reliquere vestigia , ego pene tumultuarius orator consequi minime possem. Verum hodierna die , cum jure , ac rite in hunc oratorium pulverem descendam , & pro ea , quæ mihi imposita persona est , non meam modo , sed etiam totius hujusce rei litterariæ vicem sustinere debeam ; quam metuum est , ut ulla mihi ad ignoscendum via relinquatur , si officio , si loco , si temporis pro ea , qua par est , dignitate non satisfecero ? Quæ singula cum mente versarem , & citra omnem cupiditatem perpenderem , nescio cui fortunæ muneri tribuebam , quod me nec ab eruditione , nec ab usu satis paratum , vix vocem emitte-  
 tunc incipientem , obmutescere statim voluit , ingeniumque hoc publico aspectui ferendo impar , in privatam umbram revocavit . Et quidem jam satis superque meæ conscius in-

fir-

firmitatis , intra Scholæ latebras libenter conquievissem , nisi Principis Eminentissimi intervenisset auctoritas , cujus imperium ut Principis , & hujusmodi Principis non sequi solum , sed etiam revereri debeo ; cui quoniam egregiam indolem , dicendi ubertatem , & acumen mentis polliceri non possum , voluntatem , quæ mihi una reliqua est , summam , addictissimamque publice polliceor , annisurus vi omni , ut quæ mihi animi ornamenta defunt , in toto nostrorum studiorum cursu vigilantia , & sedulitate compensentur . Atque ut anno illo conati sumus ostendere , duabus præcipue de causis ab oratoriæ , & poeticæ laudis possessione adolescentes retardari , quod alii nimium præceptis adhærerent , alii vero a se penitus abdicarent , ita nunc aliud æque grave impedimentum remove constituiimus , ab iis maxime , qui omnem eloquentiæ vim latinæ linguæ scientia definiunt , eosque oratorum

rum nomen obtinere arbitrantur ; qui latine , & plane loquuntur . Accidit hoc ex pervagata passim nonnullorum voce , miris laudibus latinam dictionem , quæ pura sit , & perspicua , extollentium , peregrinam , & obscuram infra barbaras gentes amandantium . Itaque illi in concinnis vocibus deligendis , & sermonis elegantia ex optimis scriptoribus delibanda toti sunt ; interea vero ornatum , qui oratorem facit , & a ceteris distinguit , omnino negligunt . Ex quo fit , ut eorum oratio latina quidem sit , & aperta ; sed ita impexa , & incomta ; ut nulla facundiæ forma , nulla prope venustas appareat . Hanc ego præjudicatam opinionem hodierna luce evelle re aggredior , non ut adolescentibus latinitatis in dies magis acquirendæ curam minuam , sed ut majorem iis esse suscipiendam cogitationem ostendam , quod facient non gravate , si sibi persuaserint , omnem eloquentiæ lau-



laudem , & ingenii admirationem non in latine , & plane , sed in orate dicendo positam esse .

Tantæ sunt , tamque honorificæ , quæ ad latinæ linguæ dignitatem ubique gentium laudes congeruntur , ut in media luce cæcutire merito videar , si de pulcherrimo hoc , & honestatis refertissimo ornamento , in quibus inest , detrudere quippiam velim . Atque hæc quidem laus non iis solum tribuitur , qui multas , variasque tractantes litteras , munditiem , & elegantiam in scribendo sibi proposuerunt ; sed iis quoque impertitur , qui magis reconditum , & a vulgi sensu remotum scientiarum genus profitentes , locutionis tamen candorem , quantum rei , de qua agunt , natura patitur , non repudiarunt . Nullus philosophus est tam spinosus , qui si incorruptam latini sermonis integritatem in disserendo servet ; non patienti solum , sed etiam libenti animo audiatur ; nullus Theo-

lo-

logus tam abstrusus, qui dummodo superum mysteria nitida oratione ex altissimis sedibus ad nos deferat, frequentissima subsellia non circumspiciat; nullus denique tam tenuis notæ Auctor est, qui si suam ad genuinæ latinitatis normam dictionem castiget, a reliqua turba non eximatur. Quanto enim purior, & simplicitati propior oratio est, tanto nobis solet esse jucundior, neque quicquam est, quod teretes aures magis respuant, & aversentur, quam absfona locutio, incondita, & peregrina. Hinc, credo, factum est, ut qui primi, barbarie Italio solo tandem pulsa, in patrias oras exulem latinitatem revocarunt, eique squallorem, ac virus, quo misera contabuerat, detraxere, Poggii, Faccii, Philelphi, Barbari, Politiani incredibili cum voluptate tunc audirentur, & ad imitandum posteris etiam, veluti aureæ ætatis adumbrata exempla, proponerentur. Verumtamen quid demum

con-

conficimus , cum tot latinæ linguæ vindices , servatoresque in medium afferimus ? Quid cum illam , postquam græcarum litterarum studium a multis laborem refugientibus intermitteri cœptum est , supra ceteras floruisse affirmamus , & in remotissimis quoque regionibus , ubi mitiora ad cultum ingenia nacta est , in sinum statim receptam , ac magna animi contentione arreptam ? Quid , inquam , aliud efficimus , nisi purum , & candidum dicendi genus oratori inculcamus ? Si enim quilibet eniti debet , ut quam maxime fieri potest , emendate , & caste loquatur ; quanto magis oratori , qui in dicendi ratione , ut in sua provincia dominatur , erit verborum elegantia , ac splendor asciscendus ? Huc spectat <sup>(a)</sup> in Bruto Atticus , cum solum , & quasi fundamentum oratoris esse ait locutionem emendatam , & latinam ; huc Cæsar <sup>(b)</sup> in eodem Bruto , cum verborum

(a) *Cic. in Brut.* (b) *Cic. ibid.*

rum delectum originem esse eloquentiæ pronuntiat ; huc in tertio de Oratore<sup>(a)</sup> Crassus , cum latine loquendi usum oratori necessarium commendat ; qui tamen Crassus , cum de elocutione non tam præcepta adolescentibus Cottæ , & Sulpicio traderet , quam de præceptis ipsis judicaret , in duabus primis partibus , hoc est in latina , & plana locutione explicanda diu immorari supervacuum sibi esse existimavit , quod & facilis earum cognitio foret , neque ullam disertissimis viris famam conficeret . At facile , inquiet aliquis , facile Romæ fuit , in ipsa linguæ latinæ sede , aureo illo , ac vere beato sæculo , quo tot egregia oratorum , & poetarum ingenia ad ejus felicitatem conspirabant , facile fuit latine loqui ; ipsa enim lingua una cum Romano ci-  
ve quodammodo nascebatur , vixque nata ut adolesceret , & ad maturitatem suam perveniret , nutricibus , ver-  
nis ,

(a) Cic. de Oratore .

nis, pædagogis pueri statim committebantur, qui cum domi quotidie viverent, suæque sensa non alia, quam Romana lingua explicarent, teneros eorum animos nullo negotio patrio sermone imbuebant. Nunc autem, qui tam præclarum adipisci bonum cupit, ac vim latinitatis in succum, & sanguinem suum convertere, quot, quantique sudores fundendi sunt, quot audiendi præceptores, quot volumina diu, nocturne versanda? Quoties cum Lexicis, cum Interpretibus, cum Scriptoribus, cum Grammaticis, quoties tibi tecum luctandum est, antequam non dicam antiquam illam venustatem attingas, sed unius, aut alterius voculæ verum sensum assequaris? Ubi porro quis tam copiosam, tam multis difficultatibus circumseptam linguam addiscere pro virili conatus est, ubi navos homines de verborum, & nominum radice inter se acerrime digladiantes tandem aliquan-

do composuit , & tentare aliquid non infeliciter latine cœpit , nullam laudem adeptus esse censebitur ? At non ita , M. Crasse , sensisses , si ad hæc vixisses tempora , quibus latinæ litteræ externæ prope sunt , & alienæ : immo affirmasses , longe esse facilius orationem comere , suisque luminibus quasi colorare , quam e Scriptorum fontibus purissimos dicendi latices haurire . Quid ad hæc , Auditores , quæ tacite video mihi a multis objici ? Ajo & ego , nec dissimulo , fuisse olim florente Roma non magno parabiles opes illas , quæ ipsis quoque fœminis abunde patuerunt ; siquidem accepimus & Cornelias , & Licinias , & Lælias , & Mucias , ad Pacuvii , & Ennii elegantiam proxime accessisse , quod parentum , & domesticorum eloquentiam audiendo , integra ac solida loquendi suavitate tingerentur . Minime enim dubium est , quin nobis hac in re omnia salebrarum plena videantur , quod

D

nos

nos Itali , quemadmodum multæ aliæ Nationes & cœlo , & vitæ institutis a nobis longe sejunctæ faciunt , non assueſcamus , ſimul ac puerilis doctrinæ rudimenta percepimus , aliquid latine balbutire , mentisque cogitationes , quocumque modo poſſumus , expromere . Labor certe , & difficultas nobis minueretur , cum ad ætatem meliorem perducti , loqui , & ſcribere juberemur . Nolite tamen credere ab hoc diſcendi labore fuiſſe penitus Romanos liberos ; neque enim qui ad eloquentiam aſpirabant , eo orationis genere contenti erant , quod vulgo , & mulierculis commune eſſet ; ſed & optimos , & dicendi laude præſtantiſſimos ſibi ad imitandum proponebant ; audiebant quotidie optimos , & in veteribus tum poëtis , tum oratoribus legendis horas bene multas consumebant . Immo Cæſar, <sup>(a)</sup> qui libros etiam de Analogia ſcripſit , non patria tantum

(a) *Gellius lib. 1. cap. 10.*

tum consuetudine , sed multis , iisque reconditis litteris erat affectus , ut unus omnium oratorum latine loqui elegantissime putaretur . Atque hoc , nisi fallor , in caussa fuit , cur pulcrum esset latine scire , non quod ipsum latine loqui magnam aliquam laudem promeretur , sed quod plerique omnes , qui in foro , & judiciis versabantur , non quomodo dicerent , sed quid dicerent , cogitabant , ac propterea qui minus bene , & nitide loquebantur , si conferrentur cum ceteris hoc in genere accuratissimis , diligentiae , & studii laude caruerunt . Quæ sane cura eo magis erat adhibenda , quod domestica barbaries jam tum nitorem pristinum infuscare cœperat , & braccatæ , ac Transalpinæ nationes in urbem receptæ , simul cum moribus , ut fere fit , peregrinitatem quoque sermonis invexerant , quam evitare non poterant , nisi qui ad linguæ vernaculae usum litteras etiam addidissent , pro-



beque nossent , quæ voces Romanæ  
essent , quæ civitate donatæ ; quæ la-  
tinæ , quæ in latinorum colonias ascri-  
ptæ ; quæ plus , quæ minus haberent  
leporis , & ponderis ; uno verbo qui  
vocabulorum elegantiam , & virtutem  
undecumque possent , ante didicissent .  
Quod si Romani , in qua nati erant ,  
& alti , linguæ venustatem cognosce-  
re , & callere studuerunt , neque inter  
innumeros , qui huic arti se dedidere ,  
oratores habiti sunt , nisi qui ornare  
inventas res potuerunt ; quid nos pri-  
mis facundiæ parentibus comparamus ,  
qui pauculas periodos non inconcinne  
elucubrarunt ? Nolo quicquam dicere  
invidia dignum ; sed nimia quadam  
bonitate fit , ut simul ac latinum ho-  
minem sese aliquis & scriptis , & vo-  
ce prodidit , inter eloquentissimos sta-  
tim referatur . Non est mehercule satis  
ad decus tam splendidum obtinendum  
castigatissimas ad unguem afferre phra-  
ses , easque belle in oratione collocare ;  
non

non est satis verba omnia e Tullii penu depromere , & ad compositionem quamdam partium & condecenciam colligare ; si hæc ornatu carent , si carent amplificatione , ea rudes homines , ut solent omnia , quæ sibi videntur rara , mirabuntur , & laudibus cumulant ; sapientes autem , qui aliquid amplius ab oratore deposcunt , in quo omnis eloquentiæ vis continetur , diligentiam illam aliquando commendabunt , aliquando ut nimiam fortasse , & molestam reprehendent . Nam magnifica , non diffiteor , gravia , & apta vocabula deligenda sunt , quæ cum ipsis rebus nata , ipsarum naturam exprimant , & eloquentiæ majestatem exæquent . Sed quis pusillum ejus ingenium non appellet , qui anxietate quadam certas loquendi formas , quæ elegantiores videntur , hinc , & illinc decerpit , & ad orationem deinde , quasi unco impacto , traducit , in quibus adeo labor apparet , & cura , ut in to-

ta , quanta quanta est , verborum structura nihil aliud , nisi ut voces illæ non omnibus obviæ , veluti gemmulæ , ponerentur , spectasse videatur ? Ex hac curiosa diligentia alterum malum consequitur , quod hujusmodi hominibus , teste Fabio , <sup>(a)</sup> *nullus finis calumniandi est , & cum singulis pene syllabis commorandi , qui etiam cum optima sint reperta , quarunt aliquid , quod sit magis antiquum , remotum , inopinatum , nec intelligunt jacere sensus in oratione , in qua verba laudantur ,* Quod ille de latina scriptura , idem ego de etrusca dici posse puto . Licet enim id in adolescentibus animadvertere , qui si quando latinum scriptorem in Italum sermonem vertere jubentur , ad Lexica statim convolant , ibique trepidi , anhelantesque volvunt , revolvunt , miscent , turbant omnia , ut demum non pulcra , & usu recepta , sed horrida , & vetustate exesa verba extrahant , quæ orationi , ut ipsi putant , raritatem concii-

( a ) *Quintil. Instit. l. 8. proz.*

cilient , & in Auditoribus admirationem pariant; ut sanæ mentis viri iudicant, auctores ipsos ridiculos faciant, scriptionem autem deturpent, & obscurant. Quid enim oratori curandum magis, quam ut clare, ut dilucide, ut aperte loquatur? Cum enim oratio nuncia sit, & interpret eorum, quæ mente conduntur, tanto reliquis putatur quisque antecellere, quanto mundiore stylo sui animi sensû detegit. Auditorem habet ille populum indoctum, & rudem, cui nisi rem ponat ob oculos, & quid velit, & quid postulet, sine ambagibus, sine periodorum anfractu dicendo demonstret, nunquam ejus animum permovebit. Quamquam hæc perspicuitas & ad vulgus, & apud Judices, & in Senatu servanda est, suisque rebus male consulunt, qui brevitatem quandam affectantes, & religiose singula verba metientes, eo culpari pacto possunt, quo <sup>(a)</sup> illa anus Attica Theo-

D 4

phra-

(a) *Quintil. Inst. l. 8. c. 1.*

*phraſtum*, hominem alioquin diſertiſſimum, annotata unius affectatione verbi, *hospitem* dixit, nec alio ſe id deprehendiſſe interrogata reſpondit, quam quod nimirum *Attice* loqueretur. Eſt nimirum dicendi genus, quod etiamſi omnibus commune videatur, peculiarem tamen laudem ab eo, qui dicit, accipit; ſunt uſitata, ſunt propria, ſunt clara vocabula, quæ in nativa ſimplicitate gravitatem ſuam habent, & pulcritudinem, ſi tu, qui efferre debes, noveris opportune uti: quod ubi feceris, te latine, te plane loqui fatebimur; ſed orationem, niſi tertium illud addideris, quod proprium eloquentiæ eſt, & eloquentiam conſtituit, niſi ornate dixeris, nunquam oratorem appellabimus. Quid igitur iſtuc tandem eſt, quod a ceteris dicentem diſtinguit, & in præcipuo quodam lumine collocat? Quid iſtuc, quod apud omnes ſilentium, quod admirationem, quod plauſum excitat? quid eſt iſtuc ornate dicere, quod ſi in aliquo

quo reperiatur , in eum omnes stupore quodam percussi ora convertunt , divina virtute , & ingenio præditum putant , ac si dies totos audiant , nulla tamen molestia , nullo tædio occupantur ? Ille nobis orator est, <sup>(a)</sup> qui res distinguit , & explicat , qui illuminat , qui amplificat , qui easdem sæpe versat , in iisdem hæret , ibique commoratur , sed vario habitu , variis figuris , miris modis . Hoc est ornate dicere , ubi & copia sit , sed quæ satietatem non inducat , ubi sales , sed qui importuni non frigeant , ubi eruditio , sed quæ nimia non erescet , ubi affectus , sed qui in Auditore ipso nascantur . Hæ fuere artes validissimæ , quibus quondam Roma capta , cum Tullium pro Roscio , pro Cluentio perorantem audivit ; hæ aureæ catenæ , quibus universa Græcia devincta , cum Periclis , Demosthenis , Æschinis tonitrua exhorruit . Non illic verborum elegantia ,

(a) Cic. de Orat.

tia , non accurata , & perspicua dictio tantum valuit ; valuit dicendi genus forte , & commotum , valuit oratio , quæ ex omni parte causæ munita esset , quæ adversarium insequeretur , terreret , percelleret ; quæ aliquando torrentis instar ferretur , & universam secum concionem abriperet , aliquando placida , ac lenis commendaret reos , supplicaret Judicibus , eosque vel invitos cogeret sibi obtemperare. Quanta enim cum voluptate detinentur omnes , si dulcis , & melliflua percurrat oratio , si numerose cadat , si nusquam offendat ? Tolle rhythmum , qui nostris illabatur animis , eosque totos suavissime pervadit ; jam languent omnia , jam delumbia sunt , jam confragosa ; jam ille latinitatis minime fucatus nitor flaccescit. Sed hic quoque , ut in ceteris , suus modus est . Ut enim non exiguam meretur laudem , qui ad suavem quendam sonum orationem aptis intervallis distinguit ;  
ita

ita vituperatione non caret , qui plus , quam oportet , hanc vocum positionem affectat . En dicenti statim adempta fides , & averfus a caussa Judex , inani quadam lætitia gēstit , cum illi rotundi ambitus sese invicem convolvunt ; sese invicem petunt , & mirabili nexu inter se recurrentes , musicum quendam concentum faciunt , Quod vitium non ille vitare potuit , si fides <sup>(a)</sup> Dionysio Halicarnassensi habenda est , qui componendæ ad numerum orationis præcipuus auctor fuit , & præceptor , Isocrates , politissimum ingenium , & ad omnes orationis vneres , & lepores maxime factum , qui cum nimio quodam exornandæ facundiæ æstu se rapi sineret , in tumidum , inflatumque dicendi genus imprudens delapsus est . Sed hæc , qualis demum cumque fuit , loquendi ratio ferri potuit , donec Attico Cælo se se continuit . At postquam e Pyreæi finibus eloquentia sese

ex-

(a) *In Judicio de Isocrat.*



extulit , & omnes regiones , & insulas libera peragravit , tunc externis oblita moribus , ac fœdata , avitam salubritatem amisit , & a mascula virtute degeneravit . Hinc Mysia , Phrygia , Caria , omnesque Asiæ minoris plagæ , cum crederent omnem facundiæ vim verborum copia contineri , inanes voces , quasi complementa numerorum inculcarunt , ac tantum sollicitæ , ut multa dicerent , vano tantum sonitu , ac pene boatu miseram eloquentiam implere . Tunc illa & Isocratis dulcedinem , licet aliquibus nimio studio conquisita videretur , tunc Lysiæ elegantiam , tunc Æschinis granditatem , acumen Hyperidis , ac vim Demosthenis desideravit ; qui omnes cum dissimili inter se essent , in eo tamen ornatu , qui oratoris proprius est , convenientes , oratorum nomen merito obtinuerunt . Quæ enim alia caussa est , cur hic , qui græce , aut latine scribit , ille pariter , qui græca , aut latina scriptio-

ptione utitur , hic communi omnium consensu probetur , ille vero ab omnibus rejiciatur ? Immo ille ipse , qui easdem phrasas , easdem loquendi formas usurpavit , alius ab eo appareat , qui iisdem vestigiis institit , neque a Tullio , neque a Demosthene in verborum delectu discrepavit ? Non est igitur latina , non clara locutio , quæ hanc laudem pariat ; est color quidam oratorius , qui concipi mente potest , verbis exprimi fatis non potest ; sunt figurarum lumina , quæ opportuno sale confersa , & aculeis referta suis , admirabilem orationem faciunt ; est varietas , est copia illa , quæ si sapienter adhibeatur , non modo tædio non est , sed summæ etiam jucunditati , cum eadem variis ornata schematibus , variis distincta floribus , variis permixta affectibus , alia a se ipsa videantur . Quocirca , ut id quod initio diximus , concludamus , hæc potissima adolescentibus cura , & cogitatio suscipienda est ;

ut

ut quæ animo jam reperere , ac puro  
 stilo explicare designarunt , ornatu tan-  
 dem oratorio perficiant . Latina , &  
 candida dictio solum , & quasi funda-  
 mentum est , quo moles hæc excitari  
 debet , & exornari : illic omnis adhi-  
 benda diligentia , huc omnis ingénii  
 vis convertenda . Nihil illis deesse po-  
 test , si ad eum , propter quem huc e  
 remotis quoque regionibus convenere ,  
 finem contendere velint ; quotidie ma-  
 nibus Latini scriptores teruntur , un-  
 de omnis elegantia , & nitor crui po-  
 test , & ad optimam scriptionem parari ;  
 quotidie Livii , Nepotes , Sallustii , &  
 qui ad hanc rem consequendam ac-  
 commodatissimus citari unus maxime  
 poterat , Tullius quotidie explicatur ,  
 recitatur , ad imitandum proponitur ;  
 quem , si quantum uniuscujusque vires  
 patiuntur , habebunt ante oculos , ne-  
 que a se removebunt , nihil aliunde ad  
 germanam latinitatem , nihil ad soli-  
 dam facundiam poterit desiderari . Ex  
 quo

quo enim Sapientissimus ille vir, ac vere divinus, Venerabilis Gregorius Cardinalis Barbadicus munificentia plane sua, & præteritis anteferenda seculis, omnium honestissimarum artium, ac disciplinarum domicilium aperuit, ac linguæ latinæ purissimos huc fontes derivavit, tot nobis, ac tanta præsidia paterunt, ut nihil aliud superfit, nisi ut tantæ nos liberalitati respondeamus. Sunt latinæ, sunt Græcæ litteræ, quibus instructi ad aliquam eloquentiæ laudem nobis viam muniamus; & quod caput est, adest ille nobis, nos spectat ex æternis sedibus, ubi virtutum suarum præmio jamdiu fruitur; aderitque nobiliore titulo, cum Sacrosancta Romana Ecclesia, quod jampridem parit, tandem pariet. Atque hic da mihi veniam hanc, Cardinalis amplissime, Joannes Franciscæ Barbadice, ut omnium bonorum nomine tibi gratuler, quod summo Immortalis Numinis consilio factum sit, ut non solum cum locum

cum teneres , quem Patruus tuus omnibus ornamentis decoravit , verum etiam , quod nemini fortasse post hominum memoriam contigit , ejus Corpus recenti Summi Pontificis Decreto e tumultu eruendum , tuis ipse oculis intuereris . Recurret animo , *cum sacra illa pignora in decentiorem Sedem transferentur* , recurret animo heroica ejus virtus , qua omnia mortalia , & cædua semper contempsit ; recurret incredibilis animi excelsitas , quam cum humilitate , virtutum Christianarum splendidissima ; perpetuo conjunxit ; recurret morum suavitas , qua Episcopalem dignitatem verendam simul , & amabilem reddidit ; recurret etiam illa singularis benevolentia , qua litteras nostras , filiolas vere suas , pubescentes adhuc , & in aliquam spem crescentes complexus est , & dote auxit , quas cum Tu foveas præsidio tuo , & patrocinio sustentas , nihil ad tuæ felicitatis cumulum posse amplius accedere existimo .

AR-

## ARGUMENTUM

## TERTIÆ ORATIONIS.



Non dubito quin prudentissimi viri nostrum consilium probent, qui presentem orationem in ornatus indole explicanda potissimum occupemus. Etsi enim superiore non pauca attigimus, quæ ad Rhetoricæ ornamenta pertinebant; præcipuus tamen, quem spectavimus, is finis fuit, ut ostenderemus, non esse in oratorum album referendas, qui latine quidem, & eleganter loquerentur, sed ornatum illum negligerent, quo uno oratores a reliquis scriptoribus secernuntur. Multa de latini sermonis nitore dicere, multa de iis, qui au-

E                      rea

rea Ciceronis etate Roma loquebantur ,  
 attingere tunc licuit. Restat nunc , ut non  
 pauca de illa parte , in qua sese effert ,  
 ac triumphat eloquentia , de ornatu dica-  
 mus. Qua in re optimum dicendi magi-  
 strum Quintilianum sequimur , qui do-  
 cet , oratorium ornatum cum quodam ro-  
 bore , ac spiritu esse conjungendum , &  
 frustra in parandis floribus laborare , qui  
 non agrum , quem colit , letis quoque se-  
 getibus , & fœcundis olearum baccis lo-  
 cupletet. Hæc tamen saluberrima præcepta  
 plerique Rhetorum negligunt , neque sibi  
 in animum inducunt , ut credant , posse  
 simul sublimia , & pulcra , grævia , &  
 jucunda consistere : quasi vero qui gla-  
 dium aureo capulo insignem dstringit , ho-  
 stem ferire , & præstanti forma pugil ad-  
 versarium loco movere , aut in se irruen-  
 tem exigua corporis declinatione evitare  
 non possit. Itaque primum ostendo , quam  
 sit difficile , modum in ornanda oratione  
 servare , cum in proxima virtutibus vi-  
 tia facile prolabamur , ac verum reipsa  
 illud

illud esse experiamur, quod Horatius agebat, cum sui temporis poetâs sugillâret:

..... lætântem læviâ, nervi

Deficiunt, animique; profellus grandia, turget;

Serpit humi tutus nimium, timidusque procellæ.

Ex immodica, quâ multi flagrant, ornandi cupiditate; demonstro, quam absonas, & inconditas figuras, & translationes effundant; eoque tandem rem deducant; ut tanto pulcherrimarum rerum, quemadmodum appellant, apparatu; non modo Audientes non oblectent, sed etiam satietate; ac tedio afficiant. Ultimo loco eos laudo, qui in ornando sobrii sunt, neque nimia polendi cura lascivunt; sed hic quoque suus morbus est, qui tanto est perniciosior, quanto magis intempestivæ sedulitatis nomine tegitur. Nolumus homines in coloribus oratoriis inducendis intemperantes; nolumus eos omnia ornamenta in publicum proferre, quæ domi asservant; nolumus con-



tra tam parcos, ac jejunos, ut macie sterilecant. Si *M. Tullium*, ducem certissimum, ac veram orandi regulam pro virili imitari conentur, non dubito, quin illa vitia effugiant, quæ in hac oratione præsertim insectamur, quæque in causa sunt, cur vel tumidi, vel humiles appellentur.



ORA,

# ORATIO

## TERTIA.

*Non satis est ornate dicere, nisi  
ornatum vigor, ac robur  
consequatur.*



**S**I quantum e perspecta se-  
mel, & iterum doctissi-  
morum hominum in me  
audiendo humanitate,  
de timore mihi detra-  
ctum est, tantum huic ingenio ad in-  
ceptum iter naviter persequendum ac-  
cederet eloquentiæ; animo multo ala-  
criori hodierna die suggestum conscen-  
derem, & quam anno præterito, cum  
Rhetoricum ornatum paucis adumbra-  
remus, obligavi fidem, erecto nunc de-  
mum vultu liberarem. Verum in Ora-

toriae facultatis adyta propius inferenti pedem , & quantum imbecilla mentis permittit acies , in ejus indolem , & praestantiam intuenti ; tot , ac tanta undique obstacula occurrunt , ut omnis , qui paululum sese extulerat , mihi cadat animus , & spem prosperi cursus obortam , metus iterum importunus intercipiat . Nimirum pars illa Rhetoricae tractanda est , ubi omnia dicendi ornamenta , & quidquid venustatum , ac leporum usquam est , tanquam in suo regno , facundia explicat ; ubi gravitas orationis , & suavitas , rationum firmamenta , & facetiarum sales , lacertorum firmitas , & oris honesta conformatio , per varia tempora , & multiplices figuras temperata , mirabili inter se ratione conjunguntur . Quis autem est tam excellenti , ac divina sapientia , qui tam diversa , tam discrepantia , ac prope contraria munia felicissime obire possit ? Non desunt industrii homines , qui optima ad dicendum in-

inveniant , & commode etiam inventa disponant ; at qui foetus suos ita nitidos in lucem emittant , ut novitate placeant spectantibus , eorumque animos vi quadam insita moveant , sibi que subjiciant , non est ita facile invenire . Multi enim , dum suo nimium indulgent ingenio , & multitudini lenocinia , & pigmenta cupide conquiriti dum student , alii in turgidam , in mollem alii locutionem incauti labuntur : utrique interim probo illo carent sanguine , qui per singula membra sese diffundens , omnesque venas permeans , tantum unicuique parti tribuit , quantum ad vividum , ac sincerum eloquentiæ colorem satis est . Ecce vobis hodiernæ orationis tota ratio , ac summa : plerique eorum , qui dicunt , si qua virtute valent , & robore , vel immodica obruunt ornamentorum copia , vel dicendi humilitate debilitant , ita ut suavis quidem eorum oratio sit , comta , figurata , minime au-

tem fortis , ac virilis , quæ in Audientes influat , eosque vincat , qualem divinus Præceptor Quintilianus postulabat. Non satis ergo est ad perfectam eloquentiæ possessionem latine dicere ; non satis dicere dilucide ; neque vero ornate dicere satis est , nisi ornatum vigor quidam , ac robur consequatur. Quod ubi vobis exposuero , tunc illud ultimo loco efficiam , si adolescentibus in tam ancipiti discrimine versantibus peccandum est , minus malum esse , ea in parte peccare , quæ corrigi aliquando , quam quæ nullo amplius remedio sanari possit.

Ornatus naturam , qui non acri cogitatione excutiat , sed ejus tantum nomen e longinquo intueatur , credet profecto , ubi ne minima quidem difficultatis suspicio sit , nos de industria confingere , & in re omnino plana fallibras quæritare. Cum enim ille dicatur ornare , qui rebus ante sapienter excogitatis , & in suas veluti classes op-

por-

portune dispositis , postremam admo-  
 vet manum , & apto sententiarum ,  
 verborumque nexu suum quasi colo-  
 rem inducit ; non tanti negotii vide-  
 tur esse , ut molli propterea relicta culci-  
 ta , debeat integras vigilare noctes , &  
 a cibo sæpe , ac potu abstinere . Qui  
 enim labor tandem est , postquam so-  
 lida construendæ fabricæ jeceris funda-  
 menta , & ædes magnificas , quas  
 moliris , in peristylia , in atria , in  
 cubicula , & conclavia distribueris , sin-  
 gulas sensim expolire partes , & mar-  
 morea hic Polycleti , & Praxitelis fi-  
 gna , illic elegantissimas Apellis , &  
 Zeuxidos locare tabulas , omnemque  
 domum , qua conchyliatis peristroma-  
 tis , qua auro , qua argento varie ela-  
 borato exornare ? Ego vero , si quis  
 est tam navo ingenio præditus , qui  
 universam orationem lectissimis voci-  
 bus , ac figuris ita explicet , distinguat ,  
 augeat , illuminet , ut nihil usquam  
 dissonum sit , nihil asperum , nihil re-  
 dun-

dundans , nihil durum , tantam ei felicitatem ex animo gratulor , utque in suscepta provincia strenue perseveret , unde non exigua laudis merces sperari potest , vehementer hortor . At quotusquisque est , qui fervido excellendi in elocutione studio , ultra omnes leges se rapi non sinat , & quam mente conceperat , styli sublimitatem , non modo non assequatur , sed in spumofam , & latius exundantem dictionem deferatur ? Neque enim , ut in manufactis , satis est aliunde ornamenta colligere , & pro politissimorum hominum gustu parietibus interferere , etsi in his quoque non mediocri arte , & industria opus est ; sed splendida eloquentiæ lumina una cum ipsis rebus coalescere , ac pene innasce debent , ut omnis , qui inde existit , decor , & pulcritudo non adventitia , sed genuina videatur . Hoc est illud , quod in præsentia urgeo , & quod omnium puto difficillimum . Quemadmodum enim  
 vit-

virtus inter duo extrema ita media est; ut si in alterutrum defleat, virtutis nomen, & formam amittat, & sumptuosi dicantur, qui magnificentiae, audaces, qui fortitudinis modum præterierint, ita suis certis finibus oratorius ornatus circumscribitur, quos qui egrediuntur, in aliam naturam evadunt, & a recto eloquentiae itinere quam longissime abscedunt. Quam vero facile præscriptos terminos perumpimus, cum ipsa ornatus vitia virtutis habitum simulent, ac pro virtutibus passim venditentur? Nam cum ad Audientium animos alliciendos, eosque in admirationem erigendos, in id suas curas conferant oratores, ut quæ vulgaria, & ante pedes posita videri possunt, posthabentes, nova veniuntur, & peregrina, eaque cultu sermonis locupletissimo instruant; qui tumidam, ac superfluentem dicendi copiam affectant, putantur ferri in sublime, & decentibus figurarum flosculis



lis locutionem conspergere , qui delicatula , & effeminata blandiloquentia lasciviunt . Ea enim eloquentiæ conditio est , ut cum ceterarum artium professores ad suas disputationes audiendas eos tantum admittant , qui eorum , de quibus differunt , credantur satis periti ; debeant Oratores promissæ omnes recipere , suosque sensus populo expromere , qui cum dicentes non ex toto , sed ex quibusdam tantum partibus metiatur , palmam plerumque deteriori decernit , eumque putat ornatissimum , qui vitiis maxime emineat . Populum autem cum dico , leviter tintos eruditione homines intelligo , qui cum supra vulgus pauxillulum sapiant , reliquum agmen , quo placet , ducunt ; qui floridiora in picturis , falsas in cantu vocolas , in poculentis prædulcia avidissime sequuntur ; carnem , ossa , ac nervos , quibus totum orationis corpus componitur , suamque firmitatem , ac succum accipit , quia minime extant ,

tant , minime curant. Hinc immania illa verba ad feriendas plebeculæ aures temere conglobata ; illæ translationes tam inverecundæ , ut ipsas , credo , pudeat exire e latebris , & in lucem proferri ; illæ metalepses ex ultimis regionibus accersitæ , quas ut intelligas , infiniti tibi calles , ac prope mæandri obeundi sunt ; vastæ similitudines tam multiplices , ac discordi verborum congerie compactæ , ut facilius Pelion , & Ossa Olympo admoveas , quam rerum genera inter se penitus pugnantia conjungas . Non ego hic universim schemata , multo vero minus metaphoras exagito , quarum usum nemo unquam sanæ mentis negavit ; sed quemadmodum Alcidamas <sup>(a)</sup> ab Aristotele reprehendebatur , quod figuris , non ut sacramentis , sed ut cibus uteretur , ita non leviter mihi peccare videntur , qui illa ipsa , quæ sunt optima , vertunt in vitium , & præclara alioquin orationis

(a) *Rhet. lib. 3. tex. 67i*

his insignia nimia frequentia corrumpunt. Qua in re non infimi modo, sed primi etiam subfellii scriptores tum e Græcis, tum e Latinis graviter deliquerunt, neque alia de causa summus Philosophus Plato <sup>(a)</sup> inter poetas collocatur a multis, nisi quod cum grandem, & excelsum stylum meditaretur, majoremque verborum, quam rerum curam fulciperet, audacibus, poeticisque figmentis dialogos suos plus æquo coloravit. Est enim quando oporteat sine veneribus, & Gratiis veritatem nudam producere, & Auditorem simplici sermone docere; est & quando oporteat animos, & vires rebus addere graviore dicendi genere: at mediocria, & sua natura lenia ingenti figurarum apparatu exaggerare, perinde est, ac si tonantem Jovem, cælumque, ac terram nimbis, ac fulguribus permiscentem describas, cum ille, deposito jamdudum fulmine, nectar,

(a) Cic. in Orator.

Æar , & ambrosiam Juventa ministran-  
 te , una cum Cœlicolis hilari , læta-  
 que fronte mensæ dulcissimæ accumbit .  
 Nunquam enim fieri potest , ut ad na-  
 turam proxime accedant , ut moveant ,  
 ut flectant , qui ejusmodi monstra con-  
 fingunt , cum alii tragædias in nugis  
 agant , alii in orationis mollitudine ,  
 & lævitate , tanquam inter violas , & li-  
 lia versentur . Nempe e præceptorum  
 monitis , qui audiunt , oblectandi sunt ,  
 neque Tullius in Judicum animos ob-  
 repressisset , nisi suas eloquentiæ blandi-  
 tias , deliciasque miscuisset . Quid tibi  
 aliud expectandum est , nisi ut elegan-  
 tissimi homines te in Hesperidum , &  
 Alcinoi hortos deducant , & variis un-  
 dique collectis floribus sinum impleant ?  
 Nihil hic turgidi metuas , nihil aspe-  
 ri ; ver hic perpetuum est , ubi oculos  
 rerum varietate pascas , & aures defes-  
 sas dulci periodorum concentu reficias .  
 Erit qui tibi *viola pallorem* , qui *ri-vuli*  
 e rupe decurrentis murmur , *saxuli per*  
 fum-

summas undas jacti reciprocos flexus ad vivum exprimat, & in his omnes industriæ nervos exerat. Erit etiam qui montes, qui nemora, qui flumina inter se colloquentia de rebus maximis ita introducat, ut quæ nunquam Senatus Romanus in Curia, illa sensus expertia uno momento, temporis efficiant. Similia his habentur in Sextiana, cum infandæ civium cædes a Clodianis in foro factæ, cum Reipub. funestus status ob oculos ponitur, cum superciliosus Piso, calamistratus Gabinius in concionem producuntur. Quid quod in eadem Sextiana Orator, relicto reo, ad comitia, ad leges, & ludos digreditur, multa de optimatibus, multa de popularibus verba facit, *ut omni ex genere eum orationem aucupari, & omnes undique flosculos carpere, ac delibare dicas?* Jam vero in Catilinam præter omnium expectationem Roma ipsa repente surgit, & impendentium malorum metu excitata,

tata , in nefarii sceleris principem tam acriter invehitur , præsentemque deterret , ut noctu cogat ex Urbe profugere . In Cœliana Appius Cæcus evocatur e tumultu , ut gravitate censoria Clodiæ suæ gentis feminæ , ab avito splendore degeneranti , nimiam vivendi licentiam objiciat , & a dissolutis moribus ad bonam frugem , si fieri possit , convertat . Enimvero Tullii hypotyposes , digressionesque cum vestris scitis descriptiunculis nullo modo sunt comparandæ ; vobis ille hanc laudem ultro concedit , ac vestram esse totam fatetur : non novit ille in judicio capitis *aureas comas* , aut *purpureas vultus rosas* exquisito Poetarum penicillo depingere ; & sexcenta synonyma per lepidas definitiones , & adjuncta coacervare , fateor ; non novit . Maluit Romanos populares suos e rostris jejunos , sitientesque , quam immensæ hujus voluptatis plenos dimittere . Quid illa pulcherri-

F                      ma

μα \* ἀντίθετα, ἰσάκωλα, πᾶρισα, ὁμοιο-  
κατάληκτα tanto cum Græciæ plausu a  
Gorgia Leontino in eloquentiam quon-  
dam invec̃ta, ut dies, quibus apud po-  
pulum diceret \* ἑορταί; ejus autem ora-  
tiones \* λαμπάδες vocarentur? Viden', ut  
omnis concio rei novitate hæreat mira-  
bunda, ut trepido pectore, ut ore hianti  
singulos verborum lusus excipiat? Quam  
belle permulcent aures, casus, & exi-  
tus similitudine; vocabula prope co-  
gnata, diversos tamen, & argutos  
sensus complectentia? *Multis calamitas  
calamitates peperit. Plerique, ut famam  
acquirant, fame pereunt. Lyco saepe, Ly-  
coo rarius, delectaris. Pulcrum est ama-  
ri, si cures nequid insit amari. Papæ!  
Mel istuc Hybleum est; immo ipsi-  
suma Suadela dulcitus. Hic per arvia  
perfuge arves perfugium nocte ingenito  
ingemo ignotas notas concinne concinunt.*  
(\*) Pulcre, bene, recte, clamabit, palle-

\* *Contraposta, comparia, similia, similem vocis  
sonum complectentia.* \* *Dies festi.* \* *Lumina.*

(a) Horat. de Arte Poet.

*scet super his, etiam stillabit amicis ex oculis rorem, si ad hæc festiva schemata audienda semidoctorum turba conveniat; cordatissimi autem viri, qui cincinnos severa, & honesta matrona indignos putant, vel suavissime interea ridebunt, vel miseram eloquentiæ deslebunt vicem, quod a nugigerulis hisce cerdonibus cogatur histrionicam facere, ac tanto cum suo dedecore ineptire. Ita ne facundiæ majestatem cum sustinere verborum, & rerum pondere maxime debeas, te calamistris fœdare, & per levia, nulliusque frugis propositum oratori finem invertere? Ita ne cum Auditorum animis faces sunt admovendæ, cum pudor, cum dolor, cum metus injiciendi, te ad jocos, & facetias confugere, & inanem multitudinis clamorem a vocum cognatione captare? Non equidem inficias eo, in epidiæico genere, quod ad Audientium potissimum voluptatem instituitur, de forensi contentione remitti so-*



lere multum , & omnigena prope ornamenta jure suo in publicum prodire : si Tullium tamen in hac arte principem , si ceteros Oratores consulimus ; sobrie admodum , nec sine aliquo sale ad hæc \*ὁμοιοτέλευτα devenere . In familiari amicorum consuetudine , in fabulosis , jocosisque sermonibus , cum servos irridere velis , minusque cati hominibus per ænigmata os sublinere , ut lubet , quantum lubet , sino , ludas , ac si tanta litis est , ad Plautum etiam duco , harum jucundissimarum nugarum fontem fortasse ad fastidium usque fecundissimum , At rebus gravissimis , omnemque dicentis prudentiam , & robur postulantibus , figuras tam ineptas identidem obtrudere , & maximam Orationis partem ita jocando consumere , puerilis quidem certe indolis est , ne dicam insipientis . Verum Apollini , Musisque omnibus libemus pateras , earumque aras croco ,  
& flo.

♦ *Similes exisus habentia.*

& floribus aspergamus , quod virulenta scabies , quæ proxime elapso seculo per Italiæ fines grassata fuerat , & vivida etiam ingenia soli contagione non-nihil attigerat , dissipata tandem sit , & pristina eloquentiæ sanitas restituta , ac tam nitida , tam sincera , & incorrupta in multis revirescat elocutio , ut videantur illa mihi tempora rediisse , quæ Bembo , Palearios , Sadoletos , Manutios , Muretosque complexa , felicissimam Augusti ætatem non obscure nobis retulere . Non amplius in paronomasiis , & commutationibus inculcandis , in contrapositionis , & quadragenis translationibus uno spiritu effundendis nostri homines occupantur ; est figurarum usus , at opportunus ; est dicendi suavitas , at non dulcis , & decocta ; est ornatus , at fortis , & virilis est : phaleras , ampullas , sesquipedalia verba in eas regiones abegere , quæ fūco , & vento pascuntur . Illud unum tantum in quibusdam magnepe-

re vereor , ne dum nimis anxie medium , quod certe est optimum , conantur complecti , & a vitiis insignibus sibi vehementissime cavent , in id , quod minime prævident , humilitatis , & languoris vitium incidant . Sunt enim nonnulli ab eximia naturæ , & animi celeritate ad sententias magnificas concipiendas , easque figurarum splendore illustrandas mirifice facti ; sed hi partim pudore quodam suo , partim tristitum censorum metu ( ut omnis Rhetorum natio submorosa est , & feverior ) ita pretiosissimam suppellectilem domi recondunt , ut in apertum nunquam educant , & partus ingenio similes enitantur . Neque vero , ita me ament Superi , ad eloquentiæ commendationem unquam emergent , nisi verecundiam aliquando intempestivam a se removeant , eosque sibi scrupulos evelli patiantur , qui in caussa præsertim sunt , cur reptent humi , & inter vulgares censeantur . Nihil est , si eorum



niuntur undique, & ab omni tumoris, & lasciviæ suspicione, aliquid subtrahendo, limando, poliendo sepiuntur, non possunt non maciem aliquam præferre. Videó non omnia esse ab omnibus postulanda; pro suis unusquisque viribus, pro argumenti, de quo disputandum est, varietate, pro ducis, quem sequendum delegimus, virtute, ita ferre orationem fingimus, flectimus, figuramus; alii aliis sublimiores sunt, alii aliis politiores, quos tamen in suo quemque genere probare merito debes, & propter excellentem animi alacritatem, qua ad summum fastigium contendunt, etiam commendare. At difficile iis laudis partem aliquam communicamus, qui præcipites lapsus metuunt, si quando e nido pennas altius extulerint. Piaculum est apud illos, si cum in eadem causa versentur, eadem dicere videri possint; sententiæ, quæ poeticum quiddam redoleant, & tantillum luxurient, omnino exulant;

le-

lepores , & urbanitates , quod frigida  
 plerumque sint , & rideantur , rarissi-  
 mæ sunt ; nullæ illic superlationes ,  
 quæ hominum fidei repugnant , tropi  
 nulli , qui non acerrimum Criticorum  
 iudicium ante subjerint . Modestus e-  
 nim , ajunt , & verbis , & sententiis ,  
 & figuris ubique Tullius , quem imi-  
 tamur . Maçi animis , viri , tam egre-  
 gio antesignano præeunte , certa vobis  
 parata victoria est . Quid si ego in Tul-  
 lio interdum reperio , quæ si vos repe-  
 riatis in aliis , cœlum , & maria mi-  
 sceatis ? Quid si ejus omnes orationes  
 amplificatione constant , hoc est ea par-  
 te , quam vos tanta cum religione tra-  
 ctatis ? Atque ut ceteras omittamus ,  
 quæ venustas , quæ vis , quæ pulcritu-  
 do Milonianæ , divinæ illi orationi , si  
 semel tantum Milonis innocentiam ,  
 Clodii improbitatem percurrisset orator ,  
 neque in iisdem rebus sæpe , ac sæpius  
 per varias figuras esset immoratus ? An  
 non prope totam eloquentiam exhau-  
 sit ,

fit, cum easdem personas; eosdemque  
 eventus relegens, in omnes motus,  
 dicendique formas orationem effinxit,  
 modo per exempla, modo per effectus,  
 modo per ea, quæ antecedunt, quæ  
 consequuntur, rem ita auxit, ut Rei-  
 publicæ, delubris deorum, totique  
 Italiæ illata ab immani monstro mala  
 nova semper videatur proferre? Quid  
 audaciores sententias memorem? Il-  
 lam ne in Pisonem? *In quo convivio*  
*ne tum quidem, cum illum suum salta-*  
*torium versaret orbem, fortune rotam*  
*pertimescebat.* An illam in Verrem?  
*Negabat, inquit, mirandum esse, jus*  
*tam nequam esse Verrinum.* An illam  
 pro M. Cælio? *Existat igitur ex hac*  
*ipsa familia aliquis, ac potissimum Cæcus*  
*ille; Minimum enim dolorem capiet, qui*  
*istam non videbit.* Quid hyperbolem  
 in oratione pro Sextio de Pifone? *Tan-*  
*ta erat gravitas in oculo, tanta frontis*  
*contractio, ut illo supercilio Respub. tan-*  
*quam Atlante Cælum, niti videretur.*  
 Ad-

Adde translationes : *Querebam* , utrum panderem vela orationis statim ; an eam ante paululum dialecticorum remis propellerem . *Experiamur* ; si possumus , cornua commovere disputationis tue . *Ur-  
bem* , mihi crede , *Philosophia* proditis , dum castella defenditis . Adde & illa : *Tempus hoc mutum est a litteris* . *Hyems senescit* . *Rumor raucus est* . Ita ne Tullius ? Ita ille , cuius fraterculos vos in vulgus jactatis . Neque librariorum incuria est , in quos licet immerentes , si forte fortuna ad non provisos locos deferamini , culpam statim confertis . *Præclare tecum agitur* , M. Tulli , qui perpetuo omnium ætatum consensu veræ eloquentiæ exemplar habitus , sine ulla controversia inter Oratores principatum obtines ; parum enim absit , quin rigidi oratoriæ modestiæ custodes te in ordinem redigant , & aqua , & igni , ut olim contigit , interdican . Ne credas tamen te impune ex istorum manibus elapsurum . Quæ singularia , in-  
qui,



quiunt , in Tullio , & a communi lo-  
quendi consuetudine abhorrentia occur-  
runt , digna sunt , quæ diligenter ani-  
madvertas : non continuo , quæ casu ,  
aut necessitate ei exciderunt , tibi sunt  
imitanda ; suos & ipse , sicut ceteri , næ-  
vos habet , concertationis impetu ab-  
reptus , suisque pene manibus agita-  
tus , multa effudit , quæ si excitetur  
ab inferis , transverso calamo deleat ,  
& his meliora reponat . Mirum , ni e  
gurgustio aliquo etiam Rufus<sup>(a)</sup> exeat ,  
*Rufus , qui toties Ciceronem Allobroga  
dixit* . Quid enim restat aliud , nisi ,  
ut mutata repente facie , in Rhetorico  
ludo Grammatids agent , & Romano  
homini verba impropria , barbara ,  
•σόλοια objiciant ? Videtis , Auditores ,  
quam absurda , ut metum suum hu-  
jusmodi homines honesto aliquo titulo  
prætexant , proferre cogantur . Quæ  
omnia si concedimus , jam , per me li-  
cet , eloquentiæ , donec de ejus libertate

ve-

(a) *Juvenal. Sat. VII.*    \* *Solacismus.*

vestro quoque suffragio constet, vindicias secundum servitutem decernite : At si vos nutu , & admurmuratione ipsa significatis , aliud esse insulsis figuris orationem universam refarcire , aliud erigi , attolli , atque adeo effervesce ; aliud esse cautum ; aliud superstitiosum , cur non ego id efficiam , quod initio proposui ; meliorem esse multo conditione , qui felicissime in dicendo assurgat , licet interdum non rectum iter teneat , quam qui pede incedat inoffenso , nunquam tamen se se efferat ? Nolim equidem adolescentibus majores , quam par est , animos addere , cum plerique sponte sua grandia , & sublimia meditentur ; sed certe illa vitia , quæ virtuti propiora sunt , & futuræ suo tempore plenæ messis non dubia signa , feram non gravate ; humilitatem vero , qui in reliquis ætates perniciosissimus morbus est , neque ulla tunc ratione depellendus , non lubenti animo feram , Scribant illi multa ,  
ctsi

etſi immatura , & indigeſta , non omnino improbabo : fucata aliquando , turgida , redundantia afferant , non reprehendam : orationem tropis , figuris , translationibus non ſolum ornent , ſed etiam onerent , non rejiciam . Hac via ad ſummum faſtigium , quod merito occupant , Oratores , & Poetæ pervenerunt . Luxuriantem ſtylum , & turgſcentem diſtinctionem judicio , & temporis diuturnitate coercuerunt . Ita juventuti noſtræ poſſe aliquando contingere , ſi urgeat diligentia , & contentione inceptum opus , ſpondeo , ſanctæque recipio : neque alia , Auditores , veſtra opinio eſt , qui cum de adoleſcentibus præſertim agitur , longe glorioſius iis eſſe arbitramini , ſi cadendum eſt , e cœlo cadere , quam humi ſemper jacere .

AR-

## ARGUMENTUM

## QUARTÆ ORATIONIS.



*D*u multumque quarendum mihi non fuit, quid potissimum huic orationi præfacer. Cum enim antea de tribus elocutionis partibus egerimus, quæ oratori ad dicendum sunt prorsus necessarie, hoc est, ut latinam, perspicuam, & ornatam orationem afferat, postrema supererat, ut quantum intersit apte dicere, & congruenter, explicaremus. Quem quidem locum latissime patentem paucissimis verbis in libris de oratore Tullius complexus est, cum dicendi unum, idemque genus negavit omni causæ, auditori, ac tempori convenire.

nire. In libro autem, quem ad M. Brutum oratorem instituit, suam sententiam copiosius explicat, quamvis eo tandem deveniat, ut affirmet, omnem hanc de decoro cognitionem a sapientia pendere. Itaque Quintilianus, qui non cum disertissimis viris colloquebatur, quemadmodum Tullius, sed tyrones suae fidei traditos ad eloquentiam quasi manu ducebat, peculiarem de hac re disputationem induxit, putavitque, totum hoc, apte dicere, non elocutionis tantum genere constare, sed esse cum inventione commune. Si enim in scribendo non solum verba, sed etiam res ipsae diligenter examinandae sunt, studioseque videndum, num Auditoribus, loco, tempori, & oratori optime respondeant; profecto hac obtineri non possunt, nisi quis ante eos fontes adierit, unde ad probandum argumenta opportuna, vocesque a rebus non alienae desumuntur. Quemadmodum igitur praeterita oratione, cum de ornatu ageremus, ab adolescentibus ingenium  
uber.

uberrimum deposcebamus , ita nunc ab  
iisdem de decoro differentes iudicium ad-  
hiberi volumus . Ille enim , Fabio te-  
ste , demum apte dicere creditur , qui  
non solum quid expediat , sed etiam  
quid deceat , inspexerit . Cumque hæc  
conjuncta fere inter se sint , non potest  
utilitatem ab eo , quod decet , sejungere .  
De Historicis , & Poetis video multo  
plura dici potuisse ; sed longius excurrere  
præsertim in argumento tam amplo vi-  
sum est ejus , qui velit , quocumque mo-  
do possit , & unde unde , pagellas im-  
plere . Hæc enim ipsa , quæ dicimus ,  
morosis præsertim , & curta postulanti-  
bus , sunt nimis fortasse multa .



G

ORA-

# O R A T I O

## Q U A R T A.

*Habenda decori cura.*



Præstantissimum illum totius antiquitatis in agendo artificem Roscium ferunt, cum ab eo quæreretur, qua tandem arte ad tantam scenicæ venustatis laudem pervenisset, ut qui in aliquo excelleret artificio, specioso Roscii nomine donaretur, nulla alia se id esse affecutum ratione respondisse, nisi quod rerum, ac personarum naturam, quam proxime fieri posset, imitaretur: caput enim artis esse, decere. Præclarissima sane vox, & digna, quæ ab honestiore viro, quam ab histrione emit-  
tere-

teretur . Sed ille tamen suæ facultatis longe scientissimus , & vel clarissimis aureæ ætatis oratoribus ad imitandum in actione propositus , optime intelligebat , quæ in se summa essent , & ad hominum commendationem unice facta , gestus concinnitatem , mollem , ac flexibilem vocem , motumque corporis , quocunque se verteret , non indecorum , ab attenta ejus , quam exprimebat , fabulæ animadversione profluxisse . Id enim consequabatur , ut cum omnem , quam erat repræsentaturus , Comædiam domi mentis oculis perlustraret , eventusque in ea singulos , vicesque rerum varias evolveret , in ora deinde hominum productus , non modo nihil vitii in pronunciando admitteret , sed congrue , & eleganter partes peragendo suas , incredibili voluptate spectatores perfunderet . Quæ insignes corporis virtutes adeo illum extulere , ut ad ejus similitudinem oratoriam laudem Crassus dirigeret , cæ-



dem cum animi virtutibus in oratore  
 conjunctæ , in primis subselliis dicen-  
 tem collocant, si, quæ ad eloquendum  
 comparavit, apte dixerit, & congruen-  
 ter. Sint enim licet lectissima verba,  
 & e purissimis latinitatis hausta fonti-  
 bus, sint graves licet, sublimesque,  
 quibus tanquam flosculis conspergitur  
 oratio, sententiæ, periodi sint affabre,  
 industrieque confectæ; si alieno loco,  
 ac tempore ponantur, idem faciunt,  
 ac pretiosissimæ gemmæ crassis contex-  
 tæ vestibibus, quæ suum ipsæ lumen  
 statim amittunt, & rerum vilitatem  
 suo ipsæ splendore magis patefaciunt.  
 Habenda videlicet multarum rerum  
 ratio est oratori; habenda loci, habenda  
 temporis, personarum, apud quas  
 dicit, habenda ratio: cum sæpissime  
 contingat, ut quæ primo aspectu ad  
 suavitatem, gravitatemque orationis  
 elaborata ornamenta videbantur, posita  
 mox ante oculos, & paululum excus-  
 sâ, inania, & ridicula pigmenta re-  
 pe-

periantur. Sentio me in difficili, ac salebroso hodierna luce argumento versari, quod non oratores solum, sed etiam poetas, historicos, & quicumque demum stylum aliquo modo exercueret, complectitur, cum mihi prudentia, quanta in juvenilem ætatem cadere potest; nostris adolescentibus præcipienda sit; quæ virtus in ipsis confirmatæ doctrinæ viris interdum requiritur, verbisque solemnibus edicendum, ne tantum ingenio in scribendo obsequantur suo, ut nullus, aut exiguus iudicio locus relinquatur. Non desistam tamen hujusce muneris; ut hanc quoque elocutionis partem persequamur, quemadmodum privatim facimus; illos publice etiam commonefacere, neque dubito, quin dictis obtemperaturi sint; postquam illis ostendero, ut in vita quid deceat, ita in oratione, quid aptum sit; quid absconum, videre, rem esse difficillimam, tantoque majorem habendam decori curam esse,

quanto pauciorum est, hæc omnia exequi citra culpam omnem.

Si philosophos, non illos quidem severos, ac tristes, sed paulo elegantiores, humanioresque consulimus, ubi de officiis inter se disputant, & ad vitam liberaliter transigendam satis commoda præcepta tradunt; nihil in civili communitate versantibus frequentius, acriusque inculcant, quam ut diligentissime, quid in re unaquaque deceat, dedeateve, animadvertentes, mores, sensusque suos ad saniorum opinionem, consuetudinemque componant. Neque vero Rhetores, cum ad hujusce partis tractationem devenere, in præcipiendo parcifunt, aut de oratoris gloria minus solliciti; imo rei, quæ in disputationem venit, difficultate mature perspecta, identidem dicturum monent, ut in omni causarum genere sedulus decori custos, orationem suam ita ducat, ac flectat, ut neque res amplissimæ sub-

subtili , neque admodum tenues gravi stylo efferantur . Ac philosophorum documenta cum innuo , nolim quicquam vestrum existimet , me eorum pulcherrima , qui de universa , de singulari natura , de honesto , & utili disceptant , spatia velle percurrere , eorumque definitiones , divisionesque ceteroquin acutissimas in medium proferre . Etsi enim ejus decori cognitio , de quo ab illis plurima differuntur in scholis , non parum valet ad id , quod quærimus , efficiendum , cum morum institutionem similis plerumque oratio consequatur ; mihi tamen hac in re moderabor , ne videar ipso statim initio philosophari extra locum , & ab eo , quod dicenti tantopere esse necessarium contendo , decoro abscedere . Attamen si rudi , ut ajunt , minervam libet describere , & ad oratoris deinde provinciam traducere , id quemque maxime decere dicimus , quod est cujusque ita suum , ut si ad alterum

transferatur, pristinam formam deponat, & absurdam omnino speciem induat. Atque hoc ipsum, quod decet, cum certis temporis, loci, ætatis definiatur terminis, & arctissimo quasi necessitudinis vinculo colligetur, tam est arduum ad unguem servare, quam solius sapientis est, civium affectus ferme sibi contrarios sine ullo seditionis intestinæ metu simul conjungere. Quis enim in hac communi societate, in qua omnes una vivimus, alius alium quotidie respicimus, colloquimur, cogitationesque etiam reconditas invicem communicamus, sibi constare, ac vere sapere putatur? qui ita cum singulis, cum universis sese gerit, ut nulla vitæ pars a primo illo, quod ad honestatis normam instituit, genere dissentiat, aut si quid etiam dissentit, ut fieri aliquando necesse est in hac humana imbecillitate, & perexigua casuum singulorum cognitione, non tamen temperatam ad exultæ virtutis æqua-

æquabilitatem harmoniam dissolvat ;  
 qui in jocosis leporem non scurrilem ,  
 in seriis severitatem non austeram , in  
 lætis hilaritatem non exuberantem præ-  
 ferat . Est hoc excelsi , felicitis , ac di-  
 vini cujusdam ingenii , ita naturam  
 tuam conformare , ut si non proberis  
 omnibus , saltem non displiceas , ubi  
 varix , mutabilesque hominum sen-  
 tentiæ sunt , diversa studia , instituta  
 inter se discrepantia : multum enim re-  
 fert , si locuturus sis , non solum quid  
 loquaris , sed apud quos , quare , &  
 quatenus loquaris ; ut ipsa quoque vir-  
 tus , quæ neminem unquam tam fe-  
 rum reperit , quem suo dulcissimo aspe-  
 ctu in sui amorem non pellexerit , si  
 tamen nobis aliud animo volentibus  
 superveniat , importuna , & molesta  
 futura sit . Est enim suus gravitati ,  
 suus est comitati locus ; est ubi deceat  
 multiplici litteratura sermonem per-  
 spargere , neque invitos , qui ad dici  
 horas honeste fallendas tibi assident ,  
 in

in græcis , latinisque delibandis aliquandiu detinere ; est ubi etiam tua isthæc eruditio , multo collecta sudore , peregrina licet , & frugifera , sordeat , ac frigeat ; est quando mollissimis humanitatis officiis , quæ multa vel in minimis profiteri plerique iccirco solent , quod non magno impendio constent , de te bene meriti devincias animum ; sed si hæc ipsa notis recinas , vel nimium urgeas , non secus ac ille Terentianus Ctesipho a fratre Æschino , ut ineptus , & invenustus repelleris . Quod si viris longo rerum usu , alienisque exemplis ad actiones suas apte dirigendas condoceris nihil difficilius visum est , quam quid congruum in vita sit , quid incongruum , cognoscere ; quæ mentis ad ea omnia , quæ possunt in oratione contingere , provisio , quæ ad bona , & noxia discernenda sagacitas , quæ ad universa causarum genera cum laude pertractanda solertia erit oratori necessaria , in  
quem

quem unum intuentur , quotquot convenere audituri , cuius verba attente excipiunt , cuius vocem , gestum , orisque habitum , num ad argumenti rationem recte revocetur , curiosissime expendunt ? <sup>(a)</sup> Cum enim , docente Aristotele , tria sint , quibus orationis decorum continetur , animi affectus , mores hominis , & res subjectæ , quorum primum ad eos , qui audiunt , alterum ad oratorem , tertium ad controversiam , de qua agitur , pertineat ; difficile admodum est hæc ita copulare , ut uno eodemque tempore ad questionem propositam rite referantur omnia , & ingenii fecunditas se se latissime extendere connitens , intra fines certos cohibeatur . Ita enim a natura facti sumus , & instituti , ut nisi plane bardi simus , & plumbei , qua maxime re videmur nobis excellere , sive oratoriam , sive poeticam , sive quippiam aliud liberali homine dignum cogi-

( a ) *Rhetor. lib. 3. cap. 13. text. 121.*



gitemus, omnem animi, corporisque contentionem illuc conferamus, promamusque extra nos quidquid pulcri est, & præclari, neque quicquam patiamur præterire, quod ad nominis propagationem aliquo modo prodesse possit. Hanc porro naturæ proclivitatem ferentem hominem ad sublimia, neque finentem in tanta bonarum artium celebritate, & acutissimis ad gloriam stimulis, obscurum, ac torpidum delitescere, non modo ars non prohibet, sed excitat, & inflamat præceptis suis, quin etiam negligentem si quem invenit, aut cunctantem increpat, edicitque voce clara, neminem unquam inter eruditos locum obtinuisse, qui non admirabile quiddam in sua quisque facultate protulerit. Sed hæc ipsa tamen ars non tantum sibi arrogat, ut a natura, quæ optima magistra est, prorsus deflectat; sequitur hæc ubique matrem suam, nosque, ut sequamur, hortatur, sed ita, ut quæ in illa rudia sunt,

sunt , quæ abjecta ; quæ vulgaria , adhibitis opportune instrumentis , perficiamus alia disciplinæ accessione , alia extollamus verborum nobilitate , alia constanti , ac forti stylo sustentemus . Quam vero arduum est & naturam sequi ducem , & artem in præcipuam operis partem ascitam adeo moderari , ut non una ab alterius ornamentis obruatur , sed magis , magisque polietur ? Fervida enim in eo , qui ad scribendum accedit , ingenii sui ostentandi cupiditas , incredibilis rerum , quas mente concepit , & ad dictionem paravit , amor in causa præsertim sunt , cur multi specie boni decepti ; æra lupinis mutant , ibique turpissime peccent , ubi omnem orationis virtutem sese putarunt effudisse . Dic enim , sodes , quot , & quanta dicturo occurrunt , quæ dici possunt , & vere dici , quæ dici nihilominus locus , & tempus vetat ? Quot , & quanta , quæ sileari oporteret , & sine fraude , quæ  
sile-

fileri iudicum severitas , reorum fortuna prohibet ? At si quædam in publicum producas , quæ tacere oportuerat , conclamatum est ; si quædam taceas , quæ hominum oculis subjienda erant , periisti . Quid si omnem eloquentiæ apparatus ad Auditorum animos oppugnandos , adversariorum audaciam perfringendam educere opus est , & ad victoriam nisu omni contendere ? Varii miscendi affectus , ita tamen miscendi , ut cum indignationem , iram , omnesque odii flammæ in inimicum regeris , tibi interea in hoc cupiditatum æstu non obsis : illic validissimis suffultæ momentis in aciem dirigendæ rationes , & iusto Marte pugnandum , sed ita solerter , ne cum docere , qui adsunt , paras , & in tuam sententiam pertrahere , adversario temere tradas arma , quibus te confodiat : hic quando vi aperta non expedit , tentandæ per cuniculos Audientium mentes , ac sensim occupandæ ,

dæ , sed ita caute , ut se ab oratore circumveniri , & in fraudem tacite impelli non suspicentur . Quoties enim contingit , ut aliam ab ea , quam causæ genus , personarum conditio , ac judicum gravitas exigebat , dicendi formam consectantes , neque Auditorum expectationi faciamus satis , neque illum , propter quem diu , noctuque desudavimus , victoriæ finem consequamur ? Vera dico , & experientia comperta ; plus damni aliquando suis clientibus patroni afferunt , quam inimici unquam concupiverint . Illæ ipsæ nobilissimæ eloquentiæ virtutes , quæ commendare mirifice oratorem solent , plaususque parere , si in judiciis , hoc est non idoneo tempore , & loco proferantur , non solum causam , si qua labat , non fulciunt , sed miserrime secum pessum ferunt . Finge enim aliquem de fortunis , de liberis , de patria dimicantem , vitæque suæ impendens periculum conantem propellere .

Pro-

Prodeat ille in medium non tam advocatorum , quam figurarum agmine circumseptus : molli undique , & ad omnem festivitatem comto exordio in judicem sese insinuet , benevolentiam sibi conciliaturus ; ac tanquam in scena aliam ex alia personam sumens , modo fufis , modo rotundis periodis subsiliat , modo acutis sententiolis , modo leporibus undecumque demum licet accersitis , animos pertentet , & lætetur . Sed quid ego pluribus sapientissimum hunc Auditorum confessum , nugæ , & ludicra in capitis judicio respuentium , moror ? Jam tristis tabella exiit , nigrumque theta inultum est capiti tam male , & importune pro se peroranti . Quis enim ad ejus misericordiam moveatur , quem nullus imminentis sibi exitii sensus moveat , sed quasi voti compos , ac victor , orationis veneres in medio vitæ discrimine anxie aucupetur , ipsisque verendis subselliis per inanes figurarum flosculos insultet ? Vidit hæc

hæc incommoda , qua erat sapientia ,  
 M. Tullius , cum sibi lubrica , & an-  
 cept Milonis causa delata est , eam-  
 que pro cliente rationem inivit , quam  
 alii minus cauti , ac providi si tenuis-  
 sent , reum suæ fidei commissum pro-  
 didissent. Quomodo enim Pompejum  
 iudicii quæsitorem , quomodo ceteros ,  
 qui confederant iudicaturi , orator fle-  
 æteret ? Impavidus Milonis vultus ma-  
 gis exasperat. Non sordes in illo ullæ ,  
 non squalor , non capillus promissus :  
 nulla timentis , aut pro se supplicantis  
 species , non amicorum , non propin-  
 quorum , ut in capitali dimicatione  
 fit , turba ulla : ipse unus constans ,  
 & erectus ad omnem fortunæ eventum  
 stat in foro , Clodiana manu obstre-  
 pente , sententiam expectaturus. Ita-  
 que preces pro illo non supplice , non  
 sordidato indecoræ , ad alia pruden-  
 tem oratorem converterunt ; eadem il-  
 la rei constantia , ac pene audacia ,  
 qui suo periculo nihil , periculo vero

H

pa-

patriæ maxime commovebatur , Tullium ad deprecandum pro Milone impulit , facisque ad inflammanda contra Clodianos pectora subministravit , cum talem civem patria esset amissura , qui , quam animi magnitudinem in Clodio , peste teterrima , e Republica tollendo præsetulerat , eandem in obscunda pro republica morte præ se ferret , si patriæ salus deposceret . Quod si funesta omnia T. Annio nihilominus cecidere , constat tamen , cum ei a Cicerone scripta extra omnem metum oratio allata esset , & perlecta , sincere illum fassum , nunquam futurum fuisse , ut Massyliæ ipse exularet , si tam vehementer Tullius perorasset . Sed hæc virtus , ut vere fateamur , paucorum est . Ipsa enim illa exquisitæ eruditionis lumina , unde saluberrima ad eloquendum præcepta , & ad aliena vitia dignoscenda exempla copiosissima ad nos pervenere , ipsa , inquam , lumina , ipsique doctissimi præ-

præceptores , cum manum calamo ad-  
 movere , a recta femita deflexerunt ,  
 sive quod nimio scribendi ardore ducti  
 homines , non adverterent interea ,  
 quod argumentum tractandum suscipe-  
 rent , quas personas inducerent ; sive  
 quod facillimum sit extra omnem aleam  
 aliorum lapsus cernere , & præcipere  
 advenientibus , quæ fugienda sint , quæ  
 amplectenda ; ipsis autem monitoribus ,  
 in easdem angustias delapsis , statim e-  
 vanescat ratio e periculo , quo premun-  
 tur , sese expediendi . Si enim Diony-  
 sium Halicarnasenseum ad oratoriam ar-  
 tem contendentibus optima præcipientem  
 audimus , nemo illo accuratior  
 est , nemo ad docendum aptior . Si de  
 oratoribus Lyfia , Isocrate , Demo-  
 sthene , Hyperide , si de poetis Stesi-  
 choro , Pindaro , Æschilo , Sopho-  
 cle , Euripide judicium ferentem suum ,  
 nemo integrior censor , nemo hene-  
 stior .<sup>(a)</sup> At hic tantus præceptor , & Cri-

H 2 ti-

(a) *Dionys. Antiquit. Rom. lib. 7.*



ticus , Romanorum res gestas narrare aggressus , non ita ingenio suo temperare potuit , quin , legatis ultro citroque a Romanis , ac Volscis mittendis , in sola Coriolani causa alias super alias conciones sæpe intempestivas , & historię filum abrumpentes , glomeraret . Quid Augustinus Mascardus , superioris seculi in republica litteraria non ignotum nomen <sup>(a)</sup> ? Quanta de historica arte documenta nobis reliquit , quantusque in eo est , ut moneat , iudicium ubique adhibendum , ne a decoro usquam discedatur ? At tu tuas leges , Mascarde , perrumpis , cum in conjuratione Fliscana <sup>(b)</sup> , servum , non ultimę illum quidem conditionis , sed tamen servum , de rebus gravissimis ita disputantem facis , ut in reipublicę negotiis civis versatissimus melius eloqui minime possit . Adeo ne bonus ego , qui credam , Calcanium illum tuum ,

(a) *Traët. V. de arte historic.*

(b) *De Conjurat. Ludovici Flisci.*

tuum , dum Ludovicum Fliscum a nefario prodendæ patriæ consilio dehortatur , tantum e nobilium familiarum consuetudine , tantum e suæ mentis acuminis prudentiæ , tantum e Rhetorico ludo facundiæ haurire potuisse , ut quid a patriciis , quid a popularibus , quid a vicinis regibus , quid a gentibus longe positis auxilii Ludovico sperandum esset , elegantissima oratione percurreret , nullumque oratorium colorem omitteret , quo præsentem rerum Genuensium statum , consecutura , si detegerentur insidiæ , mala ad vivum exprimeret ? Tu ibi ingenium tuum , tu tuam eloquentiam ad res vel implicatissimas feliciter explicandas ostendere voluisti . Atqui ille idem , Auditores , Mascardus est , qui conjunctis cum eodem Dionysio viribus Thucydidem <sup>(a)</sup> graviter culpat , quod Periclem totius Græciæ eloquentissimum oratorem , inani quadam suæ

H 3 in

(a) *Thucyd. lib. 2. Histor.*

in illo ostentandæ facundiæ pruriginē, ea dicentem introducat, quæ neque Periclis indolem exprimant, neque tempori sint consentanea, cum Atheniensis populus in illum ob acceptas a Lacedæmoniis clades concitatus, leniendus modesta oratione esset, non varia eloquentiæ ostentatione exulcerandus: ille idem Xenophonti dicam impingit, quod indocti, ac rudēs homines apud eum nitide, ac polite inter se colloquantur; neque Curtio parcit, <sup>(a)</sup> quod Scythæ, gens barbara, & agrestis, philosophico pallio dignas sententias crepent. Ita sibi invicem vineta cædunt scriptorum plerique; ac ne aridas, & macras aliorum orationes, quo modo olim habitæ fortasse sunt, ad posteros transmittant, dum timent, non ornatu ejusmodi vestiunt, quem personæ pro sua quæque fortuna ferant. Amendantur igitur, inquiet aliquis, quoniam hic

fco.

(a) *Q. Curt. lib. 7. cap. 21.*

scopulus , nisi a peritissimis superari non potest, ab historia conciones omnes , & accepta ab oratoribus mutua ornamenta , suis dominis restituantur. Non hæc ego colligo , historicis parum fausta : Tamen non defuere , neque nostra ætate defunt viri litteratissimi , qui hæc scribentibus amœna diverticula penitus interdicunt, quod & cœptus narrationis cursus perperam interpelletur , & hominibus , qui nunquam fuerunt , aut non ita locuti sunt , sententiæ non probabiles , sæpe non sanæ, aliquando etiam impiæ tribuantur . Cæsar quidem certe , bellandi æque , & scribendi gloria celebratissimus , qui succisivis horis res a se gestas litteris consignabat, non tantum nactus est temporis , quo per hæc historicorum delicias legentium oculos oblectaret ; munditiem tamen , nitoremque scriptionis ita est persecutus , ut illum legiones conscribere , providere rem

frumentariam , transire flumina , munire castra , acie instructa ad prælium cohortari milites , quamquam ipse non concionetur , videre tute tibi videaris . Nam conciones , quæ a ducibus in castris habitæ referuntur , non intelligo , quomodo probari possint , & loco convenient ; neque quisquam tam facile sibi persuadeat apud Curtium ,<sup>(a)</sup> aut Darium curru sublimi invecum , ad infinitam militum multitudinem , qui campos , collesque omnes non procul ab Arbelis obsederant , jam jam cum Macedone congressurum , ita vocalem concionatorem fuisse , ut commode ab iis exaudiretur ; aut militibus tantum otii e præsentis trepidatione superfuisse , ut totam illam , quam ex eminenti loco Persarum Rex concinebat , auribus non iniquis cantilenam haurirent . Qui enim fieri potest , ut in ipso pugnæ articulo , cum undique micant gladii , classica canunt , cum instruuntur

(a) *Q. Curt. lib. 4. cap. 34.*

tur ordines , alius alium urget , exercitus spe , metu , undique fluctuat , perinde ac si omnia tuta sint , ac tranquilla , diu , multumque imperator vel in sua , suorumque virtute commemoranda , vel in hostium ignavia , ac timiditate deridenda , oratione immoretur ? Sed scriptoribus parcamus , qui ab omni civium , ne dum militum frequentia semoti , cum aliorum facinora litterarum monumentis traderent , quæ forma castrorum esset , ignari , ad exornandas tantum mira varietate res gestas incubuerunt , ac sicubi historia refrixit , aut ad scribendum res amplæ defuerunt , materiæ jejunitatem per hæc evagationes compensare studuerunt . Quorum conatus si eo spectant , ut suum ingenium exerceant , atque ita ad legendum otiosos alliciant , non sunt omnino reprehendendi ; at si per hæc fucum facere se posse putant , vereor , ne eorum importunæ digressiones

nes

nes risu excipiantur . Quod Henrico Stephano eruditissimo viro, <sup>(a)</sup> & de Græcis , latinisque litteris in typographica arte promovenda optime merito , contigisse accepimus , qui cum latinam J. Lipsii dictionem , multis eâ tempestate ad imitandum propositam , notare decrevisset , librumque , quem adornabat , *de latinitate Lipsiana* inscripisset , suscepti statim oblitus muneris , in Turcarum gentem per Europam tunc temporis grassantem , invehitur , eorumque feros mores , & instituta unice carpit . Tam supinam negligentiam , & monstruosam officii sui oblivionem satis facete sugillarunt , qui libelli tam inconcinne confecti titulo duo tantum vocabula addidere : *de Latinitate Lipsiana adversus Turcas* . Nimia hercle libertas , omnes præceptorum fines supergressa , ne ipsis quidem poetis concedenda , quibus tamen , ut pictoribus , *quidlibet audendi semper fuit*  
*equa*

( a ) Teiſſer. in *Eleg. Viror.*

*æqua potestas*. Immo vero, si qui sunt, qui caute, ac sapienter artem debeant tractare suam, & infinitos naturæ effectus, ritusque hominum sedulo animadvertere, profecto poetæ sunt. Cum enim hi ingeniosissimi rerum omnium imitatores, crudire homines per fabellas instituunt, & per inaudita, quæ excogitarunt, figmenta in admirationem, qui spectant, erigere; periculum semper est, ne in absurda, absurda, & fidem humanam superantia delabantur. Neque enim satis est provinciæ, & patriæ tenere mores, quæ adolescentum, quæ virorum, quæ senum indoles sit, quæ fortunatorum, quæ nobilium, quæ divitum studia, didicisse; quis enim hæc non optime novit, qui non graves præceptoribus aures præbuerit? Non satis ad res confingendas hæc de schola cognitio: quot, & quanta momenta supersunt ab experientia, a quotidianis exemplis desumenda? Non tibi constat, inquit  
 Ari-



Aristoteles , <sup>(a)</sup> apud Euripidem Iphigenia , quæ nuper Dianæ immolanda , patris genibus advoluta rogans , illacrymansque supplicabat , ut ab horribili morte eximeretur ; mox vides illam alacrem , audentemque ad aras mactandam , quasi ad triumphum convolare . Unde hæc tam repentina in puella mutatio ? Unde tantus vitæ contemptus ? Si quis muliebrem sexum novit , cuius velle , renuere , poscere , odisse idem fere est , non admodum ejus inconstantiam miretur : Illam autem alacritatem , & fiduciam , quæ vel ab audacissimis discedit omnis , quoties horrenda lethi facies oculis observatur , in muliere nullo modo probet . Jam illas calamitates , & infortunia , quæ in suavissimo felicitatis sinu quiescentibus contingunt , quam difficile est cum decore in Scenam producere ? Videas sæpe reges ex altissimo illius majestatis fastigio , unde jura dabant

(a) *Lib. 1. de Poetic. particul. 78.*

bant populis , ad ima dejectos : da illis mala tantæ fortunæ paria : prodictiones domesticorum , truculentas filiorum interneciones ; bella intestina in regem exorta , miseras urbium direptiones ; omnia prostrata cæde , ac profligata . At centunculum , & peram calamitosæ principibus Euripides alligat , instrumenta regiæ dignitati non satis congrua , ut non immerito cum Æschilus in Aristophane<sup>(a)</sup> claudorum , mendicorum , pannosorum poetam lepidissime appellet . Quid cum infelices homines nobis poetæ exhibent , solantes sortem suam , & acutas , artificiosasque sententias , cum malis mederi volunt , veluti ex tripode proferentes ? Hoccine boni miseriæ afferunt , ut homines arguti sint , & melius , quam Platon , & Anaxagoras , philosophentur ? Quid modi illi , quibus tota fabulæ moles connectitur , quam a paucis , nisi sapientissimi sint , apte solvuntur ?

(a) *Aristoph. in Ranis Act. 4. Scen. 2.*

tur ? Nihil dico de iis , qui argumenti exitum minime inveniunt , nisi aliquod Numen e cœlo deferant , neque patri ad incitas redacto suppetias ferre possunt , nisi filius , qui in ultimis terrarum degebat oris , repente adsit , illo puncto temporis parenti suo salutem allaturus . Hæc sunt illa portenta , quæ multitudinis feriunt oculos , quæ plausus in theatris excitant , quæ palmam poetæ apud vulgus pariunt ; sed ad artem exacta , & ad ejus librata regulas , turpissima vere monstra deprehenduntur . Sed ego longius fortasse , quam par fuerat , & imbecillum adolescentum ingenium patiebatur , progressus fuero , ac nonnullis rei difficultate deterritis animos demsero ; cum videant , nullo se pacto posse ea brevia superare , in quæ artis peritissimi sæpe navim impeerint . Difficile est , non inficior , neque cujusvis hominis , orationem suam in oratoria , & poetica ita conformare , ut non res ingenio ,

sed

sed ingenium rebus accommodetur .  
 Sed illud tamen fidenter pronuntio ,  
 neminem , qui ad omnia iudicium ad-  
 hibuerit , tam tenuis litteraturæ fuisse ,  
 qui non aliqua nominis fama florue-  
 rit ; pluris enim apud cordatos homi-  
 nes modica eloquentia cum iudicio  
 conjuncta fit , quam immensa facundia  
 prudentia carens . Hanc in consilium  
 vocent velim juvenes , sive summum ,  
 sive medium , sive infimum dicendi  
 genus delegerint , curentque in primis ,  
 ut quoniam Auditores modo docendi  
 sunt , modo oblectandi , modo flecten-  
 di , suam cuique parti formam , &  
 quasi colorem apponant , neque sem-  
 per in sublimi sublimia , in mediocri  
 temperata , in humili subtilia sequan-  
 tur : uno verbo , ut optimis latinita-  
 tis Auctoribus adhærentes , hinc niti-  
 dam , decentem , castam dictionem ,  
 quam maxime fieri potest , scribendo  
 exprimant . Quamquam quid ego a-  
 liunde incitamenta quæro , cum hæc e-  
 rudi-

ruditionis, & sapientiæ decora intueor, Oratores, Theologos, Jurisperitos, Philosophos, viros in sua quemque facultate doctissimos, a quibus nihil nisi concinne, nihil nisi perfecte, nihil nisi cum summa venustate fieri quotidie cernimus? Hos ut sequamini, horum vestigiis insistatis, horum imaginem ut dicendo referatis, vehementer hortor, Adolescentes, magnum industriæ, ac diligentiae laturi pretium, si nunquam ab iis discedatis, qui ut in civili vita, sic in litteris suam ubique retinent dignitatem.



AR.

# ARGUMENTUM

## QUINTÆ ORATIONIS.



**E**ruditio, quam ab erudiendis ingenitis majores ita nostri appellare voluerunt, non unam, aut alteram literaturæ partem, sed eas omnes complectitur, quæ ad animos excolendos, eosque ingenuis artibus ad humanitatem informandos esse præsidio possunt. Quocirca non doctrina tantum hoc nomine continetur, quæ scientiam plurimarum rerum comprehendit, neque prompta, & expedita minime hebetis indolis ratio, quæ liberos, & honestos decet; sed quidquid ab historicis, a poetis, a philosophis, ab omni scripto-  
I rum

rum genere sapienter erutum , potest ad Auditorem docendum , ornandamque eloquentiam , ad orationem traduci . Atque optimarum artium cognitionem , minimeque rudem antiquitatis notitiam , unde præclara ad dicendum plurima desumuntur , nemo est , qui non oratori , cujus est de re omni suo loco , ac tempore disputare , necessariam esse fateatur : cumque bibliotheca ad hoc præissimum comparata sint , & omnigena librorum instructa copia , ut ex eorum lectione docti , & eruditi discedamus , multum ad oratorie facultatis propagationem proderit , in iis evolvendis , quantum oratoris munus , & domestica patiuntur negotia , immorari . Quod vero ad illud eruditionis studium spectat , quod ad omnem antiquitatem excutiendam , censoriaque notione quolibet Auctorum Chirographa examinanda præcipue insumitur , tam latum illud , vastumque est , ut vix tota hominis vita sufficere videatur . Quocumque enim convertas oculos , innu-

innumeri sese tibi scriptores offerunt , qui hanc sibi curam susceperunt , ut quæ in tenebris delituere , aut ab aliis non recte explicata esse putaverunt , commentariis explanarent , nihilque intentatum relinquerent , quod obscurum , & imperitum , volenti secretiora eruditionis adire arcana , videretur . Itaque de funeribus alii , alii de gentium oraculis , de toga , de pallio alii , multi de typographiæ ortu , ac progressu , ceterisque , quæ populo plausibilia sunt , neque mediocrem de his omnibus luculenter , pulcreque differenti existimationem pariunt , neque paucos , neque exigua molis libros conscripserunt . Hec tamen omnia non ita necessaria esse facundo viro judicamus , ut sine ejusmodi adjumento manca , ac debilis sit eloquentia . Sunt enim hæc , & his similia adventitia dicenti bona , & quæcumque demum hominum opinio sit , non tam severa libranda lance , ut pluris bibliopola propterea , qui librorum , typorumque scientiam profitetur , quam



orator , qui multo majora spectat animo , aestimetur . Sed de his copiosius in ipsa oratione , neque fortasse injucundum consideranti , quantum emolumenti in hominem disertissimum e solida , minimeque fucata eruditione profiscatur .



ORA-

# ORATIO QUINTA.

*Quæ, & quanta oratori necessaria  
eruditio.*



Um sæpenumero versarem animo, quo potissimum argumento, elocutionis partibus jam expositis, Te primum,

Princeps Eminentissime, ornatissimam deinde sapientum Auditorum coronam hodierna die detinerem; nullum, quod ad hujusce seculi ingenium aptius incidere, & superioris anni orationi propius succedere videretur, mihi occorrebat, quam si de eruditione inter cetera verba facerem. Si qua enim ætas unquam fuit, quæ majorum

virtutem æmulata, eo hominum industria, ac nisu creverit, ut præcipuam illorum laudem vel proxime attingeret, vel etiam æquaret; nostra profecto ætas est, qua non exultæ modo, sed barbaræ quoque gentes adeo in hoc opus consentiunt, ut in gravissimis Rerumpub. negotiis nihil magis, quam litterarum gloria, videatur cordi esse. Tantam erga optimas disciplinas omnium voluntatem, & curam aperte testantur quotidianæ ab alienigenis litteræ, quæ de importandis, exportandisque libris ad nostros homines perferuntur; creberrimæ eruditorum Ephemerides, quæ recondita semper volumina qua animadversionibus, qua figuris, qua characteribus spectanda evulgari accuratissime nuntiant; magnificæ constructæ passim bibliothecæ, & a studiosis cœtibus frequentatæ; assiduæ typorum officinæ, quæ in prelis exercendis operas occupant innumerabiles, aperte testantur.

Quis

Quis interim e tanto rerum apparatu in eloquentiam , pro qua præsertim magno opere laboratur, redundat fructus ? Putamus ne , litterariis opibus in immensum crescentibus , ejus, quodque nativum decus augeri, an, quod fieri ferme solet in rebus ceteris , nimia copia decrefcere ? Si verum enim fateri non piget , multi ex oratoribus multa peccant, non quod eruditi sint, quod honestum per se est , & viro disertio penitus necessarium , sed quod præter modum omnem sint eruditi ; ut satius nonnullis sit , eorum pleraque, quæ quondam perceperunt, dediscere, quam nova subinde nihil , aut parum ad facundiam locupletandam profutura , in memoriæ thesaurum compor-  
 tare . Quamobrem ne illa ipsa , quæ ad oratoriæ facultatis ornatum incredibili sedulitate instructa est, & quotidie instruitur, cruditio noceat , decorum tibi diligentissime servandum esse , iterum , iterumque edicimus ;

& quemadmodum Neoptolemo apud Ennium , in militia philosophari placet , sed paucis ; ita in oratorio pulvere tantum e scriptoribus doctrinæ delibandum , ut hoc sapido veluti ferculo condiatur oratio , non coacervatis dapibus corrumpatur . Quam enim aliam causam esse arbitramur , cur ingeniosissimi alioquin viri , bene dicendi laudem non consequantur , nisi quod intentius , quam par fuerat , huic sese studio dedidere ? Ex quo usu venit , ut cum ad scribendum accedunt , immensa occurrentium sibi rerum obruti mole , & quid in primis dicant , quid prætereant , quid paucis complectantur , dubii , & incerti , cruda ad extremum , horrida , incondita perstrepant , ambagesque sempiternas ne Pythiæ quidem vati extricandas innescant . Date igitur hanc mihi veniam , Auditores , ut duo gravia pariter , & utilia in præsens exequar ; unum quod ad oratores , alterum quod ad eruditos re-

refertur : primo loco , quæ , & quanta oratori necessaria eruditio sit , ostendam ; tum per propriam eruditorum provinciam digrediar , & quid in his laudetur , castigeturve a Criticis , significabo . Id autem parcissime faciam , & ea tantum persequar , quæ ad humanitatis studia pertinere videntur .

Atque ut ab ipso statim nomine rem exordiamur , ille habetur vulgo eruditus , qui in plurimis , variisque scriptoribus diu , ac multum versatus , eam sibi demum pulcherrimarum rerum , verborumque suppellectilem adornavit , ut docte deinde , & copiose , si ad disputandum vocetur , omnia explicare possit . Itaque quæ ex afflicta Auctorum tractatione suboritur , vehementique diligentia feliciter propagatur , reconditæ antiquitatis cognitio multiplicem eruditionem gignit , quæ opportuno loco , & tempore adhibita , mirum in modum sermones comit ,

mit, & Audientium animos peculiari suavitatem perfundit. Si enim lauta litteraturæ ornamenta splendidum quoddam iis lumen impertiunt, qui in civili convictu dulcissimos musarum congressus affectantur, neque ab earum complexu possunt tantisper avelli; quantam oratori doctrinæ celebritatem adjicient, qui in magnam civitatis lucem eloquentiam suam efferre debet, totamque concionem dicendi varietate sustinere? Cum enim duo ad oratoriam laudem cumulandam conspirent, mutuasque alterum alteri suppetias ferant, politiorum litterarum cultus, & severiorum disciplinarum perceptio; ex hac utriusque rei societate illud plenum, & excelsum existit, ut facundi, ut varii, ut ornatissimi, neque inanes videamur usquam, ac rudes. Porro qui opulentissimum sapientiæ suæ quasi patrimonium nobis reliquere, id spectasse maxime putandi sunt, ut, quoniam quæ excogita-

fent

sent ipsi , aut ab aliis excogitata , meliora meditando , scribendoque fecissent , viva nos docere voce , alteque menti imprimere non possent , per mutos saltem Magistros , hoc est per libros ad nos transmitterent , atque ita bene de omnibus mererentur . Unde vero magis , quam e Græcia , beatissima illa Apollinis , Gratiarumque patria , illa præstantium ingeniorum regione feracissima , certa ad eloquendum præsidia petenda sunt , ex qua artes omnes , ac disciplinæ , omnis eloquentia , & humanitas ad nos dimanarunt ? Quæ quidem cum dico , non Romanos , solertissimam gentem , & ad præclara quæque tentanda apprimè a natura factam excludo ; sed hi per septingentos , & amplius annos perpetua bellorum sibi invicem succedentium serie prohibiti sunt , quominus Græcorum chartis oculos admoverent : qui positis tandem armis , & ubique terrarum parta pace , consopitam in-

do-



dolem tam acriter fuscitarunt , ut non modo præteritum tempus abunde compensarent , sed ipsos prope bonarum artium Auctores anteirent . Quanta enim , ubi litteræ mare pervectæ , latino in solo sedem figere , cælumque Italiæ haurire cœperunt , quanta historicorum , poetarum , philosophorum quanta extemplo veluti soboles coorta est ? Vix earum dulcedine prægustata , huc privatorum cogitationes , conatusque collecti , talem illico fortunam sortiti sunt , ut in rostris nobilissimi oratores de principatu contenderent , cætusque philosophantium in urbe celebrati , insignes Scholas , quas *Ἀκαδημία, Στοά, περιπατὸν* speciosis nominibus Græci appellant, minime his inviderent . Atque hæc , opinor , causa fuit , cur duo illa Romanæ curiæ , forique lumina , Crassus , & Antonius , corroborata jam eloquentia , & ad summum fastigium evecta , alter

ne-

• *Academiā, Stoam, Peripatū.*

negligere, alter ne nosse quidem Græcos videri vellet. <sup>(a)</sup> Verum utrumque omni facultatum genere ab hisce præceptoribus fuisse institutum, eorumque litteras avide combibisse, satis superque in judiciis certamina loquebantur, quæ sine hujusmodi adminiculo levia censebantur, & ludicra. Antonium autem optime scivisse græce; Herodotus, Thucydides, Theopompus, Timæus, licet verbo negaret, se scriptores ipsa perspicue convincebant, quorum libros pervolutando, id obtinuerat, ut dictionem suam eorum pene dixerim cantu coloraret, ac de uniuscujusque virtute eruditissime disceptaret. Quinimo Tullius, qui suorum hominum prudentiam, ubicumque potuit, & quocumque demum modo potuit, Græcis semper antetulit, non prima tantum doctrinæ rudimenta, sed facundiæ etiam vim ex hoc uberrimo fonte haustam, adeo felici exitu pro-

pa-

(a) *Cic. de Orat. lib. 2;*

pagavit, ut cum apud <sup>(a)</sup> Rhodios rhetoras declamaret, tanti oratoris admiratione Apollonius philosophus excitatus, non sine gentis suæ verecundia fateretur, Græcorum eruditionem, & eloquentiam una cum M. Tullio in Latium commigrasse. Quæcumque enim ad oratorem efficiendum requiruntur, usus, auditio, lectio, litteræ, summa in illo fuere omnia; cumque sibi perfectam eloquentiæ imaginem animo proposuisset, mature ante omne scientiæ genus complexus, multa insuper tum ab extrema, tum a proxima antiquitate selegerat, quæ dicenti fidem facerent, & rebus auctoritatem conciliarent. <sup>(b)</sup> Quo enim spectant ab eo non semel, & iterum inculcata præcepta, ut optimarum artium scriptores legat orator, neque solum evolvat, quod cuilibet e populo, modo litteras noverit, facillimum est; sed

(a) *Plutarch. in Vita Ciceron.*

(b) *Cicer. de Orator. lib. 1. cap. 34.*

sed attentius inspiciat ; laudet , ubi oportet ; vituperet etiam animose , si res ita ferat , corrigat , refellat ; ut senatoriam consuetudinem , reipublicæ disciplinam , jura sociorum , causam imperii percipiat : quo inquam , hæc spectant , nisi ut præstantissimarum rerum cognitione imbutus , de his , quæ in quæstionem veniunt , promte , ac scite differere , suamque orationem historiæ subsidio munire possit ? Neque enim ei magis assentimur , qui acute ad dicendum plurima excogitaverit , quam qui sapientum virorum dictis , quæ in medium profert , confirmat ; neque ei libentius præbemus aures , qui nitida latinitate , & rotunda verborum comprehensione præcellit , quam qui veterum testimoniis , quæ hæret in ancipiti , causam illustrat . Sunt in philosophis , sunt in poetis , in historicis valida rationum momenta sunt ; quæ si in rem tuam callide transferas , pronos audientium animos impellas ,

&

& quo perorando tendis, adducas. Hinc a Platone, a Xenophonte, a Seneca desumptæ sententiæ, hinc ab Epicis, a Comicis commodè decerpti verficuli, apologi ipsi cum venustate aliquando explicati, ad persuadendum plurimum valent, & irrepentem satietatem avertunt. Ut enim latine dicas, & subtiliter, ut grandia tones, & capaces exoptantium fusas periodos aures impleas, nuda cetera putatur oratio, ac jejuna, si suis blandimentis, ac lenociniis destituatur. Quamquam ego perinde disputo, ac si negligentibus, & cunctantibus acutissimos stimulos subdere necesse sit, propositisque ante oculos oratorum exemplis, ad eruditionem naviter conquirendam torpentes, tardioresque accendere. Illud mihi potius enitendum est, ut cum a plerisque immensa historiarum, fabellarum, doctrinarum congeries in orationem convehatur; amice moneam, non ea, qua solent, prodigentia, alio-

aliorum opes profundendas esse, sed ita sobrie, ac prudenter dispartendas, ut de suo etiam; non de alieno unice vivere videantur. Nam qui existimant Græcæ linguæ studium, in tanta interpretum turba, ad hæc supervacuum prorsus esse, neque nisi bonos homines, aut tetricos ad hanc addiscendam compelli, non est, cur pluribus redarguamus; sed illos tamen doceri volumus, neminem fere unum neque aureo latinitatis seculo, neque post receptas a barbarie intactum litteras disertum extitisse, qui non hoc sibi adjumentum, ac decus ad solidam laudis consecutionem asceverit. In quo tamen non dissimulo alterum huic contrarium, quod in quorundam mentes invasit, vexatque non parum, eorum vitium dico, qui credunt, insolitam sc̃ in hominibus expectationem excitare, si altero quoque verbo græca commisceant nomina, cumque debeant latine latinos

K

allo-

alloqui , malunt Homerum , Hesiodum , Euripidem toti redolere . Quid enim hoc est aliud , quam patriam linguam , dum externam plus æquo affectas , violare , & latinarum vocum positionem , atque adeo eloquentiam pervertere ? At nullus es , nisi Isocratis , Demosthenis , Aristotelis longos textus recitare didiceris ; ac si culpæ quondam tribuebatur , si quis vocabula græca , in quæ forte incurreret , quod non intelligeret , vafre præteriret ; pari tibi crimini vertitur , si quid quid græci calles , non sæpe , & sæpius effundas . Testis mihi inter reliquos orator sit , qui cum in prætorio tribunali confisteret , ageretque acerrime causam suam , in medio repente cursu , iudicibus græci sermonis ignaris , maximam Iliadis partem belle concinere , eosque ad juris custodiam , Homeri ; & ejus interpretis Eustathii verbis cohortari non dubitavit . <sup>(\*)</sup> Quid si

(\*) Balzacius in *Epistol. Select.*

si quis exoticis linguis, si hebraica, syriaca, chaldaica tinctus, in forum prodeat, & patroni partes suscipiat? Ne vivam, si non de usucapionibus, de Mancipiis, de stillicidiis verba facturus, quod olim contigit,

(\*) *Doct̃or ab Auroræ populis, & litto-  
re rubro*

*Egyptum, viresque Orientis, & ulti-  
ma secum*

*Bactra vehat:*

Si pro Prudentum responsis, pro Labeonibus, pro Paulis, pro Scævolis, non tibi *Rabbi Maimonidem, Rabbi Abrahamum, Rabbi Zachut, & Talmud* ad ravim usque cantitet. Neque vero aliud ab hominibus expectes, nisi ut ab argumento penitus, a loco, a tempore aliena effutiant, qui in eo præsertim laborant, ut omnia, quæ didicere, conglomerent; ut nova, non vera, aut vero similia afferant, neque vident, se, cum eruditissimi ab om-

K 2 ni-

(\*) *Idem Balzac. Virg. Æneid. lib. vii. v. 636.*



nibus haberi volunt , ut nugacissimos blaterones irrideri . Deligenda enim sunt e locupletissimo penu , qui omni-gena scatet eruditione , quæ ad dicen-dum paraveris ; alia , etsi bona sint , ne reliqua confundant , seponenda , & ad meliora tempora reservanda ; suas in partes digeras oportet , quæ ad Au-ditorum demerendam benevolentiam , quæ ad eorum animos commovendos , quæ ad erudiendos pertinent ; omnia autem ita in orationem inducas , ut nusquam perturbent inceptum cur-sum , nusquam hæcant , nusquam tumultuentur . Hæc qui faciat , orato-rem , & eruditum appellabo . Verum-tamen quis ordo , quæ elegantia , quis ornatus in eo esse potest , cujus præci-pua cura fuit , ut hinc , & illinc sine discrimine carperet omnia , plurima a Græcis , ac Latinis , non pauca ab In-terpretibus mutuaretur , non sibi , non somno parcens , ut innumera vo-lumina , neque cuivis pervia evolvis-

se,

se , atque adeo exorbuisse credatur ? Quocirca minime mirandum est , si quæ solet litteratis ad portentum usque prodesse , hos memoria misere prodat , si ex immodica ingerendæ eruditionis cupiditate lucubrationes in lucem exeant delumbes , hirtæ , confragosæ ; ubi si quid pulcri intermicat , vel alium jactat dominum , vel impolita rerum strue labefactatur . Ac mihi sedulo cogitanti , unde nihilominus tanta semper extiterit , hodieque existat e Transalpinis , e nostris etiam hominibus eruditorum multitudo , qui ceteris disciplinis aut paululum degustatis , aut etiam omissis , huic sese studio totos addicant , florentesque ætatis annos ibi conterant , duæ inter reliquas causæ , quare id faciant , obversabantur , rei de qua agitur , facilitas , & multijugis doctrinæ complexio , unde singularis nascitur oblectatio . Atque universim de Artibus si judicare velim ; a recta plane decedam

via ; si sine ullo incommodo parabiles esse dicam . Est in singulis labor suus , sua est in singulis difficultas , quæ accedente tamen industria , ac diligentia paulatim superatur . Hæc tamen omnia , si cum oratoria arte comparentur , ita sunt exigua , ut nullam secum ferre molestiam existimes . Norunt id apertissime qui perpetuo in hoc versati curriculo , e vadis jam emeruisse censentur , ac portum aspicere ; quam novi semper , quam trepidi , quam de exitu dubii ad scribendum aggrediuntur ? quam gravis , cumprehenditur , his stilus est , quam asper pluteus , quam ipsa aliquid exarandi molesta cogitatio ? Neque injuria ; cudere enim opus , quod neque sollicita festinatione præcox crudeat , neque intentiore cura vietum clangueat ; ita sensim ad culmen educere , ut neque in inutiles abeat frondes , neque densis luxuriet floribus ; ita postremo ornare , ut homines fastidii ad ineptias

ptias delicatissimi vi quadam pelliciat,  
 & cum voluptate detineat, totum hoc  
 non subacti tantum, non experrecti;  
 sed divini ingenii omnino munus est.  
 Quotus autem quisque adeo excelluit,  
 ut omnium ore probaretur, locumque  
 semel occupatum, tuto deinceps, &  
 cum dignitate retineret? E contrario  
 nemo tam modicæ indolis est, dum-  
 modo aliquo iudicio, & memoria va-  
 leat, qui non possit sibi e tam amplo,  
 uberique campo aliquid laudis decer-  
 pere. Si librorum, unde eruditionis  
 leges efflorescit, opportuna tibi copia  
 sit, si temporis, & otii tantum suppe-  
 rat, quantum hæc studia deposcunt,  
 litteraturæ statim gloria clares, & e-  
 ruditus ab omnibus consalutaris.  
 Jam illa rerum, quæ legentium ocu-  
 lis occurrunt, varietas quantam ju-  
 cunditatem parit? Placet ne illos in-  
 spicere, qui populorum mores, insti-  
 tuta, præclara facinora sibi describen-  
 da susceperunt? Habes qui tibi a Per-

sis , a Græcis , a Romanis bello , & pace gesta referant , & subtilissimas identidem disceptationes interferant . Juvat ad eos potius divertere , qui sacrificia , magistratus , judicia , auguria , numismata explicarunt ? Innumera- biles statim sese offerunt , qui multi- plici tanquam pabulo esurientem ani- mum expleant . Quid illos commemo- rem , qui scriptores partim obscuros clarissimis animadversionibus illustra- runt ; partim vetustate exesos , ac pro- pe dimidios , addendo , supplendo , antiqua , novissima chirographa inter se conferendo , refecerunt ; partim gra- via passis vulnera , præstantissimam me- dicinam adhibuerunt ? Quid illos , qui improbo , ac pertinaci labore delite- scentia Auctorum scripta e tenebris ex- traxerunt ? qui hoc saxum quotidie volvunt , qui codices historicorum jam squalidos , excusso pulvere , ac situ , optata luce , & cedro donant ? Pergant de litteris , quod bene vertat , navi  
ho-

homines optime mereri; & <sup>(a)</sup> quidquid  
*sub terra est, in apricum proferat æ-*  
*tas; æterna inter ceteros ei habenda*  
*gratia\**; qui Italorum gloriæ amplifi-  
 candæ amore succensus, rerum Itali-  
 carum scriptores variis lectionibus ad  
 unguem castigatos, abditos alios; al-  
 ios dispersos in unum cogit, ac pu-  
 blici juris cum *sociis Palatinis* facit,  
 vir sapientia, doctrina, editorum vo-  
 luminum nobilitate immortalis. At-  
 que ut ingentia in nos contulisse bene-  
 ficia critici videntur, qui modum  
 ubique servantes, communem utilita-  
 tem scribendo spectarunt: ita suo no-  
 mini non mediocriter offecerunt, qui  
 intemperanter, perque aliorum crimi-  
 nationes sibi ad immortalitatem iter  
 munire annisi sunt. Quot enim, quam  
 acerba, quam diuturna Sigonio cum  
 Grucchio, cum Robortellio interces-  
 sere

(a) *Horat. epist. lib. 3. epist. 6. v. 24.*

\* *Lud. Antonius Muratorius, eximium atque  
 vestra decus, & ornamentum.*

ferre certamina, quod ab his in Antiquitate Romana tradenda dissentiret? ut pene legitimo iudicio constituto, ac reo comperendinato, totam causam perorare Sigonius coactus sit, eorumque argumentis, putidisque maledictis non una actione respondere. Sed Robertellius præservido ingenio, & inexplebili siti laudis abreptus, iis accensebatur, qui latinitatis, & eruditionis Antistites videri volunt, omnemque rem litterariam humeris fulcire suis, tandiu tibi aliquid tribuentes, quandiu te suum clientem putant, aut <sup>(a)</sup> *tanquam in scena partes tractare secundas*; at si ab eorum latere parumper abscedas, & quippiam emitas, quod iis non arrideat, te, tuaque statim corripiunt, traducunt, deruncinant; ut minime iccirco mirer, si livida ille labe contactus, doctissimos viros, quos sapientes fecere plurimi, inclementer acceperit; & Andream

AL-

(a) *Horat. epist. lib. 3. epist. 18. v. 14.*

Alciatum, suorum scriptorum furem, Vincentium Madium, mendaciloquum hominem, Marcum Antonium Muretum, proletarium ludi magistrum, Paulum Manutium, purum putum bibliopolam vocitarit. Nescio enim quo pacto fit, ut qui ad eruenda veterum monumenta isto ante fœdere consenserunt, & ad difficillimos scriptorum locos explanandos, symbola quisque sua, convenere, mox corrogatam operam dedignati, alter in alterum convertant arma, quæstionesque gravissimas sæpius, quam rationibus afferendis, conviciis in se invicem jaciendis, definiant. Lambinus<sup>(a)</sup> repetundarum Giphanium postulat, quod in Tito Lucretio a se mendis purgato, quæ bona ibi sunt, e commentariis suis omnia surripuerit; quæ tamen ille aut dissimulat, aut maligne laudat, aut sibi impudenter arrogat. <sup>(b)</sup> Giphanius

ra-

(a) Lambin. in *Præfat. ad Lucret.* (.)

(b) Giphani. in *Epistol. ad Muretum*. 78. (.)



raptus in jus , objectum crimen: crimine diluit , plagii Lambinum incusans , qui in Cornel. Nepotem emendationes quondam a se exaratas , in rem suam versipellis homo corraferit . Quid Janus Douza <sup>(a)</sup> medius inter litigantes ? Non invidiæ flammæ extinguit , sed magis excitat , bustuarium Verrem Giphanium appellans , qui Fruterii extremo fato defuncti scripta , varia caussatus , non edat ; at furtivis tandem nudata coloribus ; universo doctorum gregi moveat cornicula rifum . Hinc , & illinc multatus Giphanius , in Scioppium invehitur , quod in ipsius bibliothecam obrepens , rarissimum Symmachi codicem subduxerit , & latinæ linguæ observationes sibi suppilarit . Patientia abutar vestra , si recensere singula hoc in genere velim , si ab eodem Scioppio <sup>(b)</sup> Lipsii Saturnalia Petro Fabro tribui ; Ful-

vii

(a) *Douza ode infelles litterar.*(b) *In Not. ad Priap. p. 14.*

vii Urfini in latinos historicos commentariorum plerosque, <sup>(a)</sup> Petro Giacconio, Mureti variantes lectiones, annotationesque in Senecam, Ferdinando Pinciano ascribi dicam <sup>(b)</sup>. Vetus enim eorum querela est, qui postquam in Auctoribus interpretandis, dissertationibus, lexicisque concinnandis evigilarunt, paulo post vident, alios in laudis sibi debitæ possessionem irrumperere, & pauculis immutatis, suo audacter operi inscripto nomine, alienis ita laboribus inclarescere. Qua in re non vacat quærere, jure ne, an injuria eruditissimi viri sibi ultro citroque obrectarint; siquidem in litterarum regno vix unus, & alter tam veritatis tenax est, qui cum pungi aliqua ratione se sentiat, ferat modeste, & inimicum inultum abire sinat. Sed illud accidit perincommode, ut non vulgari doctrina homines, ne ad rixandum adi-

(a) *Thomas de P'pag. sect. 53.*

(b) *Theodor. Janson. Nov. Antiq. p. 27.*

adigantur , a scribendo interea abstin-  
 neant , lucemque publicam omnino  
 fugiant . Bene tamen habet , quod un-  
 de minime expectatur , non exigua in  
 alios emanat utilitas . Sive enim a con-  
 certationibus revera nonnulli abhorr-  
 reant , sive labori addere laborem no-  
 lint , sive se melius dicere , quam  
 scribere posse existiment ; præclare  
 cum litteris agitur , quod in amico-  
 rum consuetudinibus , in myropoliis ,  
 in conviviis , qua pollent , eruditio-  
 nem facile expromunt , ejusque salu-  
 bria pocula siccæ coronæ propinant .  
 Nulla enim ingenuis artibus opta-  
 ri faustior fortuna potest , quam ut  
 earum amor in illos conventus immit-  
 tatur , ubi honesti quidem , sed ni-  
 mio otio circumfluentes homines , in-  
 tegros sæpe dies sine ullo lucro consu-  
 munt . Quod si Timotheus Athenien-  
 sium imperator Platonis cænas frequen-  
 tabat , quod multimoda scientia con-  
 spersæ , postridie etiam convivam oble-  
 sta-

&arent ; non immerito litterariæ inter  
 domesticos controversiæ feruntur , un-  
 de rudes antea , & indocti abditarum  
 rerum notitiam consequuntur ; discen-  
 di plura succrescit cupiditas , coemun-  
 tur paulatim libri , leguntur , non ra-  
 ro censorio etiam oculo excutiuntur .  
 Ergo totam hanc , quæ longe lateque  
 patet , differendi provinciam istiusmo-  
 di eruditis concedet orator , finet-  
 que eos per omnia facultatum genera  
 libere excurrere , neque subirascetur ,  
 si ad oratoriæ artis dignitatem com-  
 mendandam disputationis æstu delati ,  
 infinitum eorum , qui græce , & lati-  
 ne scripsere , numerum referant ; si  
 ad elegantiam Ciceronis arripiendam  
 venustos librorum titulos fuggerant ;  
*Gemmulas , Corollas , Scintillas Tul-*  
*lianas , Prætextatas latine loquendi for-*  
*mas ; si Ramum aureum , Hymettum ,*  
*Armamentarium phrasium* pleno ore  
 prædicent ; si libellorum Auctores ,  
 Mejneros , Haganæos , Duncanos ,  
 Craut

Crautferos, Barios, Carpentarios, inaudita nomina recitent; immo collaudabit, quod qui audiunt, intelligant, præter Pontanos, Doletos, Passeratios, Nizolios, alios strenuos *Lexicographos* in commune studiõsorum bonum lucubratiunculas suas contulisse. Quod ad oratorem ipsum attinet, neque omnes libros legere potest, neque debet; libros dico? vix scriptorum indices, quos in multa, eaque ingentia volumina Lambecii, Lipenii; aliique laboris patientissimi, ac vere *ῥαλξέστεροι* redigere conati sunt, vix tanti pendat, ut quamvis sit otiosissimus, oculis universos percurrat, nedum singulos memoria comprehendat. Paucos igitur evolvat, & optimos, ac tantum indidem sumet, quantum ad ornandam orationem conducit: <sup>(\*)</sup> quo vero nomine primus Grammaticus appellaretur, quot Pytha-

\* *Æneis visceribus.*

† (a) *Agellius Noë, Att. l. 14. cap. 6.*

thagoræ nobiles fuerint , qui sint ver-  
sus apud Homerum *ἰσοδύποι* , &  
sexcenta similia miracula , ac vatici-  
nia , hujuscemodi artem profitentibus ,  
perlubenter discutienda permittet . Sa-  
tis est oratori , nobisque , qui pro vi-  
rili huic insistimus viæ , satis est ad om-  
nes opportunitates parata habere scri-  
nia , ubi probatissimi scriptores asser-  
vantur , neque ignorare , qui subli-  
mia , & pulchra contineant ; qui cum  
judicio , ac metu evolvendi sint , & a  
quibus manus pariter , & oculi absti-  
nendi . Hæc si conabimur , ut conari  
certe oportet in tanta hujusce seculi er-  
ga humanitatis studia propensione ,  
tanta litteratissimorum hominum no-  
va quotidie in lucem producentium in-  
dustria , tanta Principis Eminentissi-  
mi in litterarum felicitate amplifican-  
da cura , qui par ubique sibi , par  
magnificentiae , quæ præstantium vi-  
rorum propria virtus est , splendidam  
perutilium librorum editionem nobis

L

in-

inculcat , suoque exemplo promovet ,  
non erit , cur pulcherrimam eruditio-  
nis ad eloquentiam supellectilem ad-  
modum aliis invidemus .



## ARGUMENTUM

## SEXTÆ ORATIONIS.



Ideorū mihi, Lector bene-vole, susceptum jamdiu in oratoria palestra cursum constanter tenere, qui habita superiore anno de eruditione orationi eam nunc, quæ ad Criticum studium pertinet, subjicio. Est istuc quidem, non diffiteor, latissimo fusu, nullisque certis finibus circumscriptum; quippe quod per omnes disciplinas, ac scientias excurrit, nullamque penitus prætermittit, in quam non se inferat, suumque jus non liberrime exerceat. Sed Criticæ artis indolem attentius perspicienti, compertum illico fit, hocce munus



omne , quod ad aliena scripta expendenda spectat , eruditi præsertim hominibus sedulitatem efflagitare . Quare in libris de Oratore Tullius mature monet adolescentes , omnium bonarum artium scriptores , doctoresque non legendos modo , sed interpretandos etiam , qua parte ardui sint , & obscuri , corrigendos , refellendos , vituperandosque , ubi credant aut falsa , aut ambigua , aut non vero similia litteris eos tradidisse . Id autem non in fictis modo certaminibus , quorum finis est ingenii , & memoriæ exercitatio , sed multo magis in acie forensi præstare debet orator , ubi , quid cubiculo inclusus commentatus fuerit , quæ rationum momenta ad firmandam causam in medium attulerit , quæ e remota , quæ e proxima antiquitate ad orationis ornatum selegerit , curiose inquiritur . Væ porro illi , si in veterum , & recentium Auctorum libris citandis indiligens deprehendatur , aut oscitans , ac pene dormiens videatur gravissima historicorum scripta percurrisse , & concidit statim

tim fides , neque desunt Momi , qui na-  
sum extemplo corrugent , totumque opus  
procaci saeva dirigant . Quae calamitas  
ne contingat , diligentissime providendum  
est oratori , citraque omnem animi cupi-  
ditatem , integre , sincereque , quicquid  
aliunde , sive ab historicis , sive a poe-  
tis , sive a philosophis depromitur , per-  
lustrandum ; neque hic consistat , sed  
ultra velim progrediatur , indagetque  
praeterea , quid de hujusmodi scriptoribus  
eruditissima ingenia sentiant ; quodnam  
judicium ferant . In quo tamen cautio  
maxima adhibenda est , quod non pro-  
miscue omnibus , neque nominis celebri-  
tate praclaris , sed iis tantummodo cre-  
dendum , qui puro litterariae rei illustran-  
dae studio , non privata alia de causa ad  
criticam exercendam impelluntur . Sit ne  
vero facile hosce incorruptos iudices repe-  
rire , omni affectione vacuos , & vere  
ἀπαθείς , ut Graeci vocant , alienum  
judicium esto : tam multa siquidem in

L 3

ipsa

• Affectibus carentes.

*ipsa oratione de Criticorum varia natura  
occurrant dicenda, ut satis superque sint,  
que ad tuum præparandum, Lector,  
animum, ac benevolentiam demeren-  
dam præmittimus.*



ORA-

# O R A T I O

## S E X T A.

*Neque claris Scriptoribus, neque eorum  
Criticiſ habenda fides omnis.*



**S**i pulcherrimarum doctores artium, qui florentem ætatem perpetuis laboribus attrivere, ut exquisita ingenii, doctrinæque suæ monimenta in ævum omne producerent, quam sibi unice cordi fuisse dictitant, re etiam ipsa veritatem semper complecterentur; meo me satis defunctum munere existimarem, qui adolescentes nostros anno præterito commonueram, ut in immensa eruditionis copia ad eloquentiæ ornamentum e puris fontibus deriva-

da , certis sese terminis continerent .  
 Verum , quoniam egregii viri , ut in  
 optimis excolendis disciplinis conati  
 postrema fuerint , non de sua polliceri  
 tantum virtute potuerunt , ut non in  
 devia aliquando , ac prærumpita incauti  
 delaberentur ; non exiguum me præ-  
 tium operæ facturum puto , si de alte-  
 ra litteraturæ parte , quæ eruditionis  
 fida veluti comes est , aberrantemque  
 in recta compellit , de Critica hodierna  
 die disputavero . Video equidem , qui  
 tam anceps sibi negotium tractandum  
 sumit , in eum locum adduci , ut si  
 communi fere omnium consensu scri-  
 ptores celebratissimos in discrimen vo-  
 cet , deque eorum pervagata fama pau-  
 lum decutiat , audacis notam non ef-  
 fugiat apud eos potissimum , qui om-  
 nia in magnis Auctoribus admirantur :  
 sin maculas ; quibus aurea etiam præ-  
 cellentium ingeniorum scripta consper-  
 sa sunt , de industria dissimulet , ac  
 silentio prætereat , suis videatur præ-  
 iner-

inertia partibus defuisse . Attamen ; ita me ament Superi , ac saluum velint , quid de toto hoc litterarum genere ipse sentiam , atque , ut verius dicam , quid homines sentiant cordatissimi , adeo integre exponere in animo est , ut quæ singulorum industriæ propria censetur merces , laudem debitam tribuamus ; & quam in præsentis censoris personam fuscipio , cum minima aliorum offensa tuear . Duo enim mihi , quemadmodum anno superiore fecimus , esse hodie præstanda intelligo , quorum alterum cujusque generis scriptores , alterum ipsos Scriptorum judices proxime attingit . Examinanda primum sunt oratori , quæ litteris tum philosophi , tum historici prodidere ; ut quæ prava , & fucolita reperiuntur , tamquam orationis sanitatem contaminantia lenocinia , rejiciat ; quæ doctrinæ bonitatem sapiunt , ut saluberrima dictionis condimenta , ad scribendum traducat . Quoniam

niam verò Critici suam illam virgulam promiscue in omnes expedire solent , seque , volentibus sanos a vitiosis discernere , ductores certissimos profitentur ; non est nobis ita facile committendum , ut ad horum sequenda judicia temere , & inconsulto feramur . Quemadmodum enim , quæ humanæ naturæ imbecillitas est , vel acutissimi præceptores artium interdum hallucinantur , neque tam affabre dolatum opus in lucem proferre possunt , in quod nævus aliquis non irrepsit ; ita non minus peccare graviter in iudicando arbitror , qui ad eorum vitia castiganda oculos animumque convertunt . Non est igitur magnis nominibus tantum tribuendum , ut dispiciendis , cognoscendisque propius utrorumque scriptis , iudiciisque nullus oratori reliquus locus sit ; imo tanto intendenda acrius acies , quanto hinc virtutibus commixta vitia securius latent , earumque splendido oblecta vultu , pro  
vir-

virtutibus sæpissime venditantur ; il-  
 linc præstantium virorum auctoritas fa-  
 cilius famæ claritate simplices , & im-  
 providos fallit.

Gravius fortasse , quam ampla di-  
 cendi provincia ferat , oratori videbor  
 onus imponere , qui præter eruditio-  
 nem e probatissimis Auctoribus colli-  
 gendam , criticum quoque studium  
 adjiciam , mole sua prope infinitum ,  
 multoque magis , rei tractatione lubri-  
 ca , exercenti periculosum . At qui  
 molestam , ac difficilem aliena inve-  
 stigandi , excutiendique attentius cu-  
 ram non probant , si serio reputent se-  
 cum ipsi , neminem ex antiquis , &  
 recentioribus ad absolutam facundiæ  
 laudem pervenire potuisse , qui non  
 artem criticam ad quodlibet scientiæ  
 genus percurrendum adhibuerit , non  
 dubito quin recte nobiscum sentiant ,  
 tamque necessariam judicandi discipli-  
 nam dicenti putent , quam longum ,  
 & arduum iter suscipienti , necesse est  
 pro-



probum sibi ducem adjungere, qui inter  
 multiplices, ac tortuosas vias doceat,  
 qua tuto eundum sit, moneatque  
 suspecta loca, unde timeri insidiæ so-  
 lent. Neque vero aliam fuisse causam  
 existimo, cur clarissimi viri a recta sæ-  
 pe semita aberrarint, inque erroris sui  
 societatem alios etiam adduxerint, ni-  
 si quod vel negligentes nimium, vel  
 nimium creduli, nullo ante rerum  
 certo delectu habito, omnia ad dicen-  
 dum traduxerint, quæ sibi majores o-  
 lim tradidere. Quod si antequam ope-  
 ri perficiundo extremas admovent  
 manus, æqua lance expendissent, quæ  
 a philosophis, poetis, historicis ad  
 ipsos pervenere, & citra cujusvis amo-  
 rem, & odium, illorum scripta, opi-  
 nionesque maturius examinassent; &  
 propius ad veritatem accederet eorum  
 dictio, neque ipsi apud Criticos, ut  
 quotidie contingit, de prudentia, ac  
 diligentia sua dimicarent. Atque inter  
 ceteros fontes, unde omnium libera-  
 lium

lium

lium disciplinarum hausti quasi latices, ad eloquentiam uberiore alveo propagandam deducti sunt, principem Græcis, ac Latinis locum tribuendum esse, nemo inficias iverit; qui veterum exempla sibi ponens ante oculos, statim intelligat, quanta utrinque in reliquos populos eruditio, & æmulandi similia ardor, redundarit. Et Græci quidem, quos, ut Chaldæos, Ægyptios, aliosque longe remotos prætereamus, proximos nobis omnis literaturæ auctores lubenter fatemur, ingenii, solique quadam peculiari ubertate, pacisque, & otii diuturni bono usi, tantum ad Musas & severas, & lætiores perpoliendas industriæ contulerunt, ut nihil amplius eorum addi solertiæ, supereffundenti sese tamen, & exuberanti undique veluti torrenti, videantur demi multa posse. Sive enim nationis indoles ita tulerit, ut iis non contenta, quæ ab aliis acceperat, non pauca etiam ipsa inveniret; sive

fe

se melius posse in legentium animos obrepere suspicaretur , si varias identidem illecebras scribendo immisceret ; sive demum aliunde desumeret obvia quælibet sine discrimine ; eorum certe libri tot passim mendaciis aspersi sunt , ut non immerito Græcia & omnigenæ eruditionis , & fabularum , quotquot unquam extitere , mater a multis appelletur. Non vereor apud prudentissimos Auditores , ne paulo audacior videar , & in dicendo insolentior , qui elegantiae , & humanitatis communem parentem tam male initio accipiam , cui debemus præcipua doctrinae ornamenta , & gratum , quoad vita suppetet , animum profitebimur : neque enim hic M. Tullium , T. Livium , Plinium majorem , Valerium Maximum testes appello , latinos homines , & gloriae æmulatione jure suspectos ; Græcos ipsos , Pausaniam , Strabonem , Diodorum Siculum testor , penes quos nulla suos calumniandi causa esse

esse potuit, qui non uno, aut altero;  
 sed pluribus affirmant locis, se inania;  
 & vulgi sermonibus protrita scribere;  
 universas autem Græcorum historias  
 tam frequentibus inquinari fallaciis,  
 ut major a nonnullis Hesiodo, & Ho-  
 mero, qui fabulosos musarum montes  
 conscendunt, quam Ctesia, Herodo-  
 to, & Hellanico, qui historicum de-  
 currunt pulverem, habeatur fides.  
 Quot enim, & quanta Herodotus,  
 qui a Tullio tamen historię pater vo-  
 citatur, quot inquam, & quanta com-  
 menta ubique nobis obtrudit; unde  
 non poeticę solum, sed romanenses  
 etiam fabellę per omnes propemodum  
 terras mirifice disseminate sunt? Non  
 quæro cum Scaligero, num elegantis-  
 simus ceteroquin Scriptor, ea bonita-  
 te fuerit, qui, quę in lucem ediderit,  
 crediderit etiam omnia; num Ægy-  
 ptii, quorum prodigia ad legentis fa-  
 tictatem identidem narrat, ut pere-  
 grino, eorumque stropharum non sa-  
 tis

tis perito illuſerint ; num denique nationis vitio laborarit : idem enim Scalliger epistolâs omnes , quæ philosophis Democrito , Soloni , Pittaco Mitylenæo a Diogene Laertio in eorum vitis tribuuntur , a græcis confectas esse opinatur , quibus nunquam mentiri neque facultas , neque voluntas defuit : hoc enim si concedimus , jam nihil ferme est in Græcia , quod , ut verum sincerumque , sit recipiendum : sed sapientissimus , credo , Criticus monitos nos esse voluit , non esse temere ad eos convolandum , qui ingentia , & fumosa nomina præ se ferunt ; sed diligentissime investigandum , num sibi semper consentiant ; num loca locis , tempora temporibus æque conveniant ; num historiographi moribus , institutis , personis congrua , & opportuna recenscant ; num plus quam oporteat , laudis , dignitatis , & gratiæ suis popularibus largiantur . Quod assentandi vitium , aut a

Græ-

Græcis, quod verosimilius est, aut ab aliis primo profectum, ad reliquas deinde gentes celerrime propagatum, tam altas radices egit, ut omnem historiæ candorem (luctuosum veritatis magistræ fatum) pene infuscarit. Da enim mihi historicum tam integrum, tam fidelem; tam purum, quem non favor, non invidia, non timor potentum, non ingentes conceptæ spes, a vero abduxerint; da qui aliena facta sine ullo fuce referat, qui patriæ suæ eam gloriam tribuat, quam, non dicam hostes, sed sui sine invidia, aut verecundia ferre possint. Nemo ferme est, qui bellica virtute præstantem ducem commendaturus, medium inter Herculē, & Achillem statim non collocet; nemo contra, qui fœda alterius flagitiâ improbaturus, infra extrema nequitia monstra non ableget. Nihil hic dico de Philostrato, qui Apollonii Thyanæi miracula tam magnificis verbis extulit, ut eorum ma-

M

gni-

gnitudine deceptus Caracalla , ad perpetuam viri memoriam heroicum ei monumentum crexerit ; nihil de Xenophonte , qui Cyrum regem talem legentibus exhibet , qualem esse fortasse oportuit , non qualis revera fuerit . Hos , eorumque similes ad fabulatores proxime accedentes , consulto prætereo . Mihi sit instar omnium Plutarchus a doctrina , & sapientia apprime instructus , in publicis , privatisque negotiis ita versatus , ut ad aliorum res gestas excutiendas severus magis iudex , quam narrator diligens videatur . Ubi enim scriptor eximius græcos imperatores græcis comparat ; neque fide , neque scriptione usquam nutat . Ubi autem Græcorum procerum cum Romanis comparisonem instituit , & utri utris militari , & civili scientia antecelluerint , inquit , Plutarchum in Plutarcho desidero . Habuit enim Græcia domi forisque principes spectatissimos , qui summis in utraque fortuna exer-

exercendis virtutibus , omnium in se admirationem converterunt. Sed quid est aliud , Aristidem Catoni , Lyfandrum Syllæ , Marcello Pelopidam , Agesilaum Pompejo , quam pumilios , ut Bodini verbis utamur , gigantibus anteferre ? Deficiat mihi profecto dies , si non dicam singula , sed universa velim vitia dicendo percurrere , in quæ bene multi non ex historicis solum , sed e poetis etiam , quibus tamen semper licuit tentare , & fingere aliquid præter naturæ ordinem , inconsulto inciderunt . Nullæ igitur inquiet aliquis , in latinis scriptoribus labes sunt , maculæ nullæ , ut fas propterea sit in Latium omne tuto inferre pedem , omnemque eruditionem , ut sartam rectamque semper habitam , ad oratorum opportunitates impavide convertere . Delirare merito videar , si hæc sentiam , aut pronuntiem , qui optime noverim , eam humanarum rerum esse conditionem , ut nemo unus reperiri



possit, qui fuerit virtutibus omnibus absolutus. Quis enim e latinis poetis, ut alios prætereamus, ad Homeri gloriam propius accessit, & plurima ab illo desumpta fonte, fecit digerendo meliora? quis, inquam, Virgilio Marone verbis concinnior, rerum delectu callidior, in effingendis, subjiciendisque certaminibus politior idem, & par-cior? Atqui non satis ille Romanæ so-bolis dignitati visus est apte consulere, cujus conditorem Dares Phrygius, Di-ctys Cretensis, Menecrates Sanctius a-pud Dionysium Halicarnassensem Tro-jam prodidisse ferunt: neque poetam ab hac labe purgant Smyrnæi, Triphio-dori, Livii, Philostrati testimonia, qui Ilii incensi causas omnino contrarias libris suis persequuntur. Quis enim in rei tanti momenti origine repetenda, qualis Roma est, futura aliquando omnium terrarum domina, & splen-didissimam Cæsaris Augusti complexu-ra familiam, cujus immortalis nomini uni-

unice serviebatur ; quis , inquam , et si maxime gratificari cupiat , suumque palpare principem , sibi in Cœlum efferendum virum seligat , famæ apud historicos suspicione laborantem ? Nimirum vel viri perspicacissimi fabricæ struendæ intentiores , aut ingenio suo liberius indulgentes , aut ad adulandum nimium compositi , aut immenso cedentes oneri , aliquando elanguere ; quod si Vopisco teste , vix unum historicum licet nobis producere , qui falsitatis non arguatur , palamque ostendere possumus , in quo Livius , Sallustius , Cornelius Tacitus , Trogus , manifestis testibus convincantur : quid de philosophis sentiendum est , solutioribus hominibus , & ad pugnandum maxime factis , quorum variæ , & inter se discrepantes opiniones , infinitas pene familias , neque sibi consentientes peperere ? Quoties enim M. Tullius Theophrasti , Platonis , Aristotelis doctrinam lau-

dat, ac ne latum quidem unguem ab eorum vestigiis sibi esse discedendum putat? quoties tamen idem, mutata repente facie, in eos stilum convertit, quos modo philosophiæ antesignanos secutus fuerat, neque dubitat eorum apertam inconstantiam, levitatemque in libris de Legibus, de Natura Deorum, de Divinatione, redarguere? Quare incredibili perspicacia opus est, ut veraces a mendacibus, futes a solidis, instabiles a constantibus distinguas; quod ubi feceris, alterum illud restat diligentissime animadvertendum, ut qui de historicis, philosophis, poetis judicium ferunt, eorumque placita, narrationes, & fabulas ex instituto expendunt, tibi gravi suo supercilio, & quadam nominis præoccupata fama, censores non imponant.

Queruntur quotidie homines, eo jam licentiæ Criticam provectam esse, ut nisi frenos quam citissime injicias, nihil in tota re litteraria integrum ab  
ejus

ejus, manibus relinquatur : curiosissimam scriptorum circumspectatricem , cum suis illis oculis emissitiis , quæritare anxie , ubi licet , ubi non licet , ansam ad reprehendendum ; nullum personarum ; nullum antiquitatis , auctoritatis nullum amplius discrimen facere ; rigidam , acerbam , morosam , promiscue omnes , dignos , indignos ad superbum tribunal trahere : ibi tuentem torva , flagello armatam , acetoplenam , rimari minutissime dicta , & sensa singula , ultimosque Auctorum recessus pervadere ; in peccantes , aut peccare creditos , immisericordem prorsus esse , inexorabilemque ; & quod nullo modo ferendum sit , immortales viros , quos endo Cœlo , ut ille inquit , olim merita locavere , illinc audacter deripere , & scutica ad arbitrium cæfos , cerdonibus exponere irridendos ; huic demere laureæ insignia , quæ per tot annos adhæserant innocuo capiti , & ad historiographos rejicere ; il-

lum ex oratorum albo expungere , & ad clamorosos amandare rabulas ; neminem unum ad quæstionem arreptum dimittere , cui non aliquam censoriam notam inurat . Quid autem iniquius , ajunt , quam dirimendæ litis eundem ipsum sedere judicem , qui ad accusandum accessit ; qui crimen , unde unde potest , intentat ; qui alienam estimationem , vera , falsa opponendo , conatur imminuere , immo penitus deterere ? Non possunt non infida esse , non tristia , non contumeliosa judicia , quæ ab exulcerato corde feruntur : quæ mera carpendi libido , quæ livor , & odium , quæ reliquæ pestes animi , malefanz , nigræque cupiditates , fas omne , si irritentur , perrumpere paratissimæ præcurrunt . Hæc , & his multo plura vociferantur , qui sibi , suisque imminentem Criticorum ferulam reformidant ; neque concoquere ullo pacto possunt , otiosissimos fere homines , & ad objurgandum solummodo

na-

natos , per omnes disciplinas tam impotenter grassari , ut legitimos veterum libros pro libidine extrudant ; supponant adulterinos ; notent , vertant , invertant , atque adeo pervertant omnia : quid plura ? tanquam supremi litterarum arbitri de cujusque ingenio , de facultate , ac , si Diis placet , de fortuna etiam decernant . Sane si amarulenta ægre ferunt convicia , quibus scatent Zoili nonnulli , Momique dicaces , qui de tabula non ante manum tollunt , quam quæ scribentibus objiciunt , atra lolligine perfricuerint ; jure istorum licentiam damnant , moremque improbum execrantur . Ceterum si ad commune litterarum bonum , lumenque omnibus studiosis afferendum , divinitus excogitatam artem incusant , & quasi literatis quid ominosum ac triste , tolli de medio cupiunt ; næ illi volentes lubentesque cæcutiunt , & inepto , ne reprehendantur , timore perculsi , &

fi-

sibi , & ceteris irreparabile malum creant . Est enim majoribus nostris , qui ad eloquentiæ fastigium , asperum , ac senticosum iter , per arcta , & intentata animose vadendo , nobis primi explanarunt ; sempiterna utique gratia profitenda ; & quod multorum annorum series ; doctissimorum judicum , ac gentium plurimarum consensio recepit ; per me ratum firmumque habendum ; sed nimis hercle boni sumus , si in vitiis ; quæ vel negligentia , vel incitia Antiquis excidere , non conivcamus solum , verum etiam veluti pretiosissimas verendæ ætatis reliquias , religiosissime amplectamur . Fuit quondam , fuit , cum rudes homines , aut nimium simplices , sola dicentium opinione ducti , in eorum jurarent verba , ac tanquam oraculi responsa , quæ publice , aut privatim docerent , ultro acciperent , ac revererentur : immo quanto immaniora invehebantur mendacia , tanto avidius arriperent , parati

ti non a faba tantum , sed ab hordeo ; & cicere , si magistro ita videretur , abstinere . Non ad exactam , quæ monumentis litterarum traderentur , trutinam tunc revocabant ; quæ rumor , crebrique sermones in vulgus spargerent , non ad lydium lapidem exigebant : si mures in æde Jovis aurum corrofissent ; si bos in foro boario intertiam contignationem sua sponte ascendisset ; si pulli gallinacei cum ternis pedibus nati essent ; portentum arbitrabantur , ne solemnī quidem hecatombe averruncandum , nisi historiæ statim consignarent . Excussere tam supinam simplicitatem posteriora secula , eoque præcipue intenta , ut lynceum ubique oculum circumferrent , neque rumusculis , & vetustati tantum tribuerent , ut nullus inquirendæ veritati locus esset ; innumera , eaque oppido enormia , quæ a primis sapientiæ parentibus , ut certa veri principia , admittebantur , anilia demum partim

ter.



terriculamenta , partim puris putis op-  
 pleta inaniis commenta , detexere .  
 Quorum studium , ac sedulitatem imi-  
 tati deinde alii , vix dici potest , quan-  
 tum amœnioribus gravioribusque di-  
 sciplinis per hæc indagine emolu-  
 menti importarint . Atque utinam di-  
 sceptandi facultas penes doctos tantum ,  
 deque publica utilitate sollicitos semper  
 constitisset , neque ad leves etiam , ac  
 trioboli homunciones devenisset ; me-  
 lius multo cum litteris , earumque a-  
 matoribus ageretur , neque tam crebræ  
 invidiæ flammæ in innoxiam artem  
 succenderentur . Quanta enim rerum  
 experientia , quanto ingenio , quan-  
 to mentis acumine præditus sis oport-  
 tet , ut opus tam lubricum , tam sale-  
 brosum , tot undique periculis ple-  
 num , si non rara cum laude , cum  
 minima saltem invidia exerceas ? quot  
 poetas , historicos , philosophos , quot  
 eorum censores evolvas , mature ex-  
 pendas , inter se omnium , ac singu-  
 lo-

lorum opinationes conferas necesse est, ut veram, certamque sententiam, nullo tribuno plebis intercedente, pronunties? Est ne ita facile reperire, qui scriptorum sensus semper assequantur; qui eundem semper scopum attingant; neque a recto unquam itinere, in avia, aut spinosa rapiantur? Fac tamen reperias; quid si supercilium censorium extulere, ut majoribus contradicerent, ut solertiam suam in aliorum laboribus ponderandis ostentarent, ut nova, neque ab aliis animadversa, obijcere viderentur? Eos ne tanti facias, ut eorum judicio statim æquiescas, neque sollicite explores, num aliquando ad tempus ascita vafritie nimis bonos decipiant, num aliquando ipsi temere decipiantur? His adde præoccupatas opiniones, quas una cum lacte combibere; adde studium partium, quo impulsæ plerique, non quæ sunt optima, sed quæ sibi probantur, aut probari volunt, obfirmato propu-

pugnant animo; adde privatas inimicitias, domesticum & quotidianum malum, quæ semper effecere, ut quos antea in oculis ferebamus, vel si aureum facundiæ flumen effunderent, oclufis ad omnem suavitatem auribus, fastidiremus. Nam gentis, patriæ, sanguinis rationem, quis ignorat eo usque in hominum animis valuisse, ut non privati modo, sed publicæ etiam Academiæ, si quis e suis de parta semel laude apud alienigenas disceptaret, quasi classico signo dato, ad arma simul ruerent, & infandos interdum tumultus, interdum etiam ridendos commoverent? Ego equidem, si quemadmodum in forensibus negotiis fieri solet, ut perorata utrinque causâ, tum demum universa rei summa integro, peritoque judici decernenda subijciatur, ita in litterariis contingeret certaminibus; ultro auctor essem, ut quæ passim circumferuntur judicia, tanquam legitima; & incorrupta exci-

pe-

perentur. At cum litterarum ea fere conditio sit, ut doctissimorum scripta eorum subeant oculos, qui æstuantium cupiditatum impetu rapti, defendentium, vel accusantium personam induunt, eo maxime nomine Criticos suspectos esse contendo, quod Auctoribus præter jus fasque vel addicti, vel infensi, arguant non arguenda, & quæ nullo modo defendi possunt, neque debent, impudenter aliquando defendant. Agite dum grande illud in utraque fortuna humanæ prudentiæ exemplum apud Hømerum Ulysses inspicere, & poetæ in decoro servando curam, & Censorum in vate protegendo calliditatem, excutere tantisper liceat. Ab Alcinoο Phæacensium rege, a quo benigne exceptus hospitio fuerat Ulysses, donis tandem onustus dimittitur, & in patriam remigraturus, solvit e littore. Faustis ominibus feratur navis, quæ talem tantamque sapientiam vehit. Sed illum repente lon-

... 6

go,

go, credo, defessum itinere, tam altus somnus occupat, ut ne ad Ithacæ quidem portum appulsus excitetur. Quid igitur navi catique remiges? Supra hoc genus hominum providi, urbanique, Ulyssem e navi leniter efferrunt, mollique cum lino, culcita, ac muneribus in arena deponunt, jamque Phæaciam repetituri relinquunt, *toto proflantem pectore somnum*. Perpol pulcherrimum factum, ac posterorum memoria dignum! Siccine eximium virtute virum, perhonorifice ab rege cultum, singulari benevolentiae significatione ab eo perornatum, tanquam vilissimum mancipium deferere, ac solum, dormientemque certissimæ prædonum avaritiæ objicere? Ulyssem vero, quem mihi, Mæonide, prudentissimum ubique prædicas, tamdiu, tam difficili navigatione securum quiescere, neque e veterno, sibi alias, fociisque nimis funesto, inter rudentum, ac navigantium strido,

rem

rem, expergisci potuisse? Ecce autem pro Homero accurrit Criticorum delecta cohors, qui dubitandi omnem illico tibi scrupulum eximunt, ac divinum hocce inaudito spectaculo poetæ consilium aperiunt. Puduit, inquit Eustathius, Phæacenses puduit, vectorem munificum expergefaccere, ne nauli mercedem exigere viderentur. Modesti scilicet hujusmodi homines sunt, & si quid subolet lucellum, manus temperatissimas continent. At reponit Spondanus, si officii persolvendi gratia nautæ humanissimi domum usque Ulyssem persecuti essent, procos ulciscendi opportunitatem ei a domesticis statim cognito ademissent; quasi vero nulla alia ratio callido Laertiadi suppeteret, qua luxuriantem turbam everteret, suosque e dira illa nebulonum colluvie in libertatem pristinam vindicaret. Sed hæ germanæ geræ, & solemnia delirantium somnia. Quid ergo medicinæ efficacioris Maz-

N

zo-

zonius , Viperanus , Canterus exco-  
 gitant , ut sanent hæc cruda vulnera ?  
 Illi vero a tropis , ab allegoriis , a fi-  
 guris auxilium petunt , ultima Inter-  
 pretum confugia ; quæ si admittimus ,  
 nullum amplius tam male affectum  
 opus est , quod præsentissimo hoc me-  
 dicamine non curetur. Atqui si Benii ,  
 & Castelvetri pronuntient , multo al-  
 tius Ulysse , Homerum ipsum , cum  
 talia fingeret , dormitasse , *clament pe-  
 riisse pudorem cuncti pene patres* , qui  
 ejus antiquitatem , claritatemque no-  
 minis venerati , sibi jam persuaserint ,  
 poetarum principem potuisse labi nun-  
 quam ; quin etiam summæ prudentiæ  
 Ulyssis ascribant , quod , ut mollissi-  
 mæ gentis inserviat ingenio , minime  
 dubitet versare naturam suam , seque  
 cum Phæacensibus ad multam crapu-  
 lam vino madefacere ; quod in aulam  
 Regis ingressus , ut se Alcinoos com-  
 mendat , fateatur palam , ab imis un-  
 guibus ad supremum usque verticem  
 se

se ex fraudibus , mendaciisque constare totum . Intelligitis , vel me tacentem , Auditores , quam absorta proferre Critici ad incitas redacti cogantur ; ut non ita facile sit statuere , Homerus ne , qui fuerit interdum absurda commentus , an culpandi magis interpretes , qui ineptias omnes profligata fronte propugnant . Neque hæc cum oppono , ita me poetæ infensum aliquis velim putet , ut , quemadmodum Joseph Scaliger , Ludovicus de la Cerda , Guilielmus Modicius instituerunt , ei in omnibus Virgilium anteponam . Eximiæ in Homero virtutes sunt , æternisque laudibus prædicandæ , *sunt delicta tamen , quibus ignorasse velimus* ; sed condonanda vitia , non portenta sunt , neque omnia ad Homerum , tanquam ad normam , sed & ipsum ad normam revocandum esse , Censores optimi iudicarunt . Quare ut , unde est orsa , in eodem terminetur oratio ; neque magnis scriptoribus , ne-



que eorum Criticis tantum a nobis desiderandum est , ut ad eruditionem comparandam omnia promiscue ab omnibus colligamus ; sed diligentissime animadvertendum , qui bona , qui sana , qui prava contra , & non sincera contineant ; ut nunquam in alienis opibus depromendis a recto tramite discedamus ; sequamurque Criticos , qui integritate , ac prudentia , meroque veritatis detegendæ amore , non odio , non invidia , non partium studio ad judicandum rapiuntur ; paucis completor omnia , hos præstantissimos doctrinæ , & eruditionis Cultores imitemur , quorum curæ , cogitationesque in id intenduntur , ut ipsi quidem immortali fama digna moliantur quotidie ; alios autem eisdem spiritus , & sensa nutriendos , pro ea , qua sunt morum elegantia , & humanitate , non cessent & acutissimis stimulis , & exemplo suo ad ingentia cohortari .

ORA-

# ORATIO SEPTIMA

IN FUNERE

JOANNIS FRANCISCI  
CARDINALIS BARBADICI

*Episcopi Patavini.*



Uctuolissimam totius Patavinae Ecclesiae calamitatem, quam proxime elapsis mensibus taciti, consternatique horrebamus, si Præsulem nobis optimum funestus aliquis, qui jam jam imminabat, casus eripuisset; ecce nunc publico squalore, ac sordibus obsiti, cogimur nec opinato singultu, ac gemitu miserari. Pro acerbus dolor;

N 3 pro

pro fatum triste , pro dira præteritorum temporum recordatio ! Ita ne vero Episcopum amantissimum , cuius optabili nuper aspectu , ubi , receptis e periculosa ægrotatione viribus , in hanc primum lucem celebritatemque processit , singuli & universi recreati sumus , cui sospiti jam , ut videbatur , & incolumi , firmam constantemque ad multos annos valetudinem a superis comprecabamur ; nunc improvise dejectum quasi turbine , jacentem , exanimem intueri ? Ergo ne Joannes Franciscæ Cardinalis , splendidum Barbadicæ , atque adeo Venetæ sapientiæ decus , solidum hujusce Civitatis columnen , ac solatium ; in quo Pastore vigilantissimo omnes Patavini gregis spes tutissime conquiescebant ; tam subito nostris te oculis subtraxisti , ut de tuo prius interitu , quam de periculo , aures nostras fatalis nuntius percelleret ? Affulserat , priore depulso metu , lacrymisque detergis , sollicitis

tis hominum frontibus hilarior serenitas , spesque animos nostros certa ceperat , fore , ut cujus incomparabilem in suos liberos charitatem , incredibilem in bonos omnes humanitatem experti eramus , earum rerum fructus uberrimos per ipsum in posterum colligeremus : neque fieri unquam posse quisquam putavit , ut effusa illa civium lætitia , sinceræ omnium ordinum gratulationes , quas privatorum benevolentia , & verus virtutis amor in Principem amplissimum expresse-  
rat , uno repente ictu evanescerent , & gestientis modo populi voces importunus moeror ac fletus , lugubresque lamentationes contaminarent . Mihi vero , cui solemnisi proludendi studiis nostris propior aderat dies , quid expectandum minus fuit , quam ut mutata extemplo rerum facie , quem Musarum nostrarum eximium Auspicem , ac Patronum , judicemque ejusque indolis & industriæ æquissimum

toties senferamus , ei repentino morbo sublato , indictis publice exequiis , oratione parentarem ? Quod sane mœstum officium , quandoquidem persolvendum est , non modo non detrecto , sed æquo lubentique etiam animo suscipio , ut quam vivo semper , ac florenti observantiam , & venerationem summam professi fuimus , extincto nunc , quo demum cunque pacto , quibusque verbis possumus , testatam omnibus exhibeamus . Ea enim Cardinalis Barbadici vitæ ratio & cursus fuit , sive illum in Pastoralis munere , sive in edita Principis Romanæ Curiae dignitate spectamus , ut maximas , minimasque virtutes miro quodam modo complexus , in sui admirationem , laudationemque sapientes homines , & primi subsellii oratores sæpe ac sæpius pertraxerit . Ego tamen non tantum mihi tribuo , ut omnes ejus dotes , quæque egregias dotes pari ubique passu exæquarunt , præclarissima ejus

fa-

facta ornare me elucubrata dictione posse confidam. Quæ perturbati pectoris dolor, quæ filii in parentem pietas, quæ defuncti desiderium tam turbido miseroque tempore decora objecit, breviter, simpliciterque percurram, & communem ex hac ingenti jactura luctum, præcipuarum laudum commemoratione, lenire conabor.

Si in tam amplo excellentium virtutum veluti campo nulla mihi ad absolutissimam tanti Præsulis commendationem seges alia suppeteret, nisi admirabilis, sibi que perpetuo consentiens trium Episcopatum gubernatio, quibus triginta & amplius annos peculiari fide, integritate, & cura Barbadicus præfuit; hoc satis superque; nisi fallor, laudum grande præconium foret, & ad Joannis Francisci memoriam in omnes posteros propagandam momentum inter cetera validissimum. Tres enim subinde Ecclesias, Urbium amplitudine insignes, multi-  
plici

plici regimine vastas, ingenio, & moribus longe dispares, ea tamen dexterritate, ac prudentia administrare, malisque, si qua forte ad intercipiendam quietem erumperent, præsentī ita ope mederi, ut non modo nullius offendas animum, nullius pectus exasperes, sed omnium in te oculos, ac benevolentiam præ gaudio percepti inde fructus convertas; hominis est, divina quadam præditi mente, & a natura, & a doctrina supra mortalium conditionem felicissime instituti. Non deerant illi quidem, si ad secularia intenderet animum, rara fortitudinis, sapientiæ, justitiæ domi forisque majorum exempla, quibus masculam virtutem sese pulcre in florentissima ætate efferentem magis accenderet, & in præclaro statim lumine, acerrimus avitæ gloriæ æmulator, & hæres, collocaret. Sed ille excelsa immortalis Reipublicæ munera, a Deo Optimo Maximo vocatus alio, suis civibus reliquit

quit obeunda , qui ad civilium negotiorum procuracionem pridem admotus , quantum reipsa valeret , perspicue ostendit , cum Sapiens Continentis delectus , neque multo post ad Ludovicum quartum decimum Galliarum Regem Orator designatus est ; quæ legatio gravissima , quantum ei splendorem , ac nominis claritatem paritura esset , optime intelligit , qui potentissimi illius Regis ingenium perspicacissimum , & ad quamlibet indolem excutiendam solertissimum non ignorat . Veruntamen alias cogitationes , ac sensa indiderant , præter patriam disciplinam , ejus proprius quidam pudor , qui eminebat in ore , moresque mitissimi , quibus , posthabitis profanis honoribus , ad pietatem , ac religionem naturali instinctu ferebatur . Itaque clericali militiæ ascriptus , vix Divi Marci Ædis Primocerius renunciatur , cum defuncto Petro Leonio , Veronæ Episcopo , ab  
In-



Innocentio Duodecimo huic regendæ Ecclesiæ præficitur . Noverat enim summus Pontifex , ex qua familia ortus , & a quibus parentibus educatus esset Joannes Franciscus ; quamque propterea sedulum , quam navum , & impigrum deligeret Præsulem , qui oves sibi concreditas cœlestis sapientiæ nutrire pabulo , & si quæ a recta honestatis semita aberrarent , suo verbo , & exemplo in viam statim revocare fatageret . Neque conceptam spem fefellit exitus . Quæ enim in Episcopo animarum saluti procurandæ omnino addito deposcitur virtus , quæ non in illo cum immenso populorum bono eluceret ? Ardens ad Clerum juxta sacrorum Canonum , & provincialium Constitutionum regulam efformandum sedulitas ; prompta ad idoneos Ministros dignoscendos sagacitas ; ne qua vitia in insontem gregem irreparent , aut si quando irreperint , ut opportuno remedio extirpentur ; mirifica vigi-

gilantia; ad rudes agrestesque homines edocendos commoda litterarum cognitio, non inani verborum pompa, neque nimio acumine odiosa; ut paucis colligamus omnia, providentia, industria, ad quælibet abrupta, & in ipsis difficultatibus consilium expeditum, intelligendi, agendique celeritas, de principatu certarunt. Ipse iccirco, ut accuratissime Episcopi munere fungeretur, velle audire omnes, qui Ecclesiæ nomen darent; diligenter interrogare singulos, eorum ingenium acri examine pertentare, neque ad majores ordinum gradus quemlibet admittere, nisi ante perspecta vitæ probitas, & humanarum disciplinarum scientia petentem commendaret. Ut autem facilius, ac citius, quæ designabat, perficeret, ut universæ Dioceseos salutis inserviret, cujus rei causa intelligebat se in Domini sortem vocatum, quibus unquam laboribus sudoribusque pepercit? Vos  
in.

inter ceteras appello testes , quæ Præfulem quondam vestrum in alperrimis illis jugis impavido , & alacri vultu vidistis , Camunia , Trumplia , Sebi-  
na Valles , ac tota Brixiana regio , vos montani tractus ad Rhatiaë usque fines protensi , vos , inquam , appello testes ; ex tam confragosa , ac prope impervia expeditione vos , vel me tacente , testari potestis , quam curti Episcopo somni , quam frugales par-  
cæque mensæ , quam ad multam sæpe noctem protracti labores fuerint , ut vi-  
cos , & paræcias inspiceret omnes , fa-  
eras ædes inviseret , ac facella singula suismet oculis intueretur . Atque hæc omnia ab illo non florentissima quidem ætate , sed ad senium jam properante , non lætissimo anni tempore , sed fere incommodo , & ad hyemem vergente effecta sunt ; neque imbres tamen ef-  
fusi , non præcipiti torrentes cursu , non turbines sævi , non feræ tempesta-  
tes a proposito unquam dimoverunt .

Nos

Nos nos ipsi vidimus , cum primum Patavinæ Ecclesiæ clavum suscepit, huc omnes cogitationes, curasque suas contulisse, ut longe lateque patentem dioccesim statim perlustraret, longinqua itinera, ac magis salebrofa aggredere-  
tur, populosque, quanto propiores Alpibus, tanto duriores habitos, non tam præsentia sua recrearet, quam optimis institutis erudiret. O caritatem vere patriam in omnium utilitatem sine ullo prorsus discrimine diffusam, o incredibilem Pastoris sollicitudinem, o providentiam admirandam omnibus, at nulla unquam satis digna oratione efferendam! Quis enim illud excelsum opus, quod cæptum ab eo feliciter, meliores semper progressus sortitum est, quis inquam, divinum opus merita satis eloquentia celebrare possit, cum delectos litteratura, prudentia, & vitæ innocentia præcellentes viros, per pagos, per castella, per urbes Apostolico plane

ne more jussit excurrere , qui verbi divini semen ubique spargerent , frugesque copiosissimas , vix jacto grano , colligerent ? Incredibile dictu est , quanto inde lætior virtutum messis succreverit , & agrum Ecclesiæ , alibi sterilem , alibi otiosum , alibi incultum mirifice fecundavit . Quot enim e vitiorum cæno , quibus miserrime volutabantur , educti , in libertatem Christiano homine dignam vindicati sunt ? Quot e pinguioris ignorantie tenebris , quibus pene sepulti jacebant , revocati , purissimam tandem fidei lucem aspexere ? Hinc fervidior , qui alicubi elanguerat , Christianæ pietatis amor ; hinc sacramentorum , quæ in defuetudinem prope apud nonnullos homines abierant , frequentior usus ; hinc injecto metu sempiternarum rerum , quæ fontes , & obstinatos manent , compressa , si qua fuerat , licentia , moresque populorum visi castigatiores . Huic nimirum  
egre-

egregio operi accepta beneficia referunt  
 egentes ac mendici , qui a ditioribus  
 resipiscentibus adjuvantur ; huic ab omni  
 fortuna destitutæ virgines , quæ  
 præsidio præter spem confirmatæ , Christo  
 Domino nomen profitentur ; huic  
 viduæ , huic pupilli advenientia unde  
 unde alimenta debent : nullum de-  
 mum hominum genus est , nulla con-  
 ditio , ordo nullus , qui non saluberri-  
 ma inde emolumenta reportarit . Quid  
 enim aliud sacri illi a civili societate  
 recessus , ubi , abjecto omni humana-  
 rum rerum studio , uni immortalis  
 Numinis meditationi vacarent , inque  
 perennis felicitatis pulchritudine ani-  
 mos defigerent , qui illuc ingrediebantur ;  
 quid , inquam , sacri illi recessus  
 efficiebant aliud , nisi ut collapsa  
 vitia penitus everterentur , & cœpta  
 ubique vitæ sanctioris norma perpetuo  
 effloresceret ? Hujus rei causa & com-  
 modæ , & magnificæ ædes constructæ ,  
 nitidæ , & munda comparata supel-  
 lex ;



lex ; omnia , quæ elegantiam simul , ac modestiam spirarent , præcipua solertia elaborata , quo facilius lectissimus quisque , & honestissimus , unde recte vivendi regulam reliqua plebes desumere solet , ad hæc sanctitatis domicilia convenirent , & ad pietatem excolendam mutuo alloquio , & jugi prece vehementius inflammarentur . Hæc porro omnia cum per se partim , partim per alios strenue Barbadicus ageret , & ex Episcopi munere ; nolite cogitare , Auditores , ceteras interea virtutes , quæ amplissimum Principem decent , aut neglectas , aut infructuosas in eo consenuisse . Didicerat ille , quid se dignum esset , dignum suis , dignum loco , quem obtinebat , ac propterea omittebat nihil , quod cum Præfulis amplitudine apte copularetur , eamque redderet augustiorem . Vera profero , & omnibus nota . Nihil in Joanne Francisco Cardinali vulgare fuit , nihil commune , nihil obvium ;  
gran-

grandia omnia , exaggerata , sublimia ; cogitationes , & animi sensa dignitati paria ; facta vero , quæ inchoata molimina ubique æquarent . Ejus summam magnificentiam Veronæ , Brixiz , Patavii non uno in loco amplæ crectæ domus loquuntur , Seminaria ante angusta , ac semirutata , magnis refecta sumtibus , & in nobiliorem formam amplificata ; sacrarum Virginum Cœnobia , insolito liberalitatis exemplo a solo educta , annuisque redditibus aucta ; quod vero in hoc Principe singulare merito putes , plurima prius pene efficiebat , quam moliretur , neque quicquam agitabat animo , quod non eximium esset , & in suæ Ecclesiæ commodum redundaret . Silentio hic prætereo , quæ enumerari tamen non sine proluxa laude deberent , Divi Zenonis Veronæ Episcopi doctissima scripta , ab Augustino Valerio antea in lucem edita , ac prope deperdita , quæ Barbadicus committi typis



iterum iussit , & evulgari nobilius ; prætereo Divi Gaudentii litterarum monumenta , ejus cura , & impensa ad eruditorum utilitatem ab oblivione vindicata , & annotationibus illustrata novis ; nihil de Ecclesiastica Veronen-  
 sis Episcopatus historia dico , quam brevi methodo voluit exarari . At invidus jure habeatur , & heroicæ virtutis inimicus , si quis silentio prætereat infinitam auri argentique vim ad Venerabilis Viri Gregorii Barbadici , Patruisui , cultum promovendum , liberalissime profusam ; Episcopos ad quæstiones de more exercendas perhumaniter ab eo accitos ; pluribus in locis uno eodemque tempore acceptos splendidissime , omnique munificentiae genere ornatos ; neque hos modo , sed nobilissimum quemque , & litterarum , & sapientiæ famam præstantem , lautesemper habitum , ac magnifice . Quam porro certum sublimis animi specimen præbuit , cum Mariam Casimiram ,  
 in-

invictissimi Joannis Tertii Poloniæ Regis viduam , in Æde Cathedrali Veronæ exceptit ? Quæ humanissimi Episcopi devincta officiis , nunquam postea destitit aureos ejus mores , ingeniique suavitatem perhonorifice commemorare . Quam insigne moderationis , & humilitatis Christianæ testimonium dedit ? cum Carolo Augustino Fabrono , tunc Prælato domestico , paulo post inter purpuratos Proceres ascripto , moranti forte Veronæ , hortantique Barbadicum , ut in vacuam Brixie Episcopalem sedem designari se pateretur , ( offerri enim sacram purpuram , optimam mercedem proponi annucenti ) obstitit constantia plane mirabili , & instanti rursus obluctatus acius est ; nullo modo posse se a suorum , quos amaret enixe , a quibus se suavissime amari intelligeret , sinu divelli ; hac vero conditione nolle , quam in sponsam dulcissimam accepisset , Ecclesiam pristinam derelinquere ; nolle carissima

pignora deferere ; neque prius permoveri se sivit , quam supremi Patris ita jubentis auctoritas intervenit . O invictum pectus , o modestiam æternis laudibus prædicandam , quam non ostri fulgor potuit perstringere , neque quæ plurimorum obtundunt aciem , excelsum dignitatis ornamenta tantillum flectere ! In hæc sensa a puero educatum , & corroborata ætate , eadem nutriendum , mirabimur probatum fuisse Pontificibus , qui honorem tantum deinde non sine summæ in eum voluntatis testimonio detulerunt ? mirabimur earum civitatum , quibus præfectus est , sua humanitate amorem ita sibi conciliasse ; ut ejus desiderium semper ægrelaturæ sint ? Sed quid ego aliena quæro , ubi domestica nostros ob oculos obversantur ? Vos supra ceteros Patavini Cives ejus facilitatem candoremque animi luculenter perspexistis , quos omni existimationis significatione complexus est , & præcipuo beneficiorum

pi-

pignore obstrinxit. Ad illum nemo vestrum, ne ex infimis quidem, unquam adivit, quem extemplo non admitteret, benigne alloqueretur, tractaret familiariter, dimitteret officiose; nemo adversa sorte jactatus, quem blandis Episcopi verbis non solaretur; nemo afflictus ac perculsus, quem patria ope non erigeret, & in spem melioris fortunæ non excitaret. Hæ nimirum nostri Antistitis, & amplissimi Principis fuere virtutes: pastoralis muneris partes tranquillo semper & hilari obire vultu; nullis neque itinerum, neque tempestatum minis cedere; non horrida montium cacumina, non perplexos vallium anfractus pertimescere; non æstu, non frigore, non vigiliis, non ceteris incommodis concuti, ut gregi suæ fidei potestatique concredito, sedulo provideret. Ejus vigilantiam, sollicitudinem, religionis ardorem vos præsertim testamini, *Nobiles, ac Reverendissimi Patres*, qui ei honore, & volun-

tate proximi fuistis ; vos, etsi reliqui  
 fileant , docere potestis omnes , quam  
 vestri ordinis, famæ, dignitatis amans  
 fuerit , quam insolita vos benevolen-  
 tia devinxerit, nullumque prætermise-  
 rit officii genus , quod peculiarem er-  
 ga vos caritatem ostenderet. Tametsi  
 universa Civitas e suis prope sedibus ad  
 hæc parentalia celebranda excita , satis  
 superque testatur squalore, & luctu inu-  
 sitato , quam carus suis liberis Pater  
 fuerit , quam ad oves suas custodien-  
 das Pastor impiger , quam erga cives  
 omnes humanus Episcopus; cujus jactu-  
 ram quanto molestius ferunt , tanto e-  
 videntiore mœstitiæ argumento decla-  
 rant, ac voce prope ipsa profitentur, nul-  
 lum fore tempus, quo Joannis Francisci  
 Cardinalis Barbadici nomen grata recor-  
 datione non colant, ejusque memoriam  
 seris Nepotibus non commendent.

*Habita est in Æde Cathedrali Tertio Kalend.  
 Februarii. Anno MDCCXXX.*

ORA-

ORATIO  
OCTAVA

IN FUNERE

FRANCISCI DOLEONII  
CANONICI PATAVINI,

*Vicarii Generalis Georgii Cardinalis Cornelii.*



Quantus ex acerbissimo  
viri genere, virtute, ac  
dignitate præclari, Fran-  
cisci Doleonii nuper de-  
functi casu, universam  
hanc civitatem perculerit dolor, recen-  
tes adhuc in amantissimorum oculis  
lacrymæ, squalor inusitatus, ac lu-  
ctus, significationesque mœroris pe-  
nitur ex corde profectæ declarant. Sa-  
tis

tis etiam declaravit altum illud , ac  
 triste silentium , quo attoniti , ac de-  
 fixi nosmetipsi invicem contuentes ,  
 jacturamque tantam collacrymantes ,  
 per hosce dies ita torpuimus , ut nihil  
 præter gemitus ac singultus emittere-  
 mus . Doluere omnes , doluere singu-  
 li , cujusque ordinis , & fortunæ ho-  
 mines doluere , virum optimum , &  
 humanissimum , eo præsertim loco po-  
 situm , unde melius diffunderet virtu-  
 tem suam , media & ætate , & rerum  
 pulcherrimarum gloria , nec opinato  
 e vivis ereptum . Vehementer vero  
 vos, Illustrissimi, ac Religiosissimi Pa-  
 tres , insignis vestri ordinis decus no-  
 bile extinctum mœruistis . Sed sum-  
 mus supra ceteros dolor attigit Princi-  
 pem Eminentissimum , cui & officio,  
 & voluntate supra ceteros proximus  
 semper fuit , cum uno , eodemque  
 tempore de se , de Ecclesia Patavina  
 optime meritum Vicarium , multi-  
 plex obeuntem egregie munus , repen-  
 tina

tina morbi vi quasi e sinu suo cerne-  
ret divulsum esse . Cum tot tamque  
justæ confluerent dolendi causæ , ita  
omnium auctus est dolor , ita sensus  
obstupefacti , ut vocem testari dolo-  
rem conantem suum , obrueret prope  
immensa tristitiæ vis , nec nisi egesto  
aliqua parte mœrore , respirare nos ,  
& verba proferre pateretur . Ecce igi-  
tur dolore aliquantulum relevato , qui  
privatim , & tacite exedit corda , nunc  
demum luctus erumpit , seque publi-  
ce funebri pompa , & oratione testa-  
tur . In qua quidem communi causâ  
præclare nobiscum agitur , quibus  
præter ceteros ei multum debentibus,  
hæc difficilis alioquin , & mediocri-  
bus fugienda hominibus , demandata  
est dicendi provincia . Recordamur  
enim , nec sine dolore recordamur ,  
quam hilari semper vultu nos ad eum  
aliquid petituros accedentes exciperet ,  
quam singulari studio complecteretur ,  
quam large beneficiis cumlaret ; ob-  
ver-



versatur ante oculos admirabilis patientia, qua superiore mense nostrarum litterarum exercitationibus interfuit, adfuitque ea humanitate, ut totum pene absentis Patris desiderium expleret. Illud postremum accedit, quod cum illo nemo Principi nostro conjunctior fuerit, cujus jussa, qua decet observantia reveremur, cujus auspiciis stant potissimum, ac vigent studia nostra, merito a nobis extremum hoc pietatis officium, qualecumque tandem futurum sit, inditis exequiis, exposcit. Me itaque in hac virium mearum tenuitate, in hisce temporis concessi angustiis, breviter de tanto viro dicentem benigne audite, reputantes non hic eloquentiæ, sed doloris partes a nobis esse susceptas.

Majorum eximia facinora, domestica spectatæ virtutis exempla ad avitas laudes imitandas, ad ingentia suscipienda posteros vehementissime inflam-

flammare , hic ipse , quem laudamus ;  
 maxime ostendit , qui prima statim  
 ætate ad seria , ad altissima animum  
 cogitationesque convertit . Etsi enim  
 non his acutissimis stimulis Franciscus  
 indigebat , recta satis per se tendens  
 ad gloriam ; sibi tamen quotidie ante  
 oculos proponebat familiæ suæ insignes  
 bello , & pace viros , non quos ambi-  
 tio fingere plerumque solet , aut ex  
 fabulis petere , sed quos annales Bel-  
 lunenses illustribus monumentis ad vir-  
 tutis , & gloriæ propagationem poste-  
 ris tradiderunt . Quam pulchre majoi-  
 rum facta æmularetur , quantam sui  
 spem , & expectationem juventutis in  
 ipso flore excitaret , subsequutæ digni-  
 tates comprobarunt . Postquam enim  
 Venetiis iis disciplinis animum imbuit ,  
 quibus adolescentes nobilissimi ad hu-  
 manitatem informantur , meliore do-  
 mi magistro , Ubaldo Doleonio , pa-  
 truo suo , probatæ famæ Juriconsulto ;  
 usus est , ut illa præsertim scientia , quæ  
 ci-

civilis societatis una salus est , & privatorum ornamentum , Jurisprudencia erudiretur . Hac avidissime arrepta , statim honoribus accipiendis maturus , Judex Prætorius Veronam mittitur ; in qua urbe incredibile dictu est , quantum viris optimis probatus fuerit , quam integre , & incorrupte commissum sibi munus obierit . Ante quam causas vel minimas disceptaturus assideret , divinam enixe implorabat opem , supplexque Deum precabatur , ut se talem erga ceteros Judicem præbere posset , qualem esset illum erga se aliquando habiturus . Hinc trepidare , & summo perfundi metu , ut ipse coram familiaribus sæpiissime falsus est , quoties sententiam laturus esset , magnopere veritus , ne cum alios a scelere liberaret , ipse novo aliquo crimine obstringeretur . Videlicet , quæ exquisitæ doctrinæ , quæ integritatis , & fidei jure dicundo ferebat femina , eo consilio & mente sevisse

vi-

videtur, ut nos hic maturis suo tempore, & uberrimis, maximo Principis Eminentissimi beneficio, perfrueremur. Et sane hæc pietatis Christianæ fensâ, hæc perfectæ cumulataque virtutis opera, quo magis clarescerent; quo seges inde utilior colligeretur, in meliore lumine erant collocanda. Forte accidit, immo cœlesti Numine factum est, ut cum ille Bergomi audiendis causis moraretur, periculosissimo oppressus morbo, & in extremum vitæ discrimen adductus, destineret alia animo, seque totum, si ægrotatione levaretur, foro, & judiciis abdicatis, Ecclesiæ voveret. Audiit Pater summus postulata, atque ille pristina recepta valetudine, quæ nuncupavit vota, statim persolvit. Clericali militiæ vix est ascriptus, vix Presbyterali charactere insignitus, cum ab Eminentissimo Principe, qui ut virtutem amat unice, ita unice ornat, vir fama, multoque magis integerrimis

mis moribus notus, in nobilissimum, ac celeberrimum Canonorum Collegium summo cum omnium bonorum gaudio est aggregatus. Viderat Cardinalis prudentissimus, & hominum æstimator acerrimus, qualem quantumque virum elegisset; optime noverat ingenii, & animi rarissima ornamenta, & quanti faceret, quam carum haberet, mox docuit, cum cum amplissima Vicarii Generalis dignitate jam tum, cum Patavium vocavit, designatum, postmodum decoravit. Hic vero quæ bonitatis, quæ sapientiæ opinio, quæ fama integritatis Francisco accessit? Ab eo Principe deligebatur, qui in gravissimis negotiis versatus, qui multis peragratibus urbibus, obitisque legationibus maximis, usu, & experientia didicerat ad ingentia pondera sustinenda non esse, nisi peritissimos rerum gerendarum viros advocandos. Porro Patavinæ Ecclesiæ, ac tam vastæ, tam inclytæ,  
 tam

tam eruditæ Dioeceseos præfici gubernationi , quantum sit , considerate . Non est locus hic mediocribus , non indoctis , & rudibus , quibus facili negotio imponere , inque mentes fucato quodam virtutis colore subrepere per insidias , & hominum errorem fortasse possis . Versandum quotidie cum cordatis hominibus , colloquendum cum sagacibus , agendum cum Canonici juris , & scientiarum laude præstantissimis , qui te penitus rimentur , dicta notent , facta perpendant , qui nihil præteriri sinant , quod displiceat ; qui , si quid ipse pecces , si quid ab aliis , te imprudente , peccetur , non taceant , non conniveant , sed publice dicant , & constanter opponant . In hac tamen luce Franciscus decennio ita vixit , ita omnium judicio est probatus , ut quod ab eo homines desiderarent , admodum nihil , quæ commendarent , plurima , & præclarissima haberent . Atque ut regiminis tam felicitis recorda-

P

tio

tio perpetuo hæreret animis , neque ullo unquam tempore oblitteraretur , ipsa propemodum fortuna cum ejus virtute certare visa est , cum per tot annos quasi secundo auræ flatu Ecclesiasticæ res fluxerunt , ac tanta felicitate progressæ sunt , ut nullæ unquam procellæ prosperum cursum morarentur . Tametsi nullum hic sibi jure vendicat fortuna locum . Quot enim fuerunt , qui Reipublicæ moderandæ præpositi , quam nacti fuerant tranquillitatem , & florentem imperii statum , quæ felicia tempora deprehenderant , aut socordia , aut regendi imperitia , aut ipsa nimia felicitate in deteriora verterunt , & non sine aliorum detrimento concussere ? Qui igitur traditum sibi ab aliis Reipublicæ gubernaculum sapienter tractat , qui pacem jam vigentem conservat , nonne majore laude dignus est , quam qui turbas , & seditiones componit ? Ne quid unquam adversi Ecclesiæ contingeret ,  
ne

ne sua culpa perniciosi mores inducerentur , diligentissime laborabat ; adeo rat quocumque vocaretur , præsto erat omnibus , curabat omnia , nunquam multiplici cura perterritus , aut ullo modo fessus , idem qui fuit semper , par sibi , par commissæ sibi dignitati . Neque prætermittendam mihi puto moderationem illam , quam perpetuo retinuit , æquum illum , ac temperatum animum in re nulla felici exuberantem . Videbat se placere Principi Sapientissimo , ea probari , quæ agebat , & publice etiam sæpissime commendari . Ille tamen adeo non se exulit , de se superbe non sensit , infra se positos neglexit , aut sprexit , ut nemo illo modestior esset . Hinc ita faciles ad eum privatorum aditus erant , ut qui dignitate ceteris excelebat , facilitate par infimis videretur . Nemo fuit , qui quæ ab illo peteret , non impetraret , aut si quis forte fuit , qui peteret , & obtinere non posset , haud iniquo ta-



men animo ab eo discedebat. Ita enim præsentem difficultatem excusabat; adeo solerter alias profitebatur operam suam, adeo benigne ferentem repulsam dimittebat, ut se magis ille tam dulci officio, tantaque affabilitate obstrictum, quam si voti compos rediret, ingenuè tateretur. Jam privata illa, ejusque propria, morum suavitas, lepos sermonis, concinnitas, urbanitas, quantum auctoritatem, & gratiam homini ad omnem elegantiam exculso compararunt? Verum quæ misera est, & caduca humanæ vitæ conditio; in medio constantis ætatis cursu; dum ejus humanitate perfruimur, dum alia subinde, & alia ab eo nobis pollicemur; ecce illum repente vehementissimus morbus occupavit, itaque præcordiis insedit, ut extremum sibi adesse diem, frustra adhiberi remedia, cognoverit. Nota dico, & audita. Visenti medico ægrotantem die tertio, & de more post exploratas ægritudinis causas nuncian-

cianti , septimo die bene habiturum :  
 Ita nimirum , respondit ; His enim  
 corporis vinculis exsolutus animus , ad  
 patriam , & libertatem evolabit . Sive  
 quod gravitatem morbi ingruentis , ac  
 sensim vires deterentis ægroti sentiunt ,  
 sive quod in extremo , & horrendo il-  
 lo vitæ exitu vis intelligentiæ elucet  
 magis , sive quod ad morbi lethalis  
 cursum , finemque perspiciendum vale-  
 ret in eo major quædam , quam in  
 ceteris , lux mentis , & rationis , seu  
 potius quod abjecta jam rerum præsen-  
 tium etiam florentissimarum cura , im-  
 mortalia , quæ spectabat unice , præ-  
 sentiret , utcumque fuerit , imminen-  
 tem mortem divinavit . Nec vero mi-  
 nus securo animo , constantique acce-  
 pit certum jam mortis nuntium . Quod  
 sane in homine ea ætate , eo gloriæ cur-  
 su , fatis mirari non possum . Nam , si  
 quis senio confectus , exhaustis viribus ,  
 ubi fatis naturæ , fatis gloriæ vixit ,  
 morti proximus , minus commoveat-  
 tur ,

tur , id quidem minime mirum videri possit . At florentem ætate virum , qui sentiat se mori , sibi incepta cum laude multa , sibi spes ingentes , sibi gratiam Summi Principis , sibi aspectum , cultumque nobilissimæ civitatis , omnia sibi uno tempore præcidi videat , hujusmodi non cadere animis , non angere , non perturbare , incredibilis profecto , & prope divinæ virtutis est . Videbat ille se a suavissimo fratre , a carissimis fratris filiis avelli , se collegas sui studiosissimos , se amicos dulcissimos amittere ; nec dubitabat jacturam tantam siccis oculis intueri . Quod si quis doloris sensus surrepens constantiam mentis tentare audebat ; ea statim Christiano homine digna cogitatione repellebat , sic placere superis , sic visum summo vitæ , mortisque arbitro , omnino non esse divinæ voluntati oblectandum . Hac armatus constantia , omnibus insuper Ecclesiæ Sacramentis munitus , jam deficientem

te

te spiritu , pias preces ab ore Sacerdotis excipiens , quaque poterat subsecutus voce , se ipse Deo commendans ; abrumpit postrema verba gemitus , nec me longius procedere patitur acerbissimi casus mœstissima species renovata . Iterum cernere mihi videor ad funestissimi nuncii rumores primos totam ingemiscere Civitatem , audire omnes de omnibus benemeriti viri vicem condolentes . Iterum obversatur oculis Cardinalis nostri amantissimi ad triste nuncium sibi erepti tam cari capitis dolor inusitatus , fletus , ac lamentatio . Quamquam hæc sedes ipsa , vacua augusto Sessore suo , non præteriti solum , sed etiam præsentis mœroris ejus imaginem objicit luctuosam . Eadem videlicet vis doloris , quæ visere , & alloqui in lectulo jacentem , quamvis maxime cuperet , non est passâ , ab ejus quoque celebrando funere invitissimum abstrahit . Gratulare enim vero tibi , o jam cœ-

le-

lestibus recepte sedibus , de nobis , de Principe nostro , de Ecclesia Patavina , Benemerite , gratulare præcipuam hanc tanti Principis , non dicam benevolentiam , sed caritatem . Luctum ejus ingentem , ne hoc tenui apparatu , ne laudatoris tenuitate metiare . Funus ille tuum tristissimo doloris sensu , quandiu vitam producet , tandiu producet ; tuas vero laudes a me obscuratas magis , quam illustratas , & ipse dum vivet , celebrare non desinet , & famæ tradet in perpetuum celebrandas .

*Habita est in Templo Seminarii Patavini . viii.  
Kal. Jun. 1716. die septimo ab ejus obitu .*



D E

VITA ET STUDIIS  
JACOBI JACOBETTI

In Gymnasio Patavino Moralis  
Philosophiæ Professoris.

*EPISTOLA AD AMICUM.*



Siccine, inquis, præclarissimum illud solidæ eruditionis lumen; ille, qui nobis unicus supererat, Græcæ litteraturæ parens ac decus; Gymnasio Patavino, atque adeo Musis omnibus Jacobus Jacobettus creptus est? Et cujus lugubrem obitum, si ad ultimam vixisset senectutem, im-

Q ma-

maturum semper litteris putaremus , hunc firmis adhuc viribus , & vegetiore spiritu in erudiendis publice , privatimque omnibus ad miraculum usque defudantem , nobis repente fata abstulere ? Ah parce tandem , Amice dulcissime , hisce vocibus lacrymarum mœrorisque plenis ; satis enim superque intellexi ex litteris tuis , ad nuntium tam triste te graviter ingemuisse , & continuo inclamasse :

\* Χρῆναι , ἡ ποταμοί , ἡ ἄλσέα , ἡ λα-  
λαγῶντες

Ὅρθες λιγυροὶ καλὸν ἐπ' ἀκρεμόνων  
Κλαύσατε .

Jure enimvero tu , & e grati animi sensu . Quid enim magis , quam Heliconium collem , quam sacra Musarum nemora , fontesque perennes ad illius mortem complorandam evocare oportet , cui Græcia omnis , cui Ho-  
me-

\* *Fontes , & fluvii , & nemora , & canentes  
Volucres suaviter , & belle in virgultis  
Lugete.* D. Greg. Nazianz. Epigr. 28.

meri, Pindari, Æschyli, ac totum illud sapientum Poetarum agmen semper in deliciis fuere? aut qui alii potius doctissimi viri interitum, quam nos lugeamus, quos ille discipulos quondam suos, in familiaritatem deinde admissos ultimam ( absit verbo invidia ) præcipua quadam, ac singulari benevolentia complectebatur, & qua erat incredibili humanitate, commendatione etiam rerum nostrarum frequenti, de prospero fortunæ eventu nos sperare bene jubebat? Utinam mihi limatus is stylus esset, qualis in illo fuit; haberes paucissimis ejus vitæ rationem omnem, quam ad communem dolorem solandum efflagitas per epistolas. Tametsi ille, qui sæpe ac sæpius ingenium suum, ac vim dicendi ad pulcherrima aliorum facta laudibus efferenda libentissime contulit, nullo modo, si viveret, pateretur de se dici, qui ab omni furo, ab omni etiam justa gloriæ cupiditate



semper alienus, maluit laudanda facere, quam ab ullo laudari; qui perpetuis laboribus; ac vigiliis eo contendit, ut latina græcaque lingua esset eruditissimus, non ut talis videretur vulgo, atque ita suorum, aut alienigenarum inusitato aliquo præconio claresceret. Sed hæc ipsa animi moderatio, quanto in homine litterato rarior, tanto laudabilior, fatis ingens Jacobetti præconium est, quæ attingenda est iccirco nobis, non solum ut erga Præceptorem amantissimum mentem memorem publice profiteamur; sed ut omnes intelligant, tanto magis per posteros ejus nomen disseminatum iri, quanto minus cum cæcus amor sui, & insana \* *Φιλαντία* pupugit perstrinxitque. Sed de ejus vita, de fortuna, de litterariis muneribus, quibus in Seminario Patavino, in Trestensi Collegio tunc florentes, functus est, roganti, vel qui amici fuerant, vel qui etiam studiorum

fo-

\* *Amor sui.*

focii ætate illa , nihil illi mihi , quod peculiare esset , & expectationem fortasse impleret tuam : omnes uno ore affirmare , Jacobettum procul a negotiis vitalem vitam , ut cecinit ille , in medio semper litterarum sinu vixisse ; inter libros diu noctuque versatum ; in his virides annos , in his postremos consumsisse : hos appellare filiolos suos , deosculari dulcissime solitum : ab his nullis unquam incommodis , nullis rerum vicibus potuisse divelli. An non fatis hoc tibi ad hominem commendandum , sive humanitatis professorem , sive Præfectum studiorum spectes ? Inexplebilem hanc nova semper addiscendi cupiditatem , prima pueritia sese mirabiliter efferentem promovit , auxitque Venerabilis Gregorius Cardinalis Barbadicus , cum adolescentuli ad se accersiti acrem indolem , vigoremque mentis conspicatus , iussit illico ascribi inter Alumnos Seminarii , quo non recipiebantur nisi

Q 3. qui

qui vultu ipso, & incessu morum probitatem præferrent, & de ingenio suo spem maximam excitarent. Quantum ille profecerit inter tot ac tanta bonarum artium præsidia, quæ literatissimus Episcopus ad quaslibet difficultates superandas adolescentibus instruxerat, exitus statim docuit. Vix enim expleto cursu earum disciplinarum, quæ graviores dicuntur, delectus Præceptor cœpit illico humanas doctrinas edocere, quas tota deinde vita cum ingenti literariæ reip. utilitate professus est. In Rhetorico ludo varia excolendo ingenia, excellentia ita laudibus efferebat, ut tamen non insolescerent; mediocria ita alienis exemplis excitabat, ut vires omnes effunderent; exilia humaniter hortabatur, ut alias cogitationes susciperent; omnino illud, quod M. Antonius apud M. T. <sup>(a)</sup> de Oratore, cum de tyrone loquitur, qui forum spectat:

*si in-*

(a) *Lib. 2. cap. 20.*

si intelligam posse ad summos pervenire, non solum hortabor, ut elaboret, sed etiam obsecrabo: sin videbitur, cum omnia summa fecerit, tamen ad mediocres oratores esse venturus, permittam ipsi quid velit; molestus magnopere non ero. Sin plane abhorrebit, & erit absurdus; ut se contineat, aut ad aliud studium transferat, admonebo. Præcipua tamen Jacobetti cura fuit, ut græcam linguam, & eruditionem probe ipse teneret, & aliis traderet, non neglectis interea latinis litteris, aut omissis. Meministi, quanta rerum reconditarum, quanta Auctorum gravissimorum copia declamationes ille suas illustraret, cum Demosthenem, Æschinem, Homerum nobis interpretaretur? quantus in eo esset, ut nos nihil fugeret, lateret nihil, quod ad absolutam illorum scriptorum possessionem pertineret? Hujus rei causa Græcam grammaticam in meliorem formam redegit, demendo supervacanea,

addendo saluberrima; librum non exiguæ molis conscripsit, typisque mandavit, quem Calligraphiam appellavit, ubi ex infinitis prope textibus, quos affert ex Aristotele, Xenophonte, Isocrate, Thucydide, Plutarcho, aliisque Auctoribus ad varias verborum, & nominum significationes explicandas, satis licet conjicere, quantum ille græca calleret. Sed quid ego ajo, eum calluisse optime græca, & optime scivisse græce? Ita nitide, ita promte, ex improvviso, si ferret occasio, græce loquebatur, ut non modo nostris hominibus, sed ipsis etiam græcis esset admirationi. Quapropter non multo post Romam profectus cum Vaira nuper designato Episcopo, & in conspectum Clementis Undecimi Pontificis Maximi a Laurentio Teupolo, tunc Legato Veneto adductus, suo ipse exemplo ostendit, quam verum esset effatum illud, \* *ὁ μὴ Ἕνν*

Bár.

\* *Qui non Græcus, Barbarus.*

*Βασιλειος*. Adeo enim solerter , sapiens-  
 terque coram doctissimo Pontifice Ja-  
 cobettus de humanis litteris , de lin-  
 guis , de Seminarii Patavini ratione ,  
 de Typographia rogatus respondit ,  
 ut Beatissimus Pater ejus eruditionem  
 maxime admiraretur , discedentemque  
 innumeris Indulgentiis , qui nihil pe-  
 tierat aliud , cumlaret . In Urbe  
 commoratus per septem & amplius  
 menses habuit , unde affatim expleret  
 honestissimam cupiditatem , qua fla-  
 grant vere docti homines , suismet  
 hauriendi oculis , quæ in celeberrimis  
 Historicis Livio , Dionysio Halicarnas-  
 seo ; aliisque olim legit , suisque Au-  
 ditoribus interpretatus est . Inambu-  
 lans enim quotidie solus , & quacun-  
 que liberet , incedens , sæpissime immo-  
 ta acie , & totus obtutu defixus in ipso ,  
 ut ipse testatus est postea , verenda illa  
 antiquæ Romæ monumenta , Tarpe-  
 jam rupem , Circum maximum , Ca-  
 pitolinum collem , Campum Martium :

Am-

Amphitheatra contemplabatur, & incredibilem prorsus voluptatem inde colligebat. Neque hæc solum obvia quidem cuilibet, non cuilibet tamen æque jucunda, sed secretiora etiam, & principibus solum viris, aut litteraturæ fama notis adeunda invisebat, commendatus a Præsulibus, a Laurentio Teupolo commendatus, qui cum ibi, ut ante diximus, maxima cum sua, & Venetæ Reipub. gloria splendido Legati munere fungeretur, mira quadam benevolentia Jacobum, qui a Georgio Cardinali Cornelio, Avunculo suo fieret plurimi, prosequabatur. Tantam in se Legati illius Sapientissimi humanitatem significavit ea epistola, quam Roma misit hisce verbis: *Ejus, inquit, benignitate fruor incredibili. Sæpe cum illo remotis arbitris, mense etiam splendidissime adhibitus, conquisitus, si qua dies prætereat, qua non adsim. Magnopere autem optimam de se conceptam opinionem Jacobettus fovit, cum jussu*  
di-

dicere de Vaira Antistite , de ejus vita , de doctrina ab iis , qui Episcoporum examini de more præsunt , ita prudenter ; ac scite respondit , ut Præsules illi affirmarent , *non posse non propitia aliquando ; & fausta tam literato viro contingere* . Non inania fuere omina hæc . Nam ab Urbe reversus , cum sibi jam , & suis studiis , deposita Seminarii cura ; viveret , paucis post annis Canonico Carlotto , probatissimo Viro , & Philosophiæ moralis in Gymnasio Patavino Professori , suffectus est . Hunc vere , candide Amice , dicas , non modo non ausum petere sedem hanc , sed ultro oblatam constantissime recusasse ; non quod labores & incommoda nova detrectaret , quibus jam occalluerat , sed quod gravitatem muneris serio metitus , se ei ferendo imparem reputabat . Diu reluctantem , tergiversantemque adegerunt , ut munificentissimo Principi , & de facultate ipsius sentienti recte pa-

re-



reret, Parmefanus a Curtivo de Sanctis ; & Joannes Gratianus , hujusce Academiae , ut noſti , eximia lumina , qui cum Jacobettum de ſe ; de ſtudiis ſuis meritum optime , diligerent etiam optime , annifi ope ſumma ſunt , ut dignitatem tanto cum honore delatam acciperet. Accepit ille ſapientibus hiſce Auctoꝛibus , neque minore fide , diligentia , & ſedulitate ſuſceptum peregit munus . Cum enim undeviginti annos Ariſtotelis ad Nicomachum libros ſimpliciter & crudite interpreta- retur ; mirabantur homines , qui fieret , ut hora præcipue pomeridiana , & nonnullis incommoda , ad eum tamen audiendum non juvenus modo , ſed eruditi bene multi ſæpiſſime properarent . Quam ſane provinciam cum ille tanta cum felicitate fuſtineret , de priſtina tamen privatim docendi conſuetudine non modo nihil remiſit , ſed etiam auxit . Adibant illum cives , peregrini ; docti , indoctique paſſim ; excipiebat ille

le omnes sereno vultu , & ad hilari-  
tatem composito ; suam omnibus na-  
vabat operam consilio , voce , scripto ;  
neminem a se vacuum ac tristem di-  
mittebat . Hoc vero in illo peculiare  
fuit ; & admirandum , quod cum aliis  
oratiunculas lucubraret ; dictaret aliis ,  
aliis versiculos conderet ( nam & ver-  
sus scripsit , non hirtos ; & squalidos ;  
sed musis , & Apolline dignos ) nihil  
tamen ejusmodi evulgavit , sed eorum ,  
qui talia munuscula ab eo petierant ,  
nomina semper suppressit ; quippe qui  
nullo modo ferre posset ardeiones quos-  
dam , qui siquid aliorum causa face-  
rent , jactabundi statim , & gloriosi u-  
bique gentium propagarent . Hinc sua-  
vissime irridebat lividos , & obliquis  
semper oculis aliorum progressus aspi-  
cientes , recinens sæpissime nobis , quod  
extat apud M. T. Philippica x. *neminem  
alterius , qui sua consideret , virtuti invi-  
dere* . Ceterum multa scripsit , præfatio-  
nes , epistolas , carmina , quæ omnia  
spe-

sperare juvat strenui adolescentis opera  
visura quamprimum lucem. Orationes,  
quas habuit publice in Seminario, cum  
ibi Præfetti Studiorum personam gere-  
ret, nonnullas in scriniolo asservabat,  
oratus multa prece, ut rerum suarum  
susciperet curam aliquam; sed illæ re-  
pente evanuerunt ex oculis, & alio a-  
volarunt. Suspiciantur aliqui, versipel-  
les quosdam homines in capsulam ir-  
replisse, & plurimam lautæ supellekti-  
lis partem suffuratos, in rem deinde  
suam convertisse, ut alienis ita opibus  
sefe pulcherrimos plebeculæ rudi ven-  
ditarent. De probis hominibus non  
ausim hoc dicere; tametsi hoc usita-  
tum est. Jam stylus ejus pressus fuit,  
& concisus, plenus acuminis, plenus  
succis, gravitatis plenus, & quem pau-  
cis contigit imitari. Sermo gravis i-  
dem, & festivus, & multo sæpe sale  
conditus. Mores omnino ad honesta-  
tem, pietatemque catholicam castiga-  
ti. Victus ejus simplex, sed mundus: con-

contentus sorte sua , \* *μισάργυρος* vere ,  
minime \* *φιλάργυρος* , Horatianum illud  
sæpe usurpabat :

*Sit mihi , quod nunc est , etiam minus ,  
ut mihi vivam ,*

*Quod superest ævi , si quid superesse va-  
lunt Di .*

*Sit bona librorum , & provisæ frugis  
in ævum*

*Copia , ne fluitem dubiæ spe pendulus  
hora .* (a)

In media civium societate vixit , quoad potuit , carus omnibus , expetitus ab omnibus ; at ubi in effecto corpore vires elanguerunt , præsentem tamen semper spiritu , & acie mentis vivida , abstinuit publico ; sed ejus domum per multi officii caussa , plerique discendi gratia frequentarunt . Rogatus a viro apprimè docto , cur tandem in græcæ linguæ rudimentis tradendis tantopere desudaret , tantisque laboribus in juven-  
tute

\* *Pecunia inimicus .* \* *Cupidus pecunia .*

(a) *Horat. Epist. lib. 1. Epist. 13. v. 107.*

tute instruenda sese frangeret, non alia de causa, sed id facere affirmabat, nisi ut ejus litteraturæ cognitio jam ad paucos redacta, ad aliquos saltem manaret; neque enim, agebat, τὸ μέγα εὔ, ἀλλὰ τὸ εὖ μέγα. Quid quæris amplius? Vir erat eruditissimus, & modestissimus:

ἄνθρωπος περὶ πάντα εἰδώς.

ὃς δὴ μηχανῶν παρὰ τὸν ἑκτὸν αὐτοῦ πλάττει.

Hæc fere habui, quæ tibi de Jacobetto breviter scriberem, & tumultuarie; nam ejus merita non epistolam possunt, sed orationem; & præla nos urgent. Cura valetudinem tuam, æstusque fervorem librorum lectione mitiga.

Pata-vio. V I I. Idus Sextil.



\* Non quod magnum, bene, sed quod bene, magnum.

\* Vir qui pulcherrima noras,

Et qui divitiis mentis congesserat amplas.

Z. C. 115

- C. 113

05692582





